





V. 10. 5.

K. 4.

13-29. c. 53

P I U M
CONSILIVM
SUPER PAPÆ SFON-
DRATI DICTI GREGORII
XIIII MONITORIALIBUS UT
vocant Bullis, & Excommunicationis, atque
interdicti in Gallia Regem, Ecclesiam, & re-
gnum minis, è Francorum maiorum no-
strorum exemplis in rebus iis-
dem repetitum;

A TUSSANO BERCHETO
*Lingonensi è Gallico in Latinum ser-
monem conversum.*





Psal. 109.

*Maledicent ipsi, & tu, Iehova, benedices!
Insurgent, & pudore afficientur.*

FRANCOFURTI
Ex officina Typographica Mar-
tini Lechleri,

M D XCI.





HENRICO IIII CHRI-
STIANISSIMO GALLORVM
ET NAVARRORVM REGI
Tuss. Berchetus S. D.



*VI rei veritate ac iustitia,
& firmis utriusque propu-
ntanda fundamentis nitun-
tur, HENRICE Christia-
nissime, illi nec lucem, nec
forum, nec iudicem, nec disputationem refu-
giunt: sed in caussa sua defensione recta via,
ratione nimirum, jure & modestia progre-
diuntur, ut præter victoriam, quam meri-
to sperant, moderationis etiam laudem con-
sequantur. Contra, quibus iniusta caussa
est, nec verisimilis ulla illius quo jure qua-
que iniuria defendende facultas, ii pro ar-
gumentis & exemplis optimis, quibus defi-
ciuntur, contumelias, vim & violentiam
non iniuste tantum, sed protervè etiam sa-
pè numero adhibent, injustitia simul & pe-
tulantia insignes. Ita nimirum, exempli
caussa, in scholis (ut à minimis ad maxima
sensim progrediar) usu venire videmus, ubi*

qui vel ingenii exercendi ostentâdique, vel veritatis illustrandæ gratia disputant, nec habent unde quod volunt efficiant, ad clamores, ad rixas, ad pugnos & pugnam veniunt: fitq; ut, qui insana vociferatione, petulantiq; contentione vicerint, iudice vulgo, quod ea miratur & probat, eruditiores habeantur. In foro idem dicendum: Ut enim eruditus & justæ causæ vindex patroxus graviter & modestè causam agit: sic ineptus rabulâ & veritate & ratione destitutus, injuriis complet forum, ridiculis tergiversationibus causam eludit, clientem frustratur, furiosis clamoribus auditorum aures obtundit, iudicum etiam animos enecat: qui tamen coronæ plerumque imperitæ opinione, benè dicendi palmam refert. In templo etiam, qui Sparta quam nacti sunt, dignè ornare, & susceptam probandæ atque illustrandæ veritatis provinciam, muneris sui functioni auditorumq; expectationi cōvenienter, tueri non possunt, quia nulla veritate nituntur, pro frugibus obtrudunt famelico populo siliquas, pro luce tenebras offundunt, pectus præ dolore aut furore potius tundunt, pulpitem feriunt, vociferantur,

tur, in veritatis assertores contumelias despumant, fulmina contorquent, eosque ad fascēs & secures, ad ignes & saevissimos quosque cruciatus damnant. At veri piique Ecclesiastæ, etsi vitia & errores paulo acrius reprehendant, modestiæ tamen fines non excedunt, veritatem, quam profitentur & tenent, docere contenti. Siquid autem occurrat, quod in questionem jure vocari possit, in campum lubenter descendunt, disputationis eruditæ & modestæ certamen nec declinant nec detrectant: sed pedem amicè conferunt, loca locis, argumenta argumentis, exempla exemplis, tempora temporibus, personas personis opponunt: unde controversiâ utrinque diligenter excussa & disceptatâ, veritas elucescit & confirmatur, quâ postea ad Dei gloriam & publicam salutem stetur. Ne te o magnanime Rex, tam multis magnisque rebus iam intentum & omnino affixum pluribus morer, in tua perduellique causa hoc ipsum perspicere potest. Illi enim, ut ab iis dicendi initium faciam, & in te mox desinam, injustissimam regni alienationem, conflata iam dudum omnium ordinum conjuratione, perfidè moliuntur: ac ne, quod palam (bo-

norum quidem omnium iudicio) nefarium
 & impium est, id nulla causa freti aggredi
 videantur, religionis nomen conjurationi
 sua obtendunt: speciosum sanè prætextum,
 quo plerique delusi & pane dicam fascinati,
 sceleratā hanc cum perduellibus istis ever-
 tendi regni societatem ineuntes, vivi vi-
 dentesq; pereunt. Hac illorū causa est. Qua
 tandem modo eam defendunt? armis, in-
 cendiis, rapinis, cadibus, venenis, merce-
 nariis, homicidiis, sacrilegiis, dum nec sa-
 cris rebus (quarum vindices videri volunt)
 nec profanis, nec sexui, nec aetati, nec perso-
 nis, nec dignitati, nec tuæ etiam, quam re-
 vereri & colere imprimis debuerunt, maje-
 stati parcunt, non tuo tantum regno (cujus
 maximam partem occupatam tenent) inhi-
 antes, sed tuæ etiam insidiantes saluti. Sal-
 tem si in sua causa propugnanda paulo mo-
 deratiùs & humanius, ut patriæ religionis-
 que studiosi aliquantulum viderentur, se ge-
 rerent. At eāne est recta & legitima reli-
 gionis propugnanda, & hæreseos, cujus tuā
 Majestatem falsò insimulant, sananda &
 extirpanda via? Ad has etiam tam multas
 injurias accedunt Papæ Romani Bullæ, &

contorta in te tuosq; omnes fulmina, quibus
 tēq; vulgo rerum imperito odiosum & exe-
 crandum reddere, tuosq; tibi addictissimos
 cives à tua, si possint, salutis & dignitatis
 propugnatione avocare tentant. At, ô Chri-
 stianiss. & potētiss. Rex, & tua causa iustis-
 sima est, & sancta legitimaq; illius defendē-
 da ratio. Regni enim successio in nullam jam
 cōtroversiam dubitationēq; vocatur. At de
 religione, inquiunt, agitur: Verūm religio
 non armis, sed argumentis dijudicanda est:
 non perduelliane, sed sacra scriptura vindi-
 canda: non impio bello, sed pio concilio illu-
 stranda & comprobanda est. Rationi autē,
 scriptura sacra, concilio iam pridem te eru-
 diendum offers, iisq; libenter cessurum &
 regiē & sanctē asseris: ut gravissimis scri-
 ptis saepe testificatus es, & præcipuē Decla-
 rationibus aliquot (fidelissimis tui cando-
 ris, ingenii, consilii & propositi testibus)
 quas ideo nō ita pridem Latinas feci, ut non
 Gallis tantum, sed aliis etiam omnibus, ad
 quas ea pervenirent, causa tua veritas &
 equitas patesceret. Præterea cū vir qui-
 dam pius & eruditus, idemq; tui observan-
 tissimus edito lingua vernacula libro erudi-

tè causſam tuam confirmasset, & omnia, quæ
 contrà obijciuntur, verè ac perspicuè refu-
 tasset: illū ego eadem ratione motus, in La-
 tinum etiam sermonem converti, unde cæ-
 teræ nationes abundè discerent, quàm justa
 tua causſa esset, & quàm injusta horum bel-
 lorum occasio, ut re tota penitus comperta,
 ad justissimam tui defensionem unà tecum
 suscipiendam excitarentur. Cùm enim cõ-
 jurati isti nec rei veritate, nec justitia, nec
 pietate, nec consiliis, nec æquissimis à te pro-
 positis conditionibus à nefario suo cõsilio ab-
 strahi possint, sed injustis armis regnum tuū
 magis ac magis usurpare, & ad Hispanum
 transferre pergant, atque in eare modis, ar-
 tibus, machinisq; omnibus enitantur: AË-
 quum est profectò atque adeò necesse, pie-
 tissime Rex patriæq; amantissime, ut, si &
 tue, & tuorum, totiusq; regni salutis consul-
 tum velis, justam causſam justis rationibus
 necessariisq; armis propugnes, regnum tuum
 è luporum istorum faucibus eripias, bonos
 tam indigna & atrocia tecum passos recrees,
 eos patriæ, iisq; patriam restituas: atq; pie-
 tatem & justitiam (quò tua consilia & ar-
 ma omnino spectant) conjuratorum persi-
 dia &


a & pertinacia afflictas ac profligatas cri-
 as & stabilias, pacemq; solidam, quantum
 a te erit, constituas. At restat unus non
 ibi quidem, qui meliora & sapis & sentis,
 sed tuis tum Gallis, tum externis etiam ali-
 quot, veteris historiae & cognitionis rerum
 non satis peritis, à Sfondrato nuper injectus
 scrupulus, unde fortasse aliqua caussa tuae
 minus constanter ab illis propugnanda oc-
 casio nasci possit. Verum huic quoq; malo ab
 eodem superioris libri auctore, praesens hoc
 pio simul & erudito libello remedium adfer-
 tur, quo bullarum istarum vanitas osten-
 ditur, infirmiorum animi adversus hos ina-
 nes metus confirmantur, atque ad causam
 tuam alacriter fortiterq; defendendam tum
 optimis, tum verissimis exemplis edocti ex-
 citantur. Libri hujus probe intellecti utili-
 tas & necessitas, tum piorum tuig; aman-
 tissimorum virorum, qui de eo Latine ver-
 tendo mecum egerunt, consilium & aucto-
 ritas: denique (quod dicere primò debui)
 summa mea erga tuam Majestatem obser-
 vantia, illique obsequendi & patriae pro mea
 parte consulendi voluntas huc me adduxe-
 runt, ut eum etiam in Latinum sermonem

converterem: unde Germania quidem tota, Anglia, Scotia, Helvetiorum gens infide, in sancta hac societate, in proposito susceptoque nostri defendendi consilio permaneant: magna verò Italia pars, & Hispania tota hujus regis & regni, immo Christi & religionis vera hostes, aut sapere discant, aut quod nobis exitium machinantur, sibi ipsis certò impendere sciant. Tu verò, rex Christianissime, optima conscientia, causse equitate, bonorum omnium precibus, fortissimorum populorum tum Gallorum tum externorum præsidiis, sed Dei imprimis, cujus & caussa (non tua tantum) & nomen & cultus hic aguntur, bonitate & misericordia, justitiæque nixus, ridiculis istis Bullis, & infestis hostium armis contemptis, fortiter, ut facis, in hanc caussum incumbere: nec prius à justissima tui, regni que defensione piè & necessario à te suscepta desiste, quàm hac tota conjuratione, cōjuratisque omnibus funditus extinctis, Deo suus honos, Ecclesiæ sua dignitas, Galliæ sua libertas per te tuorum votorum compotem factum restituatur & constet. Quod Deus Opt. Max. quod tu præcipuè uno & niteris & confidis, faxit, ac vi-

A D HENRIC. IIII. II

*vitam tibi tuisque omnibus longissimam
felicissimam largiatur. Vale o Rex Chri-
ianissime, atque hunc (quem mihi unum
endico) vertendi alieni operis laborem à
te tua gratia susceptum, tuaque etiam Ma-
estati dicatum, summissequè oblatum pro
uo singulari candore, & verè regia huma-
nitate, serena fronte accipe. Sedani è Mu-
seo nostro 2 Augusti 1591.*





Tuss. Berchetus pio & candi-
do Lectori S.

MIRANTUR hodie multi quónam malo genio, quóve fato nostro bella hac civilia aut nata sint, aut alantur tandiu, & magis in dies augeātur, itaque propagentur & confirmentur, ut nullis quacunque opponantur, nec opibus, nec viribus, nec rationibus, nec machinis labefactari, percelli, interiréque omnino possint. Non abs re quidem id mirantur, & dolent etiam, ob rei, que tam multa secum mala invehat, & pietati iustitieque interitum minetur, diuturnitatem & magnitudinem. Verum si admiratores illi, & animorum nostrorum pravitatem, & corruptelam morum, & vite labem, ac gravissima, quibus ea tota scattet ac sordet, vulnera sibi ob oculos ponant, & quod proximum est, in tot ac tantis, quibus laboramus, morbis nullam fere sanitatis speciem & spem reliquam esse considerent, non amplius mirabuntur: sed dolebunt nihilominus, quòd de morbis nostris curandis nullo modo nec cogitemus, nec laboremus. Vitia hac sunt, ut uno verbo dicam, & scelera, bellorum & calamitatum fons & caput: quibus nisi extirpatis, nullus miseriarum finis sperandus videtur. Non persequar
omenia,

nia, quia & infinita sunt & alibi ab aliis ex-
ata satis, sed majori quidem illorum, qui sa-
ter ea disseruerunt, & nos ad meliora erudic-
t, laude, quam nostra, qui nec ullis praeceptis
niti sapere, nec ullis malis affecti resipiscere
umus, utilitate. Et quid pluribus commemo-
dis tempus teram, cum, si avaritiam & am-
onem teterrimas animorum pestes, unā bel-
um causam esse dixero, complexus omnia fr-
videar? Hic unus malus genius est, qui nos
diu vexat: hoc ipsum est illud factum, quod
privatis rebus detrimentum, & publicis exi-
m adfert. Infestus ille est morbus, qui piete-
& justitiā, qui Gallia nostra, qui Ecclesie uni-
sa extremam, si quā possit, perniciem machi-
ur. Quis enim jam tanta aut cecitate, aut
pore, aut perversitate est, qui non videat, non
iat & fateatur impia istius & perfida conju-
ionis causam unicam esse ambitionem, &
us comitem avaritiam? excipio conjuratos
s, qui speciosum religionis (cujus se vindices
sistentur) nomen nobis obtendunt, & eā se unā
moveri ad capeffendum hoc bellum dicunt,
a in antiquam scilicet dignitatem suam re-
uatur. At eos ipsos potius testor, si modò con-
ntiā convicti, quod sentiunt, aperte eloqui ve-
, annon religionē evertant potius quam stabi-
at: annon Ecclesiam expugnent potius quam
pugnent: annon majorem usurpandi regni,
am vindicanda pietatis curam gerant: annon
jorem Hispani, quam Christi rationem ha-

beant: annon deniq, magis de privata re augenda, quam de publica aut ornanda aut amplificanda laborent? De iis etiam ipsis, si modo quid sapiunt, quero, an ea, quam inveniunt, vera & legitima sit restituenda, si collapsa est, religionis via & ratio? Certè priscos pietatis tum fundanda & edificanda auctores, Deum, Prophetas, Christum, Apostolos, & alios pios Doctores: tum ejusdem confirmanda adiutores, ut Imperatores, Reges, Principes, piasque Respublicas, & populos si consulunt & audiunt, longè aliam viam inibunt, longè aliam rationem sequentur. Sed (ut non minus verè quàm festivè dicitur) famelicus venter auribus caret: vasa illa & habendi & dominandi fames nihil audit, donec plenè satiata fuerit, si plenè tamen unquam satiari potest: quæ contrà quò plura absorbit, eò plura appetere, & gazas gazis, regnaque regnis cumulare & solet & gaudet. Sed mittamus jam conjuratorum sordes ac perfidiam: & ad nos ipsos, qui puriores videri volumus & fideiiores haberi, jamjam veniamus. Ingenuè fateamur necesse est nos hujus culpæ, vel gravissimi potius sceleris conscios & socios esse, qui nascens hujus impia conjurationis monstrum non oppressimus, & jam natum; ne adolesceret, non extinximus: immo illi cùm nascenti (ea fuit nostra secordia) præsto fuimus; tum quæ nostra aut perversitas, aut inertia, aut perfidia fuit, natum aluimus; & eò usque eveximus, ut iam nec opprimi, nec extinguì posse videatur.

AD LECTOREM. 15

Alii enim de rei exitu dubii, mediis & securi
 vident: alii pecunia corrupti in propriam
 ruinam ruunt: alii honoribus inhiantes pa-
 nam produnt, & libertatem servitute, Hispani-
 am crudelissimum superbissimumque tyran-
 num, Gallo humanissimo & moderatissimo re-
 committant: pietatis, libertatis, fidei, in pa-
 nam & suos, seque adeo ipsos anterioris & officii,
 cura denique totius obliti, neque solum, sed
 res potius, vexatores, & afflictores infestissimi.
 Cigitur tanta malorum gravitatis & diutur-
 nitatis causa breviter explicata esto. Nequo-
 id mihi declamatio ad hac dilatanda institu-
 est, sed prefatio, quae brevitate contenta, contra-
 rem me esse jubet, quam & rei natura, & mea
 consuetudinis atque instituti ratio ferant. Hu-
 ius tamen diuturnitatis causam alteram si po-
 las, hanc verè subjiciam: Nempe Hispanum
 regem, atque Romanum Pontificem, illius, de
 quo diximus, ambitionis & avaritia ministros
 instrumenta praecipua, vel potius artifices &
 architectos summos: quorum ille suis nummis,
 suis Bullis, uterque seditione, dolis, scelere,
 neque libidine, & ira quidvis permiscet, captat,
 rumpit, rapit, perdit, donec & omnes & o-
 mnia sua tyrannidi subjecerit, & ita quidem
 vixerit ac prostraverit, ut nulla unquam ra-
 tione ne exurgere quidem, nedum consistere
 possimus. Mirum tamen istud & perquam
 deplorandum, quod nos in tanta & injuria
 dignitate, & mali gravitate, pristinae virtutis

Et libertatis immemores, Marranis istis Et mercenariis Marranorum satellitibus Et mancipiis Sabaudis, Lotharingis, Et Guisus nostras opes, vires, Et animos tam frigide Et lente opponamus. Turpissimum hoc quoque Et panem ridiculum, quod nescio quos Caprarios Et Sfondratos Bullis, hoc est meris nugis (quibus ne pueri quidem hodie moventur) armatos sic reformidamus: quos potius Majorum nostrorum exemplo ridere, persequi Et multare decuit. Sed Hispania fraudibus, insidiis, tyrannide, Et nummis, quam gladiis, virtute Et viribus validiorem ac formidabiliorem jam omittamus: redeamus ad Romanos pontifices rerum omnium Dominos, qui nec Christi nomine, nec religionis causa moti, sed nati tantum avaritia Et ambitione, atque eorum a quibus spernuntur, Et de ea, quam sibi immerito arrogat, dignitate deturbantur, ulciscendorum cupiditate abrepti, has nobis turbas faciunt, has tragoedias excitant, has bellorum civilium faces accendunt, ut soli sine controversia dominantur, Et nos suis artibus, si consequi id possint, ad Barbariem Et ignorantiam reductos, suis Bullis Et excommunicationibus Panico metu terreant, Et ita suis pedibus subjiciant, ut ne hiscere quidem audeamus. Notum est omnibus, quomodo Germanos Imperatores quondam habuerint, donec pristina virtutis memores se tandem collegerunt, Et pontificiis istis Bullis forti animo resisterunt. Quid de Gallis nostris dicam? sed tu res ex Annalibus nostris satis cognita, tum proposita

mihi

mibi brevitatis decòri me monent, atque ad multa, quæ ex hoc libello & aliis nuper editis peti debent, prætermittenda hortantur: ut quod præsentis instituti magis proprium esse, & ad libri argumentum pertinere videtur, id maximè attingam. Non igitur repetam Bonifacios, Benedictos, Julios, Gregorios, & cæteros ejusdem furoris ambitionis & tyrannidis Pontifices: sed de Sixto tantummodo agam. Deum immortalem! quò in regem nostrum & Henricum III, quem suis cõsiliis trucidandum curavit, furore est debacchatus? quò animi impetu correptus in utrūque sæviit? At Dei, qui ejus tela retudit, bonitate inanès fuerunt illius conatus, & bruta omnino fulmina. Verum enim vero dum animo suo morem gerit, dum Hispani libidini servit, dum Ecclesia Romana dignitatem & sacra sedis auctoritatem tuetur, pius esse pontifex, & verus Petri successor prædicatur: Immortalitate etiam & Divorum consortio dignus putatur. At Urbanus illius successor ingenio longè dissimili præditus, & ad pacem quam ad bellū propensior, quia minùs à natura ad furiosa Sixti cõsilia exequèda comparatus & aptus esse videbatur, cùm paucos tantum dies in sede Pontificia moratus esset, à cõjuratis, quorum cāussam nec probabat nec promovere curabat, è medio sublatus est. Sfondratus in Papatum illi successit, qui ne in Urbani vicem succederet, & ne Hispani & Hispana factionis expectationem falleret, atrocissima & gravissima quaque in Gallia regem regnumque

ipsum machinari, & quidquid auctoritatis as-
potentia sui decessores sibi usurparunt, ad utrius-
que perniciem & everisionem conferre decrevit.
In Gallia, Nobilitas, & reliqui fideles Galli sese
erga regem suum optimè Dei beneficio anima-
tos esse ostendunt: unde conjurati & familia re-
gia interitum, & Gallici regni ad Hispanum
abalienationem, quam jamdudum cogitant &
moliuntur, se posse unquam assequi desperant:
Nullum verò præsentius efficaciusq; remedium
esse uspiam putarunt, quam si Papa veterem il-
lum & rubiginosum gladium, quo majores ipsius
instructi cum Germania principibus & aliis bella
gesserunt, expromeret: atq; sua tonitrua & fulmi-
na maximo cum sonitu & fragore ubique audi-
enda ad terrendos hominũ animos, & aliquem
religionis scrupulum iis injiciendum, contor-
queret: quo perculsi & perturbati, singularem
suam, omnia quæ à Deo mandantur officia regi
ac regno præstandi voluntatem (quam hætenus
perpetuam & constantem habuerunt) immu-
tarent, planèque abjicerent. Sfondratus præcla-
rum illud Hispani & Gallie conjuratorum con-
siliium sequutus, à novissimis Martiis Calen-
dis duas Monitorias Bullas stylo Papali à se
compositas Rhemos per Marcilium Landria-
num Referendarium suum hoc maximè consilio
& animo misit, ut eas per totam postea Galliam
dispergeret, qua veneno suo magis ac magis im-
buta, conjurationem vehementius confirma-
ret. Exiit altera ad Nobilitatem & reliquum
popu-

populum, Altera ad Ecclesiasticos & ad Cardinales maximè, qui stant cum rege, mittitur.


Quæris, lector, ad quem finem? Dicam hîc paucis, quod fusiùs postea auctor proponet ac refutabit. Papa unica religionis specie, & hæreseos (quam impudentissimè conjurati per calumniam & maliciam confingunt, suæque in regem perfidia falsissimè pretexunt) crimine ductus, nulla omnino nec regii juris, quod nullo pacto convelli potest, nec divini mandati, quod nominatim de obedientia regibus & principibus exhibenda sancitum est, ratione habita, tum hos tum illos admonet, immo & imperat, ut à rege si non jam defecerint, quamprimum deficiant, atque ad alium recipiendum colendumque se comparent. Quem (inquires) regem nobis constituere in animo habet? Hispanum, inquam, cui totus hic desudatur labor, ad cujus sitim non prorsus quidem sedandam (unus enim Hispano regi non sufficit orbis) sed nonnihil restringendam hæc tota conjuratio conflata est: hæc arma, hi exercitus, hæc faces spectant. Vide quàm verè Sfondratus CHRISTUM spiret, PETRUM referat, utriusque modestiam sapiat, & imitetur: qui non contentus hæc nefariè monuisse, militariter etiam vel tyrannicè potius comminatur, nisi certo & à se præscripto tempore imperanti sibi pareatur, eos omnes execraturum, atque ad tartara ipsa detrusurum, Ecclesiasticis sacerdotia sua erepturum, denique

rerum omnium sacrarum communione & usu
 iis omnibus interdicturum. Sani quidem homi-
 nes Sfondratum ut insanum & furiosum me-
 ritò ridebunt, qui talia præter fas & ius omne au-
 deat : At ceteri, iique ab nimium multi, qui,
 quàm inania hæc Paparum fulmina sint, quàm
 parvi ea veteres Galli fecerint, quàmque vana
 sit tanta ista, quàm nobis ostendant, potestas &
 auctoritas, non satis intelligunt : ut ne animo con-
 sternati & regi, & regno, & sibi ipsis desint, has
 brutas vanasque minas libri huius auctor eru-
 dito sanè & pio scripto eludit, atque tum gravis-
 simis rationibus è sacra maxime scriptura peti-
 tis, tum Regum exemplis, tum Senatuū & Aca-
 demiarum Decretis ex Gallica historia deprom-
 ptis, nefarios istos Sfondrati cæterorumque ejus-
 modi conatus accuratissimè retundit : ac docet,
 quantum hæc Papæ mandata cum Dei, cuius se
 vicarium mentitur, pugnent, quàm impuden-
 ter etiam & falsò conjurati, omni vero prætextu
 destituti, regem & hereticum, & Ecclesiæ ho-
 stem incusent. Hanc autem responsionem au-
 ctor Gallis primò ac propriè destinavit, in eo-
 rumque potissimum gratiam & usum Gallicè
 conscripsit, & ita quidem clarè & perspicuè, ut
 ab ignavis etiam facile intelligi possit. At ob rei,
 quæ in eo tractatur gravitatem, & eam quæ inde
 ad omnes manare potest, utilitatem, dignissi-
 mum opus esse judicavi, quod Latine linguæ be-
 neficio ad externos etiam transferretur. Nam
 bellorum quidem civilium, quibus Gallia fla-
 grat,

grat, rumores ubique terrarum disseminati sunt. sed dubium non est, quin multi speciosas istas (quales à Catilinariis obtenduntur) conjurationis faciendæ, statusque nostri perturbandi causas ignorent: quibus persanè gratum futurum esse puto, si eas verè, ut hic edisseruntur, & planè intelligant, & certius de iis sermonem inter se conferant, atq; miseriis nostris vehementius commoti si non opibus & viribus, certè precibus nos juvent. At hoc me ad hunc vertendi laborem multò magis impulit, quòd principũ & Rerum publ. omnium christianarum causa cum nostrà simul agatur. Gallia enim à conjuratis bello impio & miserando prima appetitur. Illic Papa cives adversus regem concitat, alios etiam à suis consiliis non valdè alienos & ad rebellionem cõfirmendam satis propensos fulminibus territat, quò facta publici status mutatione, regnũ Gallicum in Hispani regis ditionem & potestatem redigat. Quod quidem si (ut jamdudum machinatur) hoc modo assequatur, viam ad cetera imperia sibi eadem ratione subjicienda patefactam & perfacilem esse putat. Opera verò est pretium ea de re principes & Respublicas certiores fieri, ut sibi suisq; rationibus diligenter consulant, & ex nostris calamitatibus, quod sibi ex usu futurum sit, periculum (ut ille monet) faciant. Cumq; Deo suppliciũ, ulciscendi sui causa, de nobis sumpturo visum ita decretumq; fuerit, ut funesta hac fax in mediis regni nostri visceribus primũ accendatur: est principum omnium, si bene secum agi

velint, munus, ad hoc restringendum, quo Gallicum regnum miserè deflagrat, incendiū, priusquam ejus scintillas in sua ipsorum tecta immitti videant, nobis succurrere, presentemq; opem ferre. Neminē certē tanta ingenii tarditate ac stupore, tanta etiam judicii debilitate esse puto, qui nesciat, quanta sit Hispanorum ambitio, ac dominandi libido: quique apertē non videat eam esse unam illorum mentē, eoque tantum illorum cogitationes & consilia spectare, ut Catholici reges ubiq; terrarum evadant. Germania, Anglia, & alia satis multe ditiones id jā expertē fuerunt. Illi autem, quò facilius optata consequantur, Papas ad nutum, arbitriumq; suum fingunt, paratosq; habent, necnon eorū Bullas & fulmina (efficacissimas ad superstitiosum & imperitiū vulgus contra Principes religionis nomine concitandum machinas) ut olim, sic & nunc totis viribus adhibent. Quod consilium si ex eorū animi sententia in hoc regno successerit, hoc profectò exemplum plures in eandem postea calamitatē trahet, eritq; nō mediacre pōtificiæ potestatis argumentū. Bullæ, quas Papa Sfondratus ad nos dedit, nuncupantur Monitoriæ. Et verè quidē Monitoriæ sunt: quibus nimirum Principes omnes admonentur ut toto pectore de suis rebus cogitent, atq; furiosa ista execrandorum perduellium, qui omni studio & conatu ad regnorum & Principatuum eversionem perniciemq; incumbunt, consilia seriò & sedulo animadvertant, quò à comparatis per eos insidiis, certissimāq; ruina praeavere sibi possint.

possint. Ego verò præpotentem illum Deum imperiorum auctorem ac propugnatorem omnibus precibus obsecro, ut hoc regnum cateròsq; principatus ac Respublicas salvas & incolumes conseruet, ac pro summa, qua valet, potentia, Paparum & conjuratorum furores coerceat, ut antiqua illa & salutaris Christianæ Ecclesiæ tranquillitate restituta, Pietas & Justitia, quæ ab his bellis oppressæ & extinctæ omnino jacent, ad ejus nominis gloriam felicissimè ubiq; locorū denuò excitentur & vigeant. Atq; hæc pro libri quidem mole, quæ non valde magna est, & præfationis etiam (cujus, ut ille sapienter præcipit, evitanda est immodica longitudo, ne in caput excrevisse videatur) ratione, nimis fortasse multa: sed pro argumenti quod præsens calamitas suppeditat ubertate & copia, nimis certè pauca dicta sunt. Verùm & decòri & meæ quoque imbecillitatis ratio habenda fuit, & nimia illa, qua sum antea in eodem ferè argumento usus, reprimenda luxuries. Hoc autem, candide lector, qualecunque est, a quo animo accipies, & si qua hic aut minùs propriè & eleganter dicta, aut non satis continuè & venustò contexta (qualia esse multa fateor) te offendent, ea vel commodè transferendi difficultati, vel argumenti generi, vel meæ potius imbecillitati tribues: atque huic in tuam gratiam suscepto labori, meòq; in publicam utilitatem studio gratulareris. E Museo nostro 4 Augusti 1591. Sedan.



DE DUPLICI DIPLO-
MATE PONTIFICIO, QUOD
BULLAM VOCANT, ORNATIS-
simi cuiusdam viri carmen.


T*V* qui bullato duplici ceu fulmine Francos
Insanus terras, nec te cœlestia terrent
Fulmina, quæ exitiū præsens tibi, Papa, minatur,
Ecquid agis? Furia te agitant. Te perditte perdis,
Et proprio iugulas gladio, dum fana profanas,
Sacratasque tuum ad nutum vis claudier ades
Cœlorum, ut portas. Petri est hoc clavibus uti
(Si placet id superis.) unde hac tua tãta potestas
Devotis divūm & regum interdicare sacra?
At quis cordatus te fulmineo ore boantem
Sfondratū iam ferre queat? quid tamen si Bulla es,
Verè homo peccati? cum Bullis teque tuisque,
Atq; tuo (quis iã timeat?) cū fulmine, terras (tet.
Quo quatis, Altitonās detrusū ad Tartara mit-
Pro duplici ergo tuo Diploma hoc accipe simplex:
At duplo & maior te mox tua pœna sequetur.

Rarò antecedentem scelestum
Deservit pœna pede claudo. Horat,

IN BULLAM GREGORII
SFONDRATI.

V*T* Pelago insurgit mox tempestate coorta
Bulla recens, tumidis & levis extat aquis:
Flucti-

*Fluctibus illudit, plenoque audentior orbe
 Enatat, & variis disilit illa modis.
 Mox ruit & praeceps propenso ad littora fluctu,
 Confracta in spumas naufraga tota fluit.
 E spumis rursus tenuis vanescit in auras,
 Et qua dum orta est, deficit ipsa die.
 Hæc tua sic nostris nuper Sfondrate superstat,
 Ingruit, insultat Bulla proterva malis.
 Huc illuc pavidum in vulgus diffusa pererrat
 More suo, atque animos concutit illa leves.
 Protinus at sacro correpta furore senatus,
 Devota est diris impia Bulla suis.
 Scissa minutatim, pedibus calcata, repente
 Omnibus hæc Bulla est fabula facta locis.
 Fabula quinetiam in ventos peritura recessit,
 Sic bullas idem casus & ortus habet.
 Et tu hæc Dive vocas tua fulmina? tu hisce mo-
 His cogi Francos in tua vota iubes? (neri
 Scilicet hæc fortes metuent ludibria Franci,
 Subscribent monitis in sua damna tuis.
 Gallia quæ toties hæc plumbea tela retudit,
 Victrix devictas mox dabit ipsa manus.
 Ergo age Sfondrata cum Bulla, Bulla Gregori
 Cumque hæc Bullarum pagina tota crepet.
 Sint procul à Francis Bulla lenitasq; timorque,
 Sit tua bullatis Bulla timenda tuis.*



PIUM CONSILIUM

SUPER PAPÆ SFONDRATI
 DICTI GREGORII DECIMI QUARTI

*Monitorialibus, ut vocant, Bullis, & Excommu-
 nicationis atque interdicti in Gallie regem, Ec-
 clesiam, & regnum minis, è Francorum maio-
 rum nostrorum exemplis in rebus
 iisdem repetitum.*



U ANQUAM & tempus
 & hostium actiones, ipso-
 rum consilia ita patefe-
 cerunt atque illustra-
 runt, ut nullum iam arti-
 ficium religionisque pretextus obftet,
 quo minus aperte omnes videant illos
 eò tantum spectare, ut hoc regnum ad
 Hispanos transferant, nosque univer-
 sos ad miserrimam servitutem redi-
 gant: sperandumq; sit, novum istum
 Pontificiarum Bullarum conatum ni-
 hil maius quàm antea effecturum: Ego
 tamen veris ac fidelibus Gallis operæ
 me pretium facturū putavi, si eos hac
 tantilla historiarum collectione non-
 nihil

nihil iuvarem, maiorumq; nostrorum exempla iis ante oculos proponerem, ut super illis, qui de diro illo Papæ pro-
 graminate habentur, sermonibus & controversiis, eorum, qui à iusta causa stant, fidem confirmem, & eos qui ab ea defecerunt, officij sui admoneam. Nostri huiusce regni status à mille & ducentis annis ad hæc usque tempora cum suavissima & singulari libertate conseruatus est: neque id tamen sine gravissimis offensionibus & iniuriis, quibus alioqui firmissima quæq; & florētissima mundi imperia obnoxia sunt. Hîc verò nihil consultius cogitari, fieriq; utilius potest, quàm si attentè dispiciamus, quid patres nostri præstiterint, ut ab omnibus casibus & periculis, & iis maximè, quæ à Roma fatali & infesta Galliæ hoste emanarēt, & unde nobis per priscos illos Romanos primum servitutis iugum impositum esset, se fartos tectosq; tuerentur: ut id, quo nihil carius & antiquius habere conuenit, eadem prudentia & consilio, iisdemq; artibus & rationibus, qui-

bus nobis hæcenus illud conservarunt, retineamus. Verum, non omnibus historias, ex quibus perspicere hoc licet, videre contigit. Per multi interim procul dubio, (quidquid hostes sermonibus suis eructent) summo & sui in regem obsequij, &, cum suæ libertatis, tum Regiæ dignitatis ac splendoris propugnandi desiderio tenentur: qui tamen id ipsum multo alacrius procul dubio præstarent, si scrupuli quidam, qui, quum de Roma, de Papa & Religione agitur, eos adhuc malè habent, illis ex animo evellerentur. Alij, qui Urbes ab hostibus occupatas incolunt, ad sese coniuratorum perfidia distractos, rursus in pristinam concordiam, consensionemque reducendos diligentius multo incumbere, si prætextus iste, quo fascinati tandiu obtorpescunt, & quo eorum aures ab istis seditionum facibus, & regni proditoribus assidue complentur, ex illorum animis eximeretur. In hoc ergo potissimum elaborare, & ad publicam hanc causam, ad quam defendendam optimi quique, patriæque amantes viri,

virī, summo studio conspirarunt, pro virili parte aliquid etiam conferre volui. Res equidem tanti refert, ut nulla alia unquam antea magis. Agitur enim hoc ab aduersariis, ut summa & à regis auctoritate planè diversa, in hoc regno constituatur dominatio. Agitur hoc etiam, ut status mutatio fiat, quæ certè omnes regni partes secum trahat necesse est. Mortalis hominis mandatū, Dei mandato planè opponitur: unde nobis magnopere metuendū, nequid hīc offendamus, quod extremam regno perniciem adferat, nisi maturè nobis præcaveamus. Id sanè ad nostros omnium animos excitandos, & ad curam de libertate saluteq; nostra seriò habendam plurimū valere debet. Quam quidem ad rem ut adjumenti aliquid hominibus nostris adferā, ego eorum, quæ in hoc aliquando regno in ejusmodi casibus cōtigerunt, historias lectoribus ante oculos fideliter cōstituam, atq; edisseram quò se modo majores nostri gesserint, quum Papæ sua fulmina hoc cōsilio immiserunt,

ut nostris regibus, eorumq; potestati
subjectis sacrorum communione in-
terdicerent. Quoniã verò nobis hinc
constabit, priscos illos germanosque
Gallos ejusmodi consiliis nefariisque
molitionibus fortissimè semper resti-
tisse, atq; Papam ipsum, ipsiusq; Bullas
Romam amandas, cùm tantã illius,
quam in se usurpare conabatur, tyran-
nidem ferre nō possent: Secundo hu-
jus libelli capite rationes, quæ eos ad
id impulerunt, & quid nobis quoq; in
iis observandum sit, pertractabo. De-
niq; omnia ad eam rem, quæ hodie in
controversia & contentione versatur,
acommodabo&referam, doceboque,
ad id, quod Deus iubet, præstandum,
atq; ad regni decus & dignitatem unà
cum libertate nostra conservandam,
nullū usquam præsentius præstantius-
que remedium dari posse, quàm si
eodem planè, quo illi, & ani-
mo & fide simus.

PRIMA PARS;

Historiarum quarundam, in quibus de Paparum Bullis & excommunicationibus agitur, Epitome.

BREVITATIS, quam mihi in hoc scripto proposui, ratio non fert, ut quidquid in veterum monumentis de Paparum adversus reges nostros regnumque nostrum contentionibus extat, id colligam: hoc mihi jam satis esse videtur, si ea de re tria, aut ad summum quatuor maximè insignia è multis exempla proponam. Quotiescunque enim hæc quæstio in controversiam vocari cœpit, toties & eodẽ prorsus modo disceptata fuit. Cum igitur Papæ principem ubique locum & auctoritatem tenere, atque principum & principatuum, imperiorumq; universè & cum summo jure in rebus humanis æquè ac divinis dominos esse in animum suum induxissent: tardius aliquanto in Gallicis regibus, quàm in Germanis Imperatoribus & aliis Monarchis conatus viresq; suas exprõpse-

runt. Nam ab initio regum nostrorū
ope atq; opera in rem suam usi sunt, at-
que Pipinum, deinde Carolum ma-
gnum, eorumq; successores ad Princi-
patum suum cōstituendum in Italiam
arcessiverunt. Tunc verò summum in
principes nostros honorem, summi-
sionē & obsequium tum oratione, tū
vultu gestūq; toto præ se ferebant. At-
enim postquam illis ita usi vel potius
abusi fuissent, & omnibus aliis princi-
pibus atque ipsis adeò Germaniæ Im-
peratoribus formidolosos sese reddi-
dissent, tunc eos, quibus suam omnem
illam amplitudinem debebant, non
modò non curarunt, sed ne memine-
runt quidem: quin potius militis, qui
à rustico benignè acceptus lautēque
tractatus, in illius ædibus & fortunis
dominari tentat, more & exemplo se-
se omnino gesserunt. Primus autem,
quem hīc cōmemorabo, illorū cona-
tus adversus Philippum Augustum ex-
titit: talisq; prorsus fuit, qualis in Chro-
nicis extat, & ex Innocentii III, qui in
hac trageedia Papa erat, decretalibus
colli-

colligitur. Richardo Angliæ rege defuncto Joānes, Santerrus dictus, regnū occupavit, quod Arcturus Britānię dux jure hereditario suū esse contendebat, quòd ex majore natu ortus esset. Et quidē contētio eò progressa est, ut ipse Arcturus eorū, quæ Angliæ reges feudi nomine ab imperio Gallico citra mare tenebant, possessionem vicissim occupare aggressus sit. Quod quidē Santerrus ille animadvertens, iuriquē suo diffidens, eum crudeliter interficiendum curavit. Arcturi autē propinqui Britanniaq; procures cædis auctorem ad supplicium à Philippo Augusto depoposcerunt, cuius & Joannes Santerrus & Arcturus beneficiarij, cujusque jurisdictioni, eorum feudorum, quæ in Regno Francico possidebant, nomine obnoxii erant; præsertim cū ea cædes in ipsius regis imperio patrata esset. Rex causæ cognitionem iudiciūq; iis recusare nec potuit, nec debuit: itaque jure agi cœptum in Patriciorū Franciæ curia adversus Joannem, dieſque illi dicta est, ad quam se ipse in ju-

dicio sisteret. Quod cum recusasset, auditis testibus, causâ tandem dirempta & ad extremû perducta, regio procuratore palam postulâte, reus ob desertos vadimonii dies damnatus, & suis prædiis ac ditione omni, cujus patronum & vindicem regē habebat, multatus est, iis omnibus fisco adjudicatis. Hoc decretum factû anno 1202. Rex ex eo decreto ducatus Aquitanix & Nortmannix, aliaq; ipsius Santerri clientelaria prædia in suam ditionem ac potestatem redegit: qua in re Deum sibi adversus multos, qui contrà niterentur, valde propitium habuit. Hic, Joannes suis rebus ita se exutum, ac omni & jure & viribus, quibus tale Patri- ciorum decretum convelleret, destitutum videns, ad Papam, cujus fulmina & excommunicationes potentissimis quibusque Monarchis terrori tunc erant, confugiendum sibi putavit. Papa Innocentius III accuratè, ut debuit, quàm iusta illa causâ esset, necne, quantamq; nomini suo infamix notam inureret, si & parricidam illum

receptaret, & legibus eriperet, expendere nihil quidquam pensi habuit: sed occasionem oblatam arripere, & in rem suam convertere maluit. Joannes siquidem cum venerabatur, illius se clientem profitebatur, ex fœdere tum suum illi regnum mancipabat; subditosque suos tributarios facturum, tum Angliam illi beneficiariam & feudatariam habiturum se pollicebatur. Magna verò hæc erat potestatis Pontificiæ amplificatio, qua ad Angliam & Hyberniam usque, Romani olim Imperii fines, ea protenderetur. Papa etiam vehementer lætabatur, datam hinc sibi occasionem esse, per quam & regem & regnum illius adoriretur. Sic enim, cum primum regi ediceret, ut quod in suam ditionem transtulerat, id Joanni redderet: atq; ad id sancendum, excommunicationis, quæ tantam vim adversus Imperatores ipsos jam habuerant, minas adderet, illum præ metu & sua in illam sedem observantia, imperio suo pariturum, indeque præclarum scilicet regum Gallia & regni to-

tius sub Paparum potestate & auctoritate constituti, argumentum fore sperabat. Ergo Pontificia illa sanctitas Joannis causam tuendam suscipit, suosque ad regem legatos cum his mandatis mittit, ut arma quamprimum ponat, & quidquid ex decreti auctoritate usurpaverat, Joanni restituat: excommunicationem, totiusque regni interdictionem comminatus, nisi morem imperanti sibi gereret. At prudens & cordatus rex ejusmodi comminationibus nihil territus, magnam sapientissimorum virorum, quos consuleret, multitudinem convocavit. Res ab iis tota excutienda ac definienda in medium adducitur, atque hinc quidem, quid, quantumque officii Papæ deberetur, illinc vero quanti momenti decretum illud esset, quanta causæ æquitas, quæ denique regis auctoritas, maturè dispicitur. Ea re diligenter considerata & perpensa, conjunctis animis & sententiis, datur tandem hoc regi consilium, ut spre-
tis omnibus Papæ mandatis & minis, illi minimè obtemperet, atque ad fu-
turum

turum concilium provocet. dictū, factum. Papa verò ægerrimè omniū ferens se adeò sperni, principemq; tantæ audaciæ usquam reperiri, qui jugū suum, & sacrae sedi obsequium recusare auderet, furore pro suo more abreptus, literas, quæ etiam nunc extant, ad Gallia Clerum misit, speciosis quidem nominibus valde insignes, sed quæ verè ad eum contra Regem concitandum, populūq; seditionibus illius operâ & artibus distrahendū, atque à sua in regem fide & officio avertendum spectarent. Quid plura? omnium finitimorum principum, & Othonis Imperatoris maximè factionem ad se trahit, quacunque ratione sibi conciliat, & Gallia regnum à se proscriptum ad prædam iis proponit. Illorum omnium copiis post paulo in unum coactis, regnum Gallicū in maximo sanè discrimine versabatur. Nilominus tamen rex magno semper fortique animo fuit, omnesque & Papæ & factionum furores, causæ suæ bonitate fretus, contempsit. Similiter

etiam Clerus, nobilitas, universusque
populus, quidquid Papa in ipsis regni
visceribus moliretur, à sua in regem fi-
delitate & obsequione minimùm qui-
dem avvocati unquam fuerunt. Non
est tamen quòd quisquam hinc suspi-
cetur regem non summa obedientia
tum Episcopos tum reliquos sacrorū
antistites persecutum fuisse, ut in Yf-
sambergaprima sua conjuge, quam re-
pudiaverat, satis id docuit: nam & ad-
monitionibus erga se adhibitis paruit,
& Ecclesiasticas censuras pertimuit.
Verum simulatq; auctoritas illius peti-
cœpit, compertumq; est Papæ cogita-
tiones & consilia eò pertinere, ut po-
testatem suam & imperia ad nostram
usque Galliam, quemadmodum alibi
fecerat, nō sine & regiæ amplitudinis,
& regni dignitatis, & Ecclesiæ liberta-
tis detrimento proferret: Tunc ve-
rò rex cum summo totius populi con-
sensu, nefariis Papæ consiliis suam au-
toritatē potentiamq; opposuit. Jam
ad secundam alterius Philippi histo-
riam veniamus.

PHILIPPUS cognominatus Pulcher, Philippo Augusto aliquot pòst annis successit. Eo regnāte, Romę qui-¹³⁰¹dam Papa fuit, eorum omniū, qui in ea sede unquam fuerunt, versutissimus, ambitiosissimus, statuum ac publicæ quietis perturbator infestissimus, atq; etiam furiosissimus. Ego autē de eo ita loquor, illius tēporis scriptores, & eos maximē, qui Paparum vitas posteritati prodiderūt, sequutus. Bonifacius VIII ille ipse fuit. Ille verò dolore dirūpebatur, quòd potestatis & auctoritatis tantū, quantum appetebat, in Gallia non obtineret, atq; hoc unum cis Alpes regnum Paparū ambitioni & tyrannidi resisteret. Ad id consequendum, contentionisq; faciendum initium, ex suis intimis, quo maximē uno confidebat ac nitebatur, quendā, eūmq; arrogan-tem ac inquietū, & ad res novas spiran-tem adhibuit. Atque ut turbulentum istum cum maiori dignitate & auctori-tate in Gallia cōstitueret, Tolosanū Archiepiscopatū in duo membra secuit, novūq; Episcopatū, quo illum ornaret,

Apameę, Gallię Narbonęsis urbe, creavit. Id factum regi nō admodū placuit, dissimulatū tamen fuit. Novus ille Episcopus, ut viā ad ea quę à Domino suo mandata habebat, perficienda sibi muniret, multa in vulgus de rege spargere ac disseminare cœpit, eaq; probrosa & contumeliosa, per quę odium illi conflaret, & de eo, qui meritò illi deferre-
batur, honore nō nihil delibaret: apertè palamq; dictitans, se nō in regis, sed in Papę imperio & potestate esse, ut cæteris Ecclesiasticis viris ad idem audendū exemplo esset. Historici ajunt ejusmodi sermones de industria ab Episcopo illo jactatos fuisse, ut populus adversus regem concitaretur. Ea verò tempora tunc difficillima erant: Nam ob maxima & diuturna, quę rex adversus Anglos sustinuerat, & adhuc sustinebat bella, populus gravissimo novorum tributorum onere premebatur, cogebatúrque rex alia atque alia illi subinde imponere: neq; solūm, sed Ecclesiasticorum etiam fidem atq; opem implorare, & ab iis pecunias, belli sub-

li subsidia, flagitare. Cæterum, cum rex videret Apamensem illum Episcopum in se magis ac magis indignâ intolerandâque licentia insultare, novaq; subinde moliri, quibus regni statum in Pontificis sui gratiam labefactaret: postquam diutissimè tantam insolentiam pertulit, iusto tandem dolore & rei indignitate permotus, comprehendi hominem & in vincula conjici iussit. Papa eo actō irritatus, multas magnasq; occasiones sibi ad ea quæ animo agitabat efficiunda opportunissimè datas esse tunc putavit. Primùm, populum Gallicum ob ingentia tributorum, quibus vexabatur, onera ad factiones & discidia facilè inclinaturum. Et revera magnis seditionibus & Lutetiæ & aliis aliquot in locis coortis; regii ministri aliquot trucidati tum fuerunt. Idq; pro certo habebatur (Historiæ sic produnt, atque ita in trium Ordinum cœtu propositum fuit) Papam ipsum suis consiliis & artibus hos motus concitasse, earumque cædium caput & auctore fuisse. Quod ad Cle-

rum attinet, existimabat Papa eū tanta
 sibi imponi tributa passurum nunquā,
 proindēq; eum facilè eò adducturum,
 ut à regis caussa regnique defensione
 descisceret: non intelligens videlicet,
 aut potius intelligere nolens, id in
 Gallia non esse novum nec inaudi-
 tum, præcipuè in Abbatiarū proven-
 tu, partem illius quandam in sumptus
 belli necessarios cōferri, ut monachus
 Aymonius in sua de rebus Gallorum
 gestis historia testatur. Attamen, ut
 hanc qualemq; Cleri offensionem
 augeret ac promoveret, ad hanc con-
 tentionem aggreditur & incumbit, de
 Cleri ab oneribus publicis immunita-
 te decretū facit, atq; regem, ut ab ejus-
 modi pecuniis exigēdis abstineat, ad-
 monet. De Apamensi autem Episco-
 po, facinus indignum clamat, quasi
 rex, cujus iussu factiosus ille in carcere
 asservaretur, Ecclesiæ hostis & afflictor
 esset. Nè his contentus, aliud præter-
 ea artificium comminiscitur, quo sæpe
 Pontifices adversus reges nostros usi
 sunt, ut pia salutariaq; eorum consilia
 impe-

Lib. 5. c. 34

impedirent, & eos apud suos in neglectæ aut violatæ religionis suspensionem adducerent. Etenim regi præcipit, ut transmarinam in Saracenos expeditionem suscipiat: quanquã is alioqui de Saracenis reprimendis nõ valde laboraret, qui Venetiarum & Genuæ respublicas, (pacis tempore duo præcipuæ ac firmissima Christianorum ab oriente propugnacula.) bello gravissimo inter se commisisset, eoque necessitatis adduxisset, ut Saracenos Ecclesiæ hostes sue ditionis fines propagare sinerent. Quæ quidem omnia non aliò sanè pertinebãt, quàm ut modis omnibus extremã & regi & regno ipsi perniciem compararet. Regem enim extra regni fines amandare, eique, ne pecunias ad bellum gerendum necessarias de suis exigere, interdiceret, nihil profectò aliud erat, quàm regnum omni ad sui defensionem opæ ac subsidio spoliare, & facillimam Anglis aliisque hostibus ad illud invadendum atque diripiendum, viam aperire. Rex itaque non ignorans, quantæ curæ & cõmendationi sibi esse

deberet regni à Deo suæ fidei concre-
diti conservatio: sciens præterea quid
sui sibi deberent, quæ sua etiam esset
auctoritas: statuit eorum, quæ à Papa
præscriberentur & præciperentur, ni-
hil planè sibi faciendum esse. Ibñtum
Papa furere, & per Archidiaconum
Narbonensem Bullis & mandatis in-
structum regi imperare, ut Apamen-
sem Episcopum vinculis solutum di-
mittat, nihilq; tributi de Clero exigat:
nominatim hoc illi edicere, summam
in hoc regno, etiam in rebus tempora-
libus, auctoritatē penes se esse: his nisi
rex pareat, hancq; dignitatem & jus si-
bi sponte sua concedat, diro se & exse-
crabili anathemate illum cōfigere, re-
gni jus illi abrogare, illudque sacræ se-
dis possessioni jure caduci adscribere:
eos omnes, qui Papæ summum jus in
Gallicum regnum esse negaverint, he-
reticos censere. Historici aliquot ipsa
excommunicationis verba referunt,
hæc scilicet, ut rex pronuntiaretur he-
reticus, schismaticus & Ecclesiæ ho-
stis: ideoque, ipse unà cum uxore &
libe-

liberis à sacrarum rerum piorumque virorum communione & concilio abdicatus: quæ excommunicationis formula vulgaris erat, & in Imperatores aliosq; nonnullos sæpenumero usurpari solita. Immo verò Bonifacius furorem furore, ac scelus scelere cumulans, hoc etiã addit. Nã ut sua fulmina formidabiliora & horribiliora redderet, cæterosq; principes libidinis sue ministros & actores, pro Paparum consuetudine, haberet, emisit quosdam, qui Anglos adversus regem sollicitarent, atq; regnum Alberto Romanorũ regi eo consilio tradidit, ut bello cum peteret. Interim Cardinalis Monachus in medio regno versabatur, Ecclesiasticorum coitiones factitans, ut ipsos primũ, deinde per eos populum concitaret: & quidem nonnullos jam sibi ad eam rem cõciliaverat. Gravis sanè casus regno à Papalibus istis fulminibus impendebat, si horrendũ illorum fragorem par eventus fuisset consequutus. Verũ, quid rex hĩc agit? quo animo est? Adversus effræna-

tos Papæ istius furorē celeberrimū
omnium ordinum conventum Lute-
tiæ agit, ut, quid in re tanta sibi agen-
dū esset, cognosceret. In eo autē inania
illa Bonifacii tonitrua ludibrio & con-
temptui habita, & hæc, quæ sequuntur,
capita sancita sunt: A Papa ad conciliū
provocari: Illi interim nō parendum:
Papam ipsum de omnium sententia,
hæreseos, simoniæ, homicidii, & aliorū
atrocissimorum flagitiorum crimini-
bus, quæ ipsi diluenda & expianda es-
sent, manifestò teneri: Auctoritatis re-
giæ esse, eum coercere: aurum, argen-
tum, merces Romam non ampliùs
importandas: Episcopis ab illo in jus
vocatis Romam non eundum. Quo-
niam verò Papa summam potestatem
sibi arrogaverat, ac omnia in rebus &
sacris & profanis sibi licere persuasum
esse nobis volebat: ob idque se posse
& regibus & Principibus imperare: at-
que regnum adeò Gallicum potestati
suæ subicere: quia etiam satis no-
tum & exploratum omnibus erat, do-
gmata, quæ in regno in vulgus per E-
piscō-

piscopum Apamensem & Cardinalem Monachum sparsisset, ea ipsa esse: valdeque metuerendum videbatur, ne quis in hominum cùm aliorum, tum Ecclesiasticorum maximè animis scrupulus inde adhuc resideret: omnes, qui in cœtu illo tunc aderant, cujusvis ordinis homines apud regem professi sunt, quid ea de re tota sentirent, & in iis Ecclesiastici ipsi potissimum: rege postulante, ut omnes ingenuè suam sententiam & apertè proferrent. Ibi demum cuncti nullo modo Papæ se obnoxios, nec cuiquam ulli præterquam regi subjectos esse liberè agnoverunt. Tunc rex jurejurando confirmavit se vicissim cùm suas vires omnes, tum vitam maximè ipsam pro regni libertate & jure conservando profusurum. idque (ut Chronicon ait) pro consueto more, hoc est, in eadem causa se effecturum omnia, quæ sui decessores aduersus Papas antea effecissent. Ipsa quoque nobilitas & cæteri denique omnes eodem se animo fore testificati sunt. Atque is

*Nicolaus
Gillius.*

Platina.

Parisiensium comitiorum exitus fuit :
 quorum quidem eâ fuit vis & effica-
 citas, ut monachus ille Cardinalis è re-
 gno mox profugeret. Papæ autem mi-
 nistri aliquot, qui Trecas usque perve-
 nerant, & comprehensi & ignominio-
 sè accepti fuerunt. Afferuntque Chro-
 nographi nostri cum, qui Legatus no-
 minabatur (pro eo honore quo Gallia
 Dominum ejus prosequabatur) ita ho-
 norificè habitum fuisse, ut inde phre-
 neticus evaserit. His aliud præterea &
 longè gravius accessit. Nam rex Pon-
 tifici probare volens, se illius Bullas ni-
 hili prorsus facere, eâque potentia,
 quæ longius latiusq; & efficacius, quàm
 illius, pateret, instructum esse: ducen-
 tos egregiè armatos equites Sarræ Co-
 lumnensis Itali, & Vascônis nobilis Gu-
 lielmi Nogareti Samfelicii ductu atq;
 auspiciis, in Italiam usque misit. Illi
 verò duces unâ cum suis tam præclare
 feliciterque rem gesserunt, ut Papam
 Agnaniæ deprehensum Româ capti-
 vum deportarint, ubi præ stomacho &
 ægritudine supremum diem obiit. At-
 que

que hæc historiæ hujus summa est. Verum in ea fuere insignia quædam observatuque dignissima, quæ ab historicis etiam commemorantur. In hac enim regis & Papæ contentione ultro citroque literæ missæ sunt, quarum alteræ tam insolentem ac protervam in isto Papa audaciam, impudentiam & arrogantiam arguunt, præ seque ferunt, ut id ulli vix homini credibile videretur, nisi literarum ipsarum exemplum in nostris Chronicis tum Gallicè tum Latinè eo consilio consignatum extaret, ut id omni posteritati testatū certò esset. Alteræ verò satis docet, quàm exiguam Papæ rationē prisca Galli haberent, si quando eò furoris veniret, ut aliquam in hoc regnum auctoritatem sibi assumere, & minas etiam adhibere auderet. Hæ igitur sunt Pontificis literæ.

BONIFACIUS Episcopus servus “
 fervorum Dei, Philippo Francorum “
 Regi, Deum time, & mandata ejus ob- “
 serva. Scire te volumus, quòd in spiri- “
 tualibus & temporalibus nobis subes: “

" beneficiorum & præbendarum ad te col-
 " latio nulla spectat: & si aliquorum vacan-
 " tem custodiam habeas, usufructum eo-
 " rum successoribus reserves: & si quæ
 " contulisti, collationem haberi irritam
 " decernimus, & quatinus processerit,
 " revocamus: Aliud credentes fatuos
 " reputamus. Datum Laterani quarto
 " nonas Decembris, Pontificatus nostri
 " anno sexto. Regis autem responsio
 " hæc fuit.

" PHILIPPUS, Dei gratia Francorum
 " rex, Bonifacio se gerenti pro summo
 " Pontifice, salutem modicam, siue nul-
 " lam. Sciatur tua maxima fatuitas in tem-
 " poralibus nos alicui non subesse: ali-
 " quarum Ecclesiarum & præbendarum
 " vacantem collationem ad nos iure regio
 " pertinere, & percipere fructus earum,
 " contra omnes possessores utiliter nos
 " tueri: secus autem credentes, fatuos
 " reputamus atque dementes. Datum
 " &c. Atque literarum ultro citroque
 " missarum exemplum ejusmodi fuit.
 " Narratur item aliud superbiæ & furo-
 " ris, acerrimique in Galliarum regem o-
 " dii in

dii in hoc Pontifice argumentum. Inter istas tam acerbis & pertinaces inimicitias atque concertationes, secularis lustralisque jam anni celebritas (Jubileum vocant) Romæ indicta fuit, quò infinitæ hominum multitudinis ex locis omnibus concursus factus est.

Cuspinianus in vita Alberti: Paralipo: Urspersensis.

Primo Jubilæi die, BONIFACIUS cultu Pontificio decoratus se universo illi populo spectandum dedit. Secundo autem die, habitu & splendore Imperatorio in medium processit, nudo ense, qui ante illum gestabatur, insignis & conspicuus: summæque voce, utrumque Imperium, nempe cæleste & terrenum seu temporale, suum esse pronuntiavit. Illud scilicet Evangelium hominibus ad Jubilæum profectis prædicavit. Alberti Austriaci Rodolphi filii, quam postulabat, electionem antea in Germania factam, ratam habere noluit, utpote nulla sua voluntate factam: quum præsertim utriusque gladii potestatem sibi jam vendicaret. Atq; illū Principem supplicem ad se venientem, & multa cum

indignitate se prensantem, diu suspensum & incertum tenuit: Tandem tamen electionem illius sua assensione atq; approbatione confirmavit, sed ea lege, ut ille se Romanorum pariter & Gallorum Imperatorem profiteretur. Quantum ad hæresim, cujus fuit in trium ordinum cōventu insimulatus, Docti quidam & Catholici viri dicunt illum in hoc crimen & invidiam vocatum fuisse, quòd contra Evangelii doctrinam & Apostolorum exemplum, summam istam regibus & principibus imperandi potestatem sibi arrogaret. In illius morte quædam valde insignia & notanda extiterunt: quo fit, ut ea Chronici nostri scriptores minimè sibi prætermittenda esse censuerint. Cùm enim perversis suis moribus civiũ Romanorum malevolentiam sibi conflasset, omnesq; præ odio sibi infensos & infestos esse animadverteret, Anagninã (Hernicorum in Latio urbẽ) patriam suam se recepit, tutissimum sibi apud propinquos & cives suos asylum fore arbitratus: sed spe sua falsus, ab iisq; ipsis & pro-

& proditus, & regiis equitibus traditus fuit. Hoc ille nimirū ob prava sua, quibus cives adversus regem suum concitare tentaverat, consilia, pretium tulit. Inde Romam captivus cum summo probro atque dedecore pettractus est. qui cū in sua illa Santangeli arce *Historia* inclusus esset, alvi profluvio corre- *Florētina.* ptus, in phrenesin, ut fertur, tam dirā vehementemq; incidit, ut manus proprias corroserit & devoraverit : atque in ipso mortis illius articulo, fulgura *Nicolaus* tonitruaq; plane horribilia in eadē ar- *Gillius.* ce exaudita etiam fuisse dicantur. En miserabilis quidē, sed justissimus profectō illius exitus, qui totum orbem fastu suo & tyrannide indignē calcaret, qui se arrogantissimē supra reges & Imperatores ipsos efferret, atque insolentius iactitaret manus sibi satis esse longas & amplas, quibus summam ubiq; gentium dominationē apprehenderet: qui denique, pro animi libidine dextram diris fulminibus contra reges armatam se habere dictitaret. Platina Pontificum historicus, narrata illius

" morte hæc addit. Moritur autem hoc
 " modo Bonifacius ille, qui Imperatori-
 " bus, regibus, principibus, nationibus,
 " populis terrorem potius quàm religio-
 " nem injicere conabatur, quique dare
 " regna & auferre, pellere homines ac
 " reducere pro arbitrio animi conaba-
 " tur : aurum undique conquistum,
 " plus quàm dici potest, sitiens. hæc ille.

*Historia
comitis*

Monfortii.

Haillamus

& alii.

Atque hîc nonnulli alii historici piè
 fanè & valde appositè & Papas & alios
 sacrorum antistites admonent, ut sa-
 pientiùs vitæ suæ cursum instituunt ac
 moderentur, & se intra muneris sui
 fines modestè contineant. Quas qui-
 dem admonitiones si boni illi viri au-
 dissent, non tot tantisque malis jam
 res humanæ concuterentur & afflicta-
 rentur. Papa iste omnibus scelerum &
 flagitiorum notis ita insignis fuit, & ad
 omnem posteritatem nobilitatus, ut
 in sempiternam illius memoriam Epi-
 taphium hoc scriptum fuerit. Intra-
 vit ut vulpes: regnavit ut leo: mortuus
 est ut canis. Rex, ut quidam histori-
 cus Anglus scriptis prodidit, à succes-
 fore

fore ossa illius petiit, quæ tanquam hæretici combureret. Talis fuit Paparum, qui se contra reges nostros commoverunt, & eos suis fulminibus petiverunt, status & conditio. Regis constantia & virtus, Gallorum quoque studium & fidelitas in hac tota re, quæ ad Bonifacium attinet, tam magnæ illustresque fuerunt, ut cæteri, qui sequuti sunt, Pontifices omnem quidquam amplius è Gallia extorquendi spem abjicerent: quin potius operæ se pretium facturos existimarent, si ad Gallorum causam, & rationes sese accommodarent, & iis quàm maximè gratificarentur. Porro successor illius, ex sua Cardinaliumque suorum sententia, excommunicationis à Bonifacio decretæ absolutionem ad regem ultrò misit, qui non modò non eam rogaverat, sed à Papa excommunicari ne pili quidē fecerat. Historici enim *Nicolasus Gillius.* publicis monumentis cōsignatarum reliquerūt, in absolutionis Bulla id nominatim additum fuisse, regē de ea impetranda ne verbū quidē fecisse. Pape etiā

in suis decretis agnoverunt, & confessi
sua sponte sunt Gallicum regnū Pon-
tificiæ sedis nullo modo subjectum ob-
noxiumq; esse: professiq; aperte sunt,
minimè se obstare vellet, quo minùs pe-
cunię & tributa de Ecclesiasticis exige-
rentur, per quæ regno magnitudine ac
difficultate rerum affecto afflictoque
succurreretur. Atque hæc Philippo
Pulchro regnante contigerunt. Jam ad
Caroli VI regnum veniamus.

Qui ejus temporis historias legerūt,
miserum & calamitosum, in quē Chri-
stianus orbis effrænata Paparum ambi-
tione redactus erat, statum noverunt.
Etenim toto 40 annorum spatio, & eo
ampliùs, duo, tres & aliquādo quatuor
Antipapæ eodē tempore fuerunt, qui
crudeli & exitioso bello sese peterent,
sua quisque factione instructus. inter
multa, quæ inde acciderunt mala, hoc
maximè unum erat, quòd cū plures
essent, unusquisq; rei parandæ inhi-
abat, tantum commodi sibi comparare
studens, quantum si unus duntaxat
Pontificatum quietè obtinuisset. Ad-
de quòd

de quòd ad fovendum retinendumq;
suum tam numerosum comitatum, si-
mul & eos qui à suis partibus starent,
ingentes sumptus faciebant. Quibus
cùm haud pares essent, cogebãtur sin-
guli, ubi auctoritate valerent, maximã
pecuniæ vim exigere, & sacerdotia in
eos qui se ad suam dignitatem tuendã
aggregassent, non sine maxima vitæ
perturbatione, rerumque confusione
conferre. Itaq; regnante primùm Ca-
rolo sexto, gravissimę ea de re apud re-
gem querelæ habitæ sunt, qui edictis
eo nomine à se editis, Papæ & Cardi-
nalianum quæstores è suo regno ejicie-
bat: item, ne sacerdotia ab extraneis
amplius tenerentur, sanciebat: omnes
sacerdotiorum, quæ à dictis extraneis
possidebantur, fructus sibi subjiciebat,
ac de iis pro suo arbitrio & auctoritate
constituit; & ut breviter dicam, se à Pa-
pæ obsequio prorsum segregavit, atq;
suo decreto, illius, delegatorũq; ipsius
ambitionẽ & avaritiam repressit. Be-
nedictus xrii Pontificatum iniens, se
ad hunc modum frænari, ac potentiæ

suæ fines ad regnum usq; Gallicum nõ
 proferri ægrè admodum tulit. Quam-
 obrem severitatem sibi adhibendam,
 suaq; fulmina & excommunicationes
 sibi contorquendas statuit, per quas
 sui metum incuteret, & obedientiam
 etiam ab invitis extorqueret: non satis
 secum reputans, & ut videtur planè
 oblitus, quàm malè talia decessorum
 suorum tela à nostris excepta Gallis
 antea fuissent. Ea Bulla tum regis, tum
 regii sanguinis Principum, tum eo-
 rum etiam omnium, qui cum rege fa-
 ciebant, excommunicationem com-
 plectebatur. Gallia omnis ea indigni-
 tate vehementissimè accensa est, sed
 Parisiensis potissimùm Academia, cu-
 jus præcipua mēbra scholæ Theologi-
 cæ erant. Ea cum rege de tanta contu-
 melia cōquesta est, additis ad eā ulci-
 scendā, multis, iisq; præclaris admoni-
 tionibus. quibus rex permotus, cele-
 bertimum in senatu Parisiensi in eam
 rem conventum egit. Atq; ex gravissi-
 mis Academiae suæ cohortationibus,
 de senatus universi sententia edictum
 fecit,

fecit, quo alia omnia superiora adversus Paparū ambitionem, avaritiam, & usurpationes cōfirmabat, cū ad Ecclesiæ Gallicanæ jura, immunitates, & privilegia tutanda, tū ad personæ regis, regniq; totius auctoritatē dignitatēq; cōservandam: Benedicti illius fulminationum, quibus conciliū opponebatur, nulla prorsus ratione habita. Atq; ii omnes, qui hujus regni constitutiones Paparū Bullis postponerent, læsæ Majestatis crimine palā damnati sunt. Decretum etiam, Papis non licere in posterum ullum Galliæ tributum imponere, nisi regis voluntate, quantum quidē ipsi pro necessitatis ratione, cōcedere placeret. Quoniam verò Papa in nonnullos, quos sibi adversarios esse intelligebat, excōmunicationis telum vibraverat, rex liberos solutosq; declaravit. Hoc edictum in maxima clarissimorum virorum frequentia gravissimè sanctissimēq; compositū fuit, atq; in publicis sēnatus tabulis adhuc aservatur. Hæc autē acta sunt anno Christi 1406. Postea Martinus V. Papa, 1406

iratus pennas sibi adeò incisas esse, infenso & infesto erga nos animo hanc concertationem vetustis illis excommunicationis & interdicti artibus renovare tentavit: sed in ea re nihilo sanè plus, quàm cæteri, promovit. In his autem Paparum controversiis multa intervenerunt perquàm sanè memorabilia, quæ silentio præterire nō possumus. Theodoricus Nihemius historiographus suæ historiæ inseruit Aca-
Tractat. 6.
6. 17. demix Parisiensis super ea re Epistolam, petitionis supplicis instar exaratā, cujus hæc summa est & scopus. Papæ literas Bullæ nomine conscriptas, quia contumeliosæ, seditiosæ, imposturis, dolis, & fraudibus refertę sunt, regiámque Majestatem lædunt, dilacerandas & in frustra secandas esse: quin etiam, si rei gravitas ita postulet, ad graviorē & probrosiorem ultionem (quæ cæteris exemplo & terrori sit) progrediendum. Et quidem id re postea cōprobatum constat. Nam in publicis tabulis scriptum hoc reperitur, factum fuisse in hanc sententiam senatusconsultum,

tum, ut qui has bullas attulerant, ex Luparæ carceribus per lictores extracti, & ad Palatii gradus plaustro stercoreario vecti, ad undecimam horam dimisso senatu, coram sacrorum Antistitibus & Clero se sisterent; illicq; honoraria pœna multarentur, tædâ gestâtes, lineis vestibus, ac mitris chartaceis, cum imaginibus horribili specie depictis, & Papæ ipsius insignibus inverso & præpostero modo effectis, per ludibrium induti: atq; hoc habitu cultuq; insignes, extremis plaustris alligarentur, & à carnificibus ad omnia Lutetiæ compita per summū dedecus & ignominiam pertraherentur. Id quod articulatim & singillatim effectū fuit. Boni isti viri Papæ ministri Bulligeri, Hispani fuisse dicuntur. Sed hos jam cum suis Bullis missos faciamus. In regio autem adversus Benedictum XIII edicto longa est apposita narratio, pias & graves admonitiones ac postulationes à multis Antistitibus & Parisiensi Academia factas continens. quæ quidem admonitiones ut tunc plurimum va-

luerunt, sic nunc etiam plurimum apud nos valere debet, quò perniciosissimis Paparum consiliis & molitionibus forti constantiq; animo intercedamus ac renitamur. Eæ autè huc maximè spectabant, ut regē docerent, nisi immensa Paparum avaritia, & iniquissimæ vexationes diligenter & seriò reprimerentur, Ecclesiæ perniciem & interitū impendēre : regum hoc esse officii & auctoritatis, ad Ecclesiæ propugnationem ac tutelam, etiam contra Papas ipsos, quum eam divexant & opprimunt, toto animo & studio omni incumbere. Edisserunt præterea, quot casus, quantaq; vulnera publici status dignitatem maneant, si regnum tyrannicæ Paparum oppressioni subjiciatur. hōc se fundamento verè niti, sese à Papa sejungere, nō esse ab Ecclesia se sejungere : sed, quod à D. Paulo 2 Thessal. 3. præcipitur, id ipsum præstare, cū ait, Seducite vos ab omni fratre, qui inordinatè se gerit. Ecclesiam à Christo redemptam, & in libertatem vindictam fuisse : itaque nullo modo rationi esse

esse consentaneum, eam unius, à quo ita diripiatur & vexetur, servituti ac libidini dedi. Atque ad id confirmandum § cap. Epistolæ ad Galatas proferunt, In libertate, qua Christus nos liberavit, nobis esse perstandum, &c. Immo quum de Papa loquuntur, tyrannidis nomen usurpant. Docent quantopere indignum sit & intolerandum, eum, quem ex Evangelii doctrina servum & ministrum esse decuit, dominum se ad diripiendam Ecclesiam profiteri. Quin addunt, si Paparum vivendi ratio cum eâ Prophetarum & Apostolorum conferatur, eos nihil minùs quàm bonos pastores reperiri: vel potius, malorum pastorum notas (quibus à Prophetis & Apostolis describuntur, & à bonis pastoribus discernuntur) in iis & multas & certas apertissimè animadverti. Postulant ut constitutiones de se ab iis separandis antea factæ, firmè inviolatèq; servètur. Qui verò Papatū causam propugnabant, persuadere populo conabantur, si rex edicto sanciret ne Papæ obtem-

peraretur, id esse bellum cum Ecclesia gerere, & ab ea deficere: Deo autem potius quàm hominibus parendū esse. Quasi verò Regia edicta, Dei mandatis repugnaret. Academia Parisiensis, & cæteri, qui ad causam regis defendendam se cum illa conjunxerant, respondent nulli id impedimento regi esse debere: hæc vana esse verba, & inanem adulatorum, qui volunt Papas omnibus legibus solutos, omnisque commendationis expertes ac securos cum omni impunitate ac licentia vivere, garrulitatem: proferentes etiam ejus rei probandæ ergò, quandam Pelagii II sententiã, quæ in decretalibus extat, eum nō esse persecutorem, qui peccatum aut jam admissum punit, aut ne admittatur, impedit. Quinetiam aliud & longè majus addunt, potestatem, qua Ecclesia Romana exultat & triumphat, meram esse Cōstantini donationem, de qua etiam hodie à Constantinopolitana & Alexandrina Ecclesia & aliis contenditur, eaque, quantumvis reclamant, falsa esse demonstratur.

In

In summa, quicunq; sua potestate abutuntur, eâ abdicandos esse. Et de iis quidem, de quibus Academia & Galliarum antistites apud regem contra Papam differuerant, hæcenus: Ea; ipsa fuerunt edicti regii in Paparum molitiones & vexationes fundamenta.

P O S T R E M O, quartam historiam eorû quæ Ludovici XII tempore anno ante hunc vixdum centesimo hæc de re contigerunt, superioribus etiam addam. Si ullus alius princeps à Paparum furoribus tutus esse debuit, hunc certè ex omnibus præcipuè unum esse decuit, cum ob suas præclaras virtutes, tum quod Julium II multis magnisq; à se affectum beneficiis, quibus vix unquam par gratia haberi poterat, sibi plurimum devinxisset, multis illi restitutis urbibus, quæ à Bentivolis & Venetis occupatæ, & ex ipsius ditione usurpatæ fuissent. At enim ambitionis quidam æstus, qui superiorû Paparû animos corripuerat planèq; corruperat, & serie quadam fatali ad successores transibat, in Julium istum invasit, omnemq;

illi mentem & rationem ita eripuit, ut ingrato supra modum fidemq; animo, inauditaq; perfidia suas omnes vires in eum converterit, illum si potuisset, totumq; ipsius regnū oppressurus. Nempe stomachabatur, gravissimēq; ferebat res nostras in Italia prosperè succedere, nosque, à quibus suorum decessorum iniquæ usurpationes, immoderateq; actiones repressę fuissent, nimium sibi vicinos atq; imminētes habere. Ex finitimis igitur ferè omnibus civitatibus factionē sibi conciliat, atq; Hispaniam, Angliam, Germaniam, & Helvetios contra regem Galliamq; ad arma concitat. Cumq; suorum furorum ac fulminationum ministros ita comparasset, Bullam adversus regem promulgat, cum excommunicat, jus illi regni abrogat, prædæq; objicit. Guicciardinus ait regem istā Bulla expressè nominatum, atq; hæreseos & schismatis reum, pœnisq; obnoxium: Regnū denique ipsum proscriptum, & primis occupantibus expositum fuisse. Idem quoq; in Navarrę regē Henrici 4 regis, qui hodie regnat, proavū est ausus: idq;

Lib. II.

non aliã ob causam, quàm quòd à regis causã staret; cui ob id regnũ suum ereptum, & ab Hispano ex bellæ istius Bullæ auctoritate ereptũ fuit. Qui de iis tẽporibus scribunt, hoc etiã addunt, (atq; sic à Patribus nostris accepimus) Julium istũ libellos aliquot per Italiam disseminasse, quibus populi contra nationẽ nostrã sollicitarentur: neq; id solum, sed dedisse etiã ei peccatorũ veniã, qui Gallũ aliquẽ interficeret: adeò ut horribilis nostrorũ cedes per universam Italiã facta fuerit. Rex Ludovicus ita furiosè petitus, ad consuetum apud majores suos remedium sese cõvertit; ordinum conventum agit & cõsultat; atq; ex optimorum & graviss. virorum cõsilio celebre episcoporũ & aliorum regni sui Ecclesiasticorum concilium Turonibus cõvocat. Ibi quid sibi agendum esset, ab eo consiliũ petit. Nõ fuit illic decretum, ut rex Papę fasces summitteret, morẽmq; gereret: sed contrà hæc sunt præcipua illius cõciliĩ capita; ut hodie publicis monimẽtis cõsignata extãt: Auctoritatẽ summãq; potestatẽ

unius regis in hoc regno esse: Ecclesiasticos, universumq; populum nulli alii præterquam illi, jurejurando obsequioque obstrictos esse: Regem nulla prorsus in re Papæ obnoxium esse, bonaq; fide & recta cōscientia se ab illo abstrahere; atq; adeò bellū cum illo ad suam dignitatem auctoritatemq; retinendā gerere posse. Hæc in concilio illo Turonensi adversus Papæ Bullas decreta sunt: iis planè congruenter, quæ in superioribus ætatibus eadem de re constituta semper fuissent. Stupendū profectò atq; horrendum est, ea quæ de hujus Papæ vāsanā à clarissimis, qui tunc temporis vivebant, viris (ut à Budæo, Philippo Decio, & aliis permultis) scripta fuerunt, legere, & quot quantisq; detrimentis & cladibus Gallicum regnum furiosus iste Julius affecerit & affligerit, ex illis cognoscere. Illius fanè consilia & actiones bonos valde offenderunt, ideòq; multis in locis concilium habitum fuit, ut jure in illum ageretur, sed concilium illud ubiq; locorū armis dissolvebat, ut justis, ac suo furo-

*lib. 5. de
Assè.*

furori debitis, quas vitare non poterat, poënis sese eriperet. Ille copiis instructus, Româ egrediens, adversus regem progressurus, lorica armatus, licet natus jam grâdis, infinita hominû multitudine illic spectandi gratia circumstante, summa voce contendens, cûm sancti Petri claves, ait, nihil nobis prosint, gladium jam distingamus: & continuo projectis in Tyberim clavibus, nudum ensẽ manu arreptû toti populo militariter ostentabat. Jam mihi lector considera, quo spiritu ducti & afflati Põtifices illi fuerint, qui sua fulmina in reges nostros cõtorserunt. Sed nihil suis illis furoribus cõsequuti sunt: Dei nimirum beneficio, qui tanta fortitudine & prudentia tum Reges nostros, tum eorum populos majores nostros roboravit, ut summa animi firmitate, & constantia contra illorum minas & fulminationes parati & armati de jure suo nihil illis remiserint. Possem & alia exempla proponere: sed quatuor hisce contentus addere plura supersedebo, cûm in eadem re eodem

*Arnaldus
Ferronus.*

prorsus modo adversus eosdē semper majores nostri usi fuerint. Atq; hoc cōsilio sanctaq; cōstantia regni nostri status cōtra furiosos istos conservatus est, quē pculdubio in miserrimā servitutē redegissent, & sexcēties etiā pessundissent, ut in aliis idē effecerūt, nisi fortissimē illorū conatib. obviā itū fuisset.

Hujus constantiæ exempla effecerunt, ut alia quædā Imperia Paparum excōmunicationibus fortissimē etiam restiterint; unde & optimē sibi suisque rationibus consultū senserunt. Veneti, quòd statū Ferrariēsem in fidē ac tutelā suam recepissent, à Clemēte v sacris interdicti, Ecclesię hostes indicti, & hostiū libidini ac p̄dæ expositi, otioso nihilominus & securo animo fuerūt. Florentini eorumq; fœderati sæpenumero à Papis petiti, armata illis manu obviā ierunt, à quibus alioqui oppressi absorptiq; omnino fuissent. Deinde aliquot pōst annis Germani, qui superioribus sæculis illorū cupiditati nimio plus quā expediret, nec sine suo magno malo indulserāt; itémq; aliæ quædā nationes
 è pro-

ē pfundo quasi somno, quo sopitæ diu fuerāt, excitatæ sese tandē collegerūt, & ad Paparū conatus retundendos mirabili omnium ordinū consensu & studio conspirarunt. Sed hæc & alia ejusmodi, quę in historiis passim occurrūt, exempla, aliis diligētius exquirenda, & uberi⁹ ac fusius tractāda jam relinquā, his unis, quæ domestica nobis & familiaria sunt, cōtentus: cū nullæ usquā extare nationes videātur, quæ majorē in regendis cōservandisq; suis imperiis religionē, prudentiam ac fortitudinē, q̃ majores nostri adhibuerint: & quæ melius quā illi, quid nobis hoc graviss. Reip. tēpore præstandū sit, docere possint. Ut igitur paucis rē complectar, ex supra dictis p̃spiciū est Papas hisce excommunicationum telis nō nunc demū reges nostros vexasse, funestis bellis petiisse, factiones in eos cōcitasse, & modis artibusq; omnibus, per quas hujus regni stat⁹ cōvelleretur, religionis nomine tentasse. Ad hæc reges nostros & hereticos & schismaticos & Ecclesiæ hostes de industria, ut ipsis odiū cōflarēt,

appellare consueviffe. Præterea omniũ harum rerum cauſſas, præter invidiam & indignationem, nullas alias fuiſſe, ex eo duntaxat natas, quòd nõ poſſent & leges & reges in hoc regno cū ſummo imperio aut conſtituere, aut de medio tollere: ac res tum divinas tum humanas pro animi libidine diſpenſare, ut aliis in locis citra controverſiam factitabant. At viciffim majores noſtros ea ſemper animi magnitudine fuiſſe, ut eorum minis territi nunquam fuerint, ſed contrà ſtrenuiſſimè ac fortiſſimè iis ſeq; ſuáſq; vires objecerint, ad ſuam auctoritatem regniq; totius dignitatẽ ac libertatem tuendam. Neque vel temere ea, quæ Papæ de ſuis Principibus deblaterarent, credidiſſe, vel ob iſtas fallaciſſimè confictas & impactas hæreſeos & excommunicationis calumnias, eos amare & colere deſtituiſſe: ſed potiùs eorum dignitatem adverſus Papas modis omnibus, & armis adeò ipsis, quandocunque id à ſe peterent, ſuáque opera ad cauſſam ita juſtam propugnandam uti vellent, ſe tutaturos

ros corā iis professos fuisse: haud metuentes adversante hīc & repugnante cōscientia quidquam admittere, cū nec auctoritate nec ratione ulla eò unquam adduci potuerint, ut agnoscerent & faterentur se ullorum aliorum quàm regum suorum potestati subiectos esse. Similiter reges summā semper animi fortitudinem præ se tulisse, non vultu tantū & verbis significando, sed re quoq; ipsā declarando, se de auctoritate, quam à Deo haberent, nihil omnino nec quidquā nec ulli cuiquam, cujuscunq; fortis aut dignitatis esset, velle unquam concedere. Hæc autem posthac nobis accuratius & singillatim explicanda, atq; rationū omnium, quæ illos pro suis legibus & regibus adversus Papas vindicandis movere potuerunt, pōdera diligēter examinanda erunt, ut quid & quatenus illorum exempla nos juuare possint, planiūs & pleniūs intelligere possimus.

DE INTERDICTO
SECUNDA PARS.

Compendiaria caussarum, quæ Gallos maiores nostros adversus Paparum excommunicationes concitarint, & quæ in eorum constantia nobis observanda sint, disquisitio.

ET si nihil aliud quàm simplicē eorum, quæ à Majoribus nostris adversus Papas facta sunt, narrationem, unamq; illorū in proposito susceptoq; cōsilio constantiā, animiq; firmitatem haberemus, cū præsertim tā multa, tam certa, tamq; cōstantia exēpla sint: attamen id unū ad incitādā eorum cōsilia&actiones nobis satis esse deberet. Sed ubi de exemplis agitur, illa demū verè certōq; sequimur, quorū rationes cognosci possunt. Ad intelligēdas autē majorum nostrorū rationes valde quiddē illud optabile fuisset, ut præter eorū decreta, graves quoq; illorū sermones sapientesq; admonitiones jam extarēt, in celeberrimis illis & solēnibus comitiis adhiberi solitæ, quæ regū nostrorū, quoties à Papa indignè acciperentur, imperio & auctoritate fiebant. Veruntamen

tamen satis adhuc inde nobis constabit, nos posse citra ullum scrupulū ac dubitationē, illorum exempla imitari. Illud enim primò magnū est, certò nos scire, quum ita se Papis opponebant, nulla id contēptæ religionis aut minùs sinceri in eā amoris culpā factum, cū omniū religiosissimos & pientissimos fuisse inter omnes constet: unde reges nostri hoc elogio dignati ornatique sunt, ut Christianissimi cognominarentur. Nisi verò p̄spectū hoc planēq; cognitū habuissent, quidquid adversus Papas dicerēt & facerēt, id sese salvā omnino ac integra cōscientia dicere & facere, ab eo quidē certè linguas, manus, animosq; ipsos abstinuissent, cū cæteri multi, tū ii potissimū, qui multis magnisq; virtutū ornamentis & existimatione pietatis maximè floruerūt, antea cōmemorati reges: quorū unus per excellentiā Augustus, alter carissimus, & (ut alter Titus ille Imperator) populi deliciæ, alius item populi parens dicti sunt. Præterea quod ea de re factum est, non præcipiti quadam iracundia,

aut solo regum, quibus aliquando peccare contingit, quum nullo adhibito consilio aliquid suscipiunt, motu factum est: sed hæc omnia contra Papas decreta, lentè & legitimè facta sunt, sumpto nimirum ad rem maturo judicio deliberandam & conconquendam spatio, atque habitis solennibus & celeberrimis senatus, trium ordinum, & aliquando conciliorum conventibus. Credendumque profectò, in tanto tam clarorum sanctorumque virorum conventu omnia prudenter ac religiosè consultata, constitutaque fuisse. Quare si sapientum virorum sententiæ, si clarissimorum Theologorum & Jurisconsultorum responsa, si placita senatus, si comitiorum decisiones, & conciliorum decreta legis vim interdum obtinent: eadem certè dignitas & auctoritas hisce cōtra Papas decretis debetur, cū in iis hæc simul omnia concurrerint, observataque fuerint. Atq; hoc persuasum omnino habere debemus, nec rationes, nec fundamenta illis ad ea cōstituenda ac suscipien-

cipienda defuisse. Uti etiam explicatu
 non admodum difficile nobis erit, cu-
 jusmodi rationes illę fuerint, si eas pau-
 lō diligentius exquirere velimus. Ex
 Caroli VI decreto videre est priscos
 illos patres sacras scripturas usurpasse,
 ex iisq; præcipua causę tuendę fun-
 damenta deprompsisse: nec nō in ve-
 terum doctorum scriptis, Ecclesięque
 historiis legendis diligenter versatos
 fuisse. In illis omnibus, in quibus hæ
 patrum adversus Papas controversiæ
 maximè viguerunt, ætatibus, clarissimi
 floruerunt Theologi, ut imprimis S.
 Bernardus, maximi item Jurisconsulti
 eruditissimis & luculentissimis scriptis
 insignes: in quibus etiamnum extant
 querelę adversus Papas, illis, quę in
 hujus regni comitiis fierent, omnino
 similes: ubi etiam quę in ipsis comitiis
 de Paparum potestate, de eorum ex-
 communicationibus, molitionibus, &
 improbitate ac perversitate habeban-
 tur cōtroversiæ, manifestò cernuntur:
 additis etiam ibidem illis ipsis, quibus
 decreta sua confirmabant, rationibus.

Et quanquam libri illi nō extarēt, uni-
cæ Parisiensis Academiæ in Caroli V I
edicto admonitiones ad hujus rei fidē
cū habēdam, tum faciendā sātis esse;
atq; firmissimas, & quæ nulla omnino
vi labefactari cōvelliq; possint; rationes
nobis abūdē suggerere possunt. Quin-
etiam his ego subjiciam nostra memo-
ria, Henrici II. tempore, edictum ad-
versus parvas, quas vulgò dicūt, Datas;
Paparumq; abusus factū fuisse: ad quod
libellus quidam cōmentarii vice cōti-
nuò accessit, in quo solenniū adversus
Papas actuū rationes & argumenta, re-
novata atq; in memoriā revocata fue-
runt. Quem quidē librū bonorū sa-
pientumq; virorū judicio cōprobatum
fuisse, ex regis privilegio illi affixo pa-
tet: ut illinc omnibus cōstaret, nō esse
rem in hoc regno & novā & inauditā;
cum Papis cōtendere, & cur id fieret;
dēmōstrare. Quæ cum ita sint, hoc me-
ritò nec inviti fateri debemus; majores
nostros in hac regū adversus Papas cō-
certatione sapientissimè sanctissimēq;
se gessisse, eorumq; decreta nobis etiā-
num

num esse debere sacrosancta, & piè inviolatèq; servanda Ecclesiæ & regni libertatis axiomata: nec rectiùs quidquã & consultiùs à nobis hîc fieri posse, quàm si ea diligenter cū animis nostris cōsideremus ac perpendamus, ut quid cōsiliî in hac tanta deliberatione dubitationèque capiendum nobis sit, ex iis hauriamus.

PRIMUM inde intelligimus Majo-
res nostros ab eo longissimè abfuisse
ut crederent, quod Paparum adulato-
res dictitāt, ut novos scilicet Deos no-
bis fingāt, Papas errare nō posse. Nam
si hoc credidissent, iis nunquam repu-
gnassēt, nunquã de illorū injuriis expo-
stulassent, nunquã eos accusassent, in
judiciūq; adduxissent, nūquam etiã
ab iniquis eorum sententiis ad cōcilia
provocassēt. Atqui ea omnia, ut ex su-
perioribus historiis liquet, faciūt, nec
quidquã verentur eos hæreseos, Simo-
niæ, ambitionis, tyrannidis, furoris &
cædis insimulare: nã ea omnia crimi-
na in actis illis & regum edictis cōme-
morātur. Nempe majoribus nostris id

perspectum & compertum satis superque erat, Papas homines esse: quin integerrimos quosq; & innocentissimos homines, etsi à scelere liberati sint, aliqua tamen erroris humani culpa teneri. Non ignorabant D. Petrum ipsum clarissimum Ecclesiæ lumen, turpissimè lapsum fuisse, alios item præstantissimos Dei servos non leviter aliquando peccasse: Denique optimis & perfectissimis quibusq; delictum suum ultro agnoscendum, prædicandum, confitendum esse. Verum ut tam liberè de Papis loquerentur, hoc faciebat, quòd totam eorum vitam intus & in cute exploratam haberent: & scirent quali fuissent ingenio moribusq; præditi, quicumque à sæculis aliquot Romanæ sedi præfuissent, quid item probatissimi & spectatissimi viri de iis scripsissent: quid hoc etiam regnum de iis antea expertum esset, & quotidie adhuc experiretur. Per multorum ex iis impietatem, blasphemias & hæreses, quas Parisiensi Academiæ necesse aliquando fuit, & lingua, & manu oppugnare, probè
nove-

noverant: nec eorundē avaritiam, Simoniam, fraudes, denique hominum cædes, & bellorum clades per quas ad Papatū grassarentur, ignorabant. Sciebant & quales essent Bonifacii, Benedicti, & Julii per quos funestis bellis vexarentur. Quantamcunq; igitur istius sedis rationem Majores nostri haberent, videbant nihilominus in Papas, ut & in reliquos homines, cadere ut peccare possint, nec in facto tantum & moribus, sed in doctrina etiam. Summæ enim, quam sibi arrogat, nobisq; persuadere conatur, potestatis caput, partem quandam doctrinæ esse. in qua pii illi patres Papas ipsos & falli & alios etiam fallere rectè censuerunt, nec ei unquam se subdicere voluerunt.

Cùm igitur Majores nostri persuasum hoc planè haberent, Papas errare posse, non imprudentes religionis, & rerum omnium ignari incautiq; fuerunt, ut quicquid Româ emanaret, id delectu omni ac discrimine remoto, acciperent: quicquid etiam sibi à Papis imperaretur, id ipsum sine ulla du-

bitatione perficerent: tanquã ea, quæ
 simplici & rerum imperito vulgo in-
 jicitur, opinione imbuti essent, qua
 putatur, aliter quàm Papæ præcipiunt
 ac præscribunt, agere, id esse Deo ipsi
 repugnare, & piaculum quoddam ad-
 mittere. Si patres nostri in ea opinione
 fuissent, nunquam illis certè hoc in-
 mentem venisset, ut Paparum aucto-
 ritatem defugerent. At eam illic ad-
 hibere prudentiam, quæ toties tanto-
 que opere in sacris scripturis cõmen-
 datur: nempe ut probentur Spiritus,
 quod bonum est retineatur, à malo ab-
 stineatur: eam autem probandi ratio-
 nem ex sacris scripturis petunt. Quod
 ne dubitare possimus, Parisiensis A-
 cademiæ admonitio, in qua toties scri-
 pturæ sacræ testimonia citantur, ma-
 gno ad id nobis argumento erit. Illud
 quidem certè perspicuum est Ecclesiæ
 fundamenta Romæ ab initio præclare
 jacta fuisse, Romanorumque fidem &
 pietatem in toto terrarum orbe con-
 stanti fama atq; omnium sermone tum
 privatim tum publicè celebratam fuis-
 se, ut D. Paulus suo id testimonio cõ-

1 Joan. 4.
 1 Theff. 5
 Ephes. 5.

Roman. 1.

probat. Illic etiam Episcopi satis longa annorum serie & docti & pii floruerunt. Unde factum est, ut illius Ecclesiæ præ cæteris omnibus maxima & dignitas & existimatio esset, ac sententiæ & cōsilia quæ ab ea prodirent, præcipuū apud omnes locum haberent: quanquā interim reliquis Ecclesiis pro suo jure liceret, quæ minimè in illa probarēt, ea reprehendere ac respuere: ut ex Irenæi adversus Victorē Episcopū de Orientalium Ecclesiarū excōmunicatione, & aliorū etiam exēplis liquidò constat. Verū enim vero probi illi Episcopi paucos admodū aut potius nullos sui similes successores Romæ habuerunt: ex quo potissimū tempore & otiū & opes auctæ sunt: Ea enim avaritiā, ambitionem, & alias corruptelas secū invexerūt. Majores nostros id minimè fugiebat, Papaq; non eodē jam Spiritu, quo primos, regi. Ideoq; ut prudētes cordatq; viri, quandocunq; mādata aliquot à Papis afferebantur, & rerum & virorum delectum prudenter habebant, nec unquam, ut eorum libidini per

omnia obsequerentur, adduci poterant. In quo quidem præclarissimum sui in vindicanda religione & libertate imitandi exemplum nobis reliquerunt, nisi planè falli velimus.

Quoniã verò Papæ & minas & vim ad terrendum ulciscendumq; adhibebant, quodocunq; id fieret, ad concilia confugere solebant. Id quod salva conscientia fide se facere, jure ipso rei que veritate freti confidebant: quippe qui certò scirent, ut cæteros, sic & Papas ipsos celsuris & correctionibus Ecclesiasticis æquè obnoxios esse: Contrà quàm ipsorum adultores, cliētesque mercenarii sentire videntur, dum contendunt nulli prorsus homini licere in eorum mores factaq; inquirere. At patres nostri didicerant, ubi quid peccatum est, ibi reprehensionis locum esse. Meminerantq; D. Petrum ipsum à D. Paulo reprehensum fuisse, hancq; esse libertatem vere Christianam, ut citra fastidium & arrogantiam summi quique viri infimorum etiam admonitionibus & animadversionib⁹ sese submittant.

mittant. reprehensionē verò repudiare, odiosissimam esse & pænē Diabolicam hominis sua ipsius culpa exitium sibi arcessentis arrogātiā. Patres igitur nostri libertate verè Gallica Papis intercedebant, & patronam illam religionis, ac vindicem libertatis provocationem ad reprimēdos illorum conatus in remedium adhibebāt: hinc satis probantes se Paparum auctoritati non tantum tribuere, quantum isti ab illis non ita pridem nati & alti Jesuitæ, dum Papas supra concilia esse, persuadere nobis conātur. Prisci illi patres suos Jesuitis lōgè saniores & sanctiores Theologos habebant, Gersonem, Occamū, & alios Parisiensis Academiae doctores, qui contrā semper senserunt & statuerunt. Tenebāt illud memoria, quid Ecclesiastici doctores ea de re animo tenuissent: quid sancta concilia constituisent & factitassent, & ea maximè, quæ postrema fuerunt, Constantiense & Basiliense. Sibi etiā ante oculos ponebant modestiam illam à Paparum nostrorum arrogātia valde abhorren-

tem, D. Petri summisionem, quum se Ecclesię Hierosolymitanę sistere non recusavit, sui ad Gentiles aditus rationem redditurus. Uti etiam D. Paulus ac Barnabas primo Hierosolymorum concilio interfuerunt, suę profectio-
 nis causas edocturi: etiam si tamen Apostoli, & longè maioribus quàm Romani Pontifices prærogativis instructi essent. Nostri ergo Maiores quum à Paparum decretis ad concilia appel-
 labant, sapientiores multò melioresq; Theologi erant iis, qui Papis nostris, quales hodie cognitos habemus, sum-
 mam & omni exceptione maiorem, nulla norma, nullaq; mēsurā circum-
 scriptam auctoritatem attribuūt, idq; cum tanta licentia & impunitate, ut
 eam summa vitę perturbatio, horri-
 bilisque rerum omnium, nisi maturè occurratur, & provideatur, confusio
 inde sequutura videatur. Interim nos
 suo exemplo docent, provocationis
 auxilium in Ecclesia aduersus omnem
 cuiuslibet, ipsorum etiam Paparū vim
 & violentiam locum habere debere.

In eiusmodi autem provocationis ad concilium intercessione hæc erat Patrum nostrorum mens, hic animus, ut, quicquid Papæ suis Bullis & fulminibus tentarent, veluti Regum quos illi hæreticos, schismaticos & Ecclesiæ hostes pronunciabant, condemnationem, itemque excommunicationes & interdictiones tantisper differrent, dum concilium haberetur, illis interim, quasi nunquã indictæ fuissent, irritis & nullo numero habitis. Papæ hîc fremebant, æstuq; furoris abrepti, sua fulmina eò vehementius & amentius quàm antea ciaculabantur, omniq; ope & opera, atque armis adeò ipsis cõtendebant, ut concilij convocationem impedirent: ut Iulius contra Ludovicum 12. Verum Patres nostri constanter in sententia perstabant, non ignorantes quod sit provocationis beneficium & vis: nec metuebãt nequid sibi Paparum tonitrua, & bullæ nocerent.

Prisci ille patres nos ex his docent, quis sit Iudex habendus in concilio,

quum eò provocatū est, & quid in Ecclesia cōtroversis fieri debeat, quum in concilio eæ disceptantur. Papa Judicis munus, summumq; decernendi jus & auctoritatem in eo sibi arrogat. Sed patrum nostrorum longè alia fuit opinio. Nam provocando ad cōcilium sic statuebant, Papas illic causæ disceptationi interfuturos tanquam reos, non autem ut Judices præfuturos: atq; latas à se præcipiti amentia sententias, à quibus jure provocatum fuerat, rescindi & infirmari passuros. Deinde accusaturi Papas, hoc animo & consilio eos accusabant, ut judicio de objectis criminibus se purgaturi adessent: veluti cū Bonifacius de hæresi, Simonia & homicidio postulabatur. Patres igitur nostri summam potestatem & auctoritatem conciliis tribuebant, ac censebant, quæcunq; controversiæ adversus quoscunque & principes Christianos maximè intervenire, eas illic non autem in Romano consistorio dirimendas esse.

Hoc etiam in his patrum institutis obser-

observandum videtur, eos nimirum, contra Paparum vexationes eorumq; excommunicationes cùm vix possent concilia citò convocari; aut Papæ suis artibus, ne convocarentur, impedi-
rent, querelis & supplicationibus apud reges suos & magistratus adhibitis, si-
bi suisq; rebus providisse: quippe qui scirent atq; proponerent regū aucto-
ritatis esse & muneris, eorum, quos in sua potestate habent, curam defensionemq;
adversus iniqua Paparum imperia & decreta suscipere. Ita sanè Caroli VI temporibus factum fuit. Nam
is audita Antistitum & Academiae Parisiensis querimonia & postulatione,
rem in cōcilium & iudicium adduxit. Clerum, quem Papa tyrannicis vexa-
tionibus oppressum tenuerat, servitu-
te liberavit, atq; excōmunicationum fulmina adversus quosdam contortas,
bruta irritaque de communi sententia pronunciavit. Nec verò id aggredie-
bantur, cives quidem, ut ad principem suum adversus Papam confugerent:
Rex verò & senatus, ut iis de rebus sta-

tuerent (quantum vis ipsi Papæ illius procuratores, qui sibi fecerant in eo consilio audientiam, intercederent): non hoc inquam suscipiebant, quin planè cognitum haberent id sibi rectè ac iustè licere. Viri Academiæ primarij firmissimis argumētis in sua illa admonitione id Regi confirmarunt. At nobis procul dubio habèdum est Regi penitus persuasum fuisse, se à Deo in regiæ dignitatis culmen ideo evectum, ut omnem ordinis perturbationem, rerumq; motum in Ecclesia inhiberet, & eorum, qui suæ sortis immemores & alienæ dignitatis cōtemptores in suis se finibus non continerent, insolescerent, aliosque vexarent, audaciam ambitionemque reprimeret, idque decessorum suorum optimorum principum, qui sine dubio illi ad imitandum proponebantur, auctoritate & exemplo. Et quidem Rex ipse in eo decreto palam profitetur, agnoscere se suarum esse partium, eos, quos suæ potestati & imperio subiectos haberet, ab omni vexatione (Pa-

pam

pam innuens) eripere, ejusque rei culpam sibi coram Deo præstandam esse. Atque ex Theodosii, Honorii, Constantini, Caroli magni, & aliorum, qui eo se modo habuerāt similitudine, hujus sui officii exemplum capit. Quod cæteris etiam ætatibus documento sit, si quid fortè illorum, qui summam totius Ecclesiæ administrationem sibi assumunt, ambitione & avaritia fieret, quod civibus damnū regnoq; ipsi fraudem ac detrimentum adferret, ut populus quidem ad regem velut sacram quandam anchoram, sæviente tempestate se reciperet: Rex verò pro summa sua auctoritate, & officii quoq; sui ratione, illam à suorū cervicibus averteret, viderétq; ne quid regnum detrimenti caperet.

Reges penitus persuasi eam provinciam ad se pertinere, eam quoque gesserunt & ornarunt, non gladio tantum & armis, quum res ita tulit, usque adeò sanè ut Alpes ipsos transcenderint, Pappas comprehensuri & culturi: sed etiam, & præcipuè quidem solenni regni sui

Antistitum & Theologorum cōvocatione, concilia provincialia Gallicæ gentis, ex regum auctoritate, priusquã a Papis vexarentur, semper habita fuerant, ut optimus ordo in regni Ecclesiis constitutus integer conservaretur, & necessitatibus difficultatibusq; rerum quæ intervenirent, consuleretur: At ex quo Papæ illis infesti esse, regniq; tranquillitatem interpellare cœperūt, tunc ea propugnaculo & præsidio illis adversus Papas fuerunt, ad concilii usque Turonensis, quod ab ætate nostra propius abest, tempora.

Quod ad primatum, summumque imperium & potestatem attinet, quam Papæ ubiq; locorum sibi sumunt, nullis nec circumscripti, nec circumscribendi finibus & rationibus, ut velint & sua etiam opinione possint regibus principibusq; imperare, & de Imperiis pro animi libidine statuere, operæ est pretium audire, quid majores nostri in frequentibus illis Theologorum & Jurisconsultorum confessibus senserint. Necdum de hoc regno speciatim loquor,

quor, in quo Papæ hanc nunquam auctoritatem obtinuerunt: sed generatim, an ita habendum sit de illa quam sibi arrogāt dignitate, & quæ ipsis fuit, semper, & adhuc est in suis bullis mandatorum, sententiarum, damnationū, & excommunicationum, quas Romā quocunque emittunt, fundamentum. Nunquam verò patres nostri hoc ita habere illis assensu sunt. Nam si de temporali potestate agitur, qua sibi fas esse putant, omnibus humanis imperiis cum summo jure imperare, principesque, reges & Imperatores omnes sibi subdicere, illud quidem erat, quod suis literis & Bullis ad reges nostros missis continebatur: ut in literis Bonifacii nobis suprā cōstitit. Verū illud quoque ipsum est, de quo præcipuè cōtentio adversus eos suscepta erat, atq; adeo id ipsum, quod in Bonifacio, qui se impudentius quàm cæteri & arrogantius de sua illa in omnes & omnia auctoritate jactabat, hæreseos crimen esse dicebatur. Nostri patres probè hoc tenebant, Ecclesiam non esse Imperiū hu-

manum, humanis aliis imperiis simile, sed omnino spirituale: atq; inter Mundi regna, & animarum gubernationē, inter principes ac dominos, qui orbis regnorū potiuntur, & eos qui spiritalē regnum obtinent, cācellos quasi quosdam, manifestumq; discrimen nominatim interjectum esse. Quanquam alioqui, quū res quo decet ordine modoq; reguntur ac temperantur, mirifica est hujus cum illo consensus & convenientia: sed non eo pacto tamen ut inordinata debeat esse & indistincta utriusq; potestas & administratio. Patres nostri in his disputationibus apertè probarunt se in sacris scripturis longè melius versatos esse, quàm Papas qui pro libris sceptrā armaque tractarent. Legerant in Evāgelio quod Christus de seipso (quantum quidē ad hanc distinctionem attinet) & verbo & exemplo docuerat. Ille unus verè est Ecclesiæ caput, summusq; omnium Episcopus & pastor. Apostoli hisce cum duntaxat, nec ullū præterea quenquā alium nominibus ornant. Pater omnē illi

*Ephes. 1 &
5. & c. 1 Pet.
5. Mat. 28
Joan. 17.*

illi in cœlo terraque potestatem dedit. Si in ullo alio terrena potestas cum spiritali Ecclesiæ moderatione cōjungi debuit, in illo id potissimum fieri decuit. At, quandiu hîc vitam degit, diligenter sibi cavit ne quidquam admitteret, quo vel minimam suscipiendæ rerum humanarum administrationis suspicionem hominum animis afferre videretur. Illius adversarii quid ea de re sentiret, tentare voluerunt: sed ut eam, quam modò posuimus, distinctionem confirmaret, respondit, reddendum esse Cæsari, quod esset Cæsaris, & Deo, quod Dei. Hinc de- *Matt. 22.* clarans nō eò se è cœlo in terras venisse ut ex imperiis humanis vel minimum usurparet, & ex Imperatorum auctoritate quidquā detraheret. Quin & coram Pilato rogatus de eo quod ipsi per calumniam malitiamq; impositum fuerat, respondit regnum suum non esse *Joan. 18.* ex hoc Mundo. Iidem patres nostri qui id in Evangelio legerant, sic ratiocinabantur ac verè concludebant, Jesum Christū Episcoporū principem,

aliis, quos Ecclesię suę curatione & administratione ornaret, sui exemplum proponere voluisse: cūq; gubernationem hanc civilē ne minimū quidem attingere voluisset, ut ex ea quidquam interverteret, ad seq; transferret, absurdum & ab omni ratione alienum fore, si alii id cogitarent & susciperent. Ita enim eos admonebat, sicut me misit pater, ita & ego mitto vos. Idem alias quoq; admonitiones legerant, quibus apud suos Apostolos usus fuerat, ut perniciosę isti ambitioni occurreret, quam in mentes hominum irrepturam, & in media sua Ecclesia brevi grassaturam certò prævidebat, quum diceret: Reges gentium dominantur eis: Vos autem non ita estote. Meminerant præterea D. Petrum & alios Apostolos talem vitæ statum ad mortem usq; obtinuisse, atq; Domini Ecclesias ædificare, easque Evangelii prædicatione regere, solum & simplicissimum illorum munus fuisse: ita ut ne minimum quidem affectatæ terrenæ administrationis indicium & vestigium

gium in iis unquam apparuerit. Nec eos præteribat quàm studiosè Apostoli ipsi, Ecclesiarum seniores & pastores, (quibus generaliter omnibus dignitate longè superiores erant) hortarètur, ut sub summo illo, quem nominant, pastore, nempe Iesu Christo, greges ^{1 Pet. 5.} suæ fidei cōcreditos diligenter pasce- ^{2 Timot. 2.} rent: ab omni dominatione abstinerent, & rerum humanarum cura nullo modo se implicarent. Hæc omnia patres illi in sacris scripturis videbant: ad quæ præterea adjungebant, qualis fuisset perpetuus totius veteris Ecclesiæ usus: quomodo etiam cùm alii omnes, tum Romani Episcopi, Imperatores & alios Monarchas pro suis summis principibus semper habuissent, & eo, quo modestos & summissos clientes decet, nomine, observantia & honore appellassent: habebant etiam in suorum regum historiis, post comparatā sibi in Italia inde à Carolo Magno dominationem, ea quæ de Paparum erga principes officiis, summissionibus, & obsequiis nominatim & luculèter scri-

pta essent, & quæ hodie etiamnum in illis extant. Habebant deinde in manibus clarissimorum doctorum, nec veterum duntaxat, sed æqualium etiam suorum libros, querelarum de misero per Paparum ambitionem Ecclesiæ statu plenos: Itemq; accusationum & testificationum adversus tam insolentem & antea inauditam affectatæ, & usurpari iam cœptæ in Imperatores & principes dominationis libidinē. Nec desiderabant tam multas, tamq; eruditæ præstantissimorum jurisconsultorum aduersus hanc rerum confusio- nem disputationes: præclaras etiam simul & severas & graves D. Bernardi ad Eugenium Papam contra effrænata[m] eiusmodi superbiam admonitiones, in hanc maximè sententiam: Papas, si D. Petri exēplum imitari vel- lent, nō ita se pro imperatorib⁹ gesturos, sed sarculum potius & pedū ad excolendū Ecclesiæ agrum, & illius gregem gubernandū gestaturos, non autem regum insigne, sceptrum & Diadema. Nusquam hoc reperiri proba-
rique

*b. de con-
der. 2, 4.*

siq; posse eos tantam potestatem ullo
 iure habere: cum eam nec à D. Petro
 adepti essent, quoniam D. Petrus da-
 re iis non poterat quod nunquam ipse
 habuisset: nec à Christo etiam ipso,
 cum iis ne Principum more domina-
 rentur, prohibuisset. D. Petrum hac
 regia magnificentia nunquam sibi
 gloriam & dignitatem quæsiisse, sed
 unica eorum, quæ sibi Christus tan-
 topere commendasset; meditatione,
 cum dixit, Pasce oves meas. Eccle-
 siam Romanam posse quidem cæte-
 rarum Ecclesiarum matrem dici, at non
 Dominam: Ipsumque Eugenium, u-
 num ex Episcopis, non reliquorum ve-
 rò Dominum. Patres, inquam, nostri
 hæc omnia non solum ex Divi Bernar-
 di scriptis didicerant, sed ex ipsius etiã
 ore exceperant. Ad hæc intelligebant,
 probra quæ alii præter hunc doctores
 scriberent adversus istos Romanen-
 ses Episcopos, qui se verbo tenus ser-
 vos servorum dicebant; cum super-
 bissimum reipsa in omnes domina-
 tum usurparent: quos nihil pudebat

fese adorandos præbere, cùm id D. Petrus à Cornelio tentatum respuisset. Hæc ergo omnia, ut etiam miseræ & confusiones, itemq; bella & cædes ex Paparum ambitione enatæ bonos illos patres, quibus ante oculos hæc omnia tum in Imperio tum in Italiaversabantur, plurimùm commovebant: Eosdem quoque gravissimè afficiebāt tam multæ quā plurimis ac fortissimis Imperatoribus, qui pro religione Christiana tuenda ac propaganda tam strenuè feliciterq; adversus infideles trās-marinos dimicaverant, illatæ ab iis indignitates & contumeliæ, eæq; tantæ, ut modò illum imperio privarēt, hunc modò pedibus suis calcarent, filios etiam in patres aliquando sollicitarent: interim dum Satrapæ isti de Imperii rationibus pro arbitrio statuunt, & suis excommunicationibus horribiles civium erga reges suos seditiones, & turbas ubiq; gentium conflant. Hæc cernuntur in Ivonis Carnutensis Episcopi literis ad Papas scriptis, quibus eos liberè admonebat, rebelliones & disci-

dia,

ia, illorum consiliis & artibus in Germania excitata, omnium Gallorum animos adversus illos inflammare. Patres igitur nostri cum tam multa suis oculis atq; animis subjicerent, nunquam adduci potuerunt, ut superba ista terrenæ potestatis nomina in Papis proarent, ferendaq; putaret, sed ea semper uno ore condemnarunt: Regibus, Nobilitate, & Clero, universoq; populo pia conspiratione ad hoc consentientibus, ut viribus suis omnibus impedirent, ne istæ regnorum & Imperiorum pestes, nec ista etiam monstruosissima de summa Paparum potestate doctrina quam Philippus Augustus, errorem regnis perniciosissimum appellabat) in regnum hoc sese insinuaret, & radices ingeret. Eoque factum est, ut ille ipse Philippus Augustus Innocentii Papæ imperia & minas omnino sperneret: ut Philippus alter tam durè & asperè tum Bonifacium, tum illius ministros acciperet, quasi rem Marte aperto hostiliterq; agens: ut etiam recenti hominum memoria, cum Ludouicus 12. in Turonē-

*Matthæus
Paris in
sua histo-
ria.*

si concilio, ab illis omnibus, qui eò cō-
venerant, quæsiisset, an se pro suo prin-
cipe haberent, omnes, & Ecclesiastici
imprimis (maxima Julii excommuni-
cationum contemptione) uno animo
atq; una voce agnoscere se & profiteri
illum suum & summum & solum prin-
cipem esse responderēt. Eiusmodi au-
tem actis & sexcentis aliis, quæ in no-
stris historiis, edictis regiis, & curiæ cō-
mentariis cōsignata extant, patres no-
stri satis testificati sunt summam illam,
quam Papæ in regna & imperia sibi ar-
rogarent, potestatem, intolerabilem
sibi & meram etiam tyrannidem vi-
deri.

Quod autem ad alterum gradū, &
quam spirituales aut Ecclesiasticas
vocant, potestatem, attinet, patres no-
stri nihilo plus in hoc regno Papis con-
cesserunt, tanquam eos aliquid in eo
juris ex verbo divino habere putarent.
Non quòd reges nostri Episcoporum
& pastorum, (quorū officium est doce-
re in Ecclesia & sacramēta administra-
re) partes agere unquā voluerint. No-
verant

verant utriusque administrationis discrimen, illudque nihil ad se pertinere. At pastores ad officium oinni ratione cogere: hominum conventus ad res Ecclesiasticas consultandas necessarios celebrare: electiones usitata & legitima via constitutas confirmare: qui quantique sacerdotiorum proventus essent, exquirere: ne iis abuterentur providere: eos in Ecclesiæ & regni utilitatem dispensare: correctionem & pœnas in suis edictis ad ea quæ perperam admitterentur coercenda decretas adhibere, hæc verò nostri reges sui juris & muneris nec cuiusquam alius esse semper crediderunt: illiusque nunquam subditi immo ne ipsi quidē Ecclesiastici in eo jure unquam reclamaverunt. Contentiones quidem ea de re à Papis sæpe factæ sunt: sed potestas tamen & autoritas penes reges nostros integra remansit. Si quid Papæ hinc obtinuerunt, id certè precario & bona regum nostrorum, quandiu ipsis visum est, venia potius quàm ullo prorsus jure obtinuerunt. Negotiorum Ecclesiasti-

corum (in eo quidem quod ad homines pertinet, atq; hodie etiã usurpatur) auctoritas, in ministeriorum collatione & confirmatione, in fructuũ sacerdotaliũ dispensatione, & in Comitiorum Ecclesiasticorum convocatione sita est. Ex publicis autem monumentis harum rerum omnium jus apud reges nostros fuisse manifestum est. Ac de electionibus quidem id ita se habere regum nostrorum in eam rem latæ leges & constitutiones satis probant. Papæ quidem super eam & Romæ, & in Italia, & ubicunq; plus poterāt, suas leges habebant. At hoc regnũ iis nunquam obstrictum teneri voluit, sed suã atq; avitam libertatem constanter retinuit, per quam suas separatim de jure suffragiorum constitutiones, regia auctoritate cõfirmatas haberet. Id quod adhuc in comitiorum Aurelianensiuũ actis testatum videmus. Est verò aliud etiam, & longè majus. Publicis enim literarum monimentis celebratum est, postquam reges nostri ditionis suę terminos Romam usq; protulissent, ac suis in Lom-

in Lombardos & Exarchas victoriis Italiam sibi subjecissent, necesse fuisse, ut Romanorum Episcoporum electiones regum ipsorum auctoritate fieret, nec prius rata haberentur, quam illorum testimonio & suffragio comprobata essent. Ludovicus Pius Francorum rex & Imperator non paucos ad eum modum in Papatum ascivit, & in iis Gregorium 4, qui non antè id munus suscipere & obire voluit, quam de illius voluntate sibi constaret. Ac Platina illum nominatim ait Paparum electionem consultò confirmasse, ne Imperii iura amitteret. De sacerdotiorum autem reditu, idem sentiendum. Regum enim nostrorum edicta in eo legis vim & auctoritatem obtinent, non autem Paparum decreta. Si quid aliquando in Papis tolerabatur, aut si quid solleriter & callidè per nostram incuriam usurpabatur, simulatq; fraus manifestè apprehendebatur, adhibebatur cōtinuò remedium: Paparum ministri & actores è regno statim exigebantur; usurpationes præcidebantur, & de illis

agendum esset, ex Regum, ordinum,
& senatus auctoritate ac sententia cō-
stituebatur, tanquam de re, quæ in hu-
iusce regni potestate planè sita esset, nō
autem in Paparum arbitrio & libidine.
Historiæ nostræ eiusmodi exemplis
refertæ sunt: præcipuè à trecentis aut
quadringentis annis, quum Papæ plus
auctoritatis cōsequuti, suas omnes vi-
res & opes eò conferebant, ut manus
& cupiditatem suam ad nostros usque
fines extenderent. Is fuit Benedi-
cti x i i regnante Carolo v i in sua illa
contentione scopus. Verùm docuit
Academia hanc meram esse Paparum
usurpationem, quæ coercenda erat: ac
totam sacerdotiorum rationem ab v-
no rege pendere, ut ex eius auctorida-
te, quatenus regni utilitas postulare
videretur, de illis omnino constitue-
retur. Papas enim divitiarum satis su-
perque habere: si verò casu aliquo Ro-
mana Ecclesiā ad inopiā redigeretur,
illi; Galliæ opibus non nihil opus esse
videretur, tum quidem opem ei ferē-
dam, sed his tamen conditionibus: Id
maturo

maturo iudicio faciendū, modo adhibito, iusta & gravi de causa, sine fraude ac damno, dummodo Papę culpā nihil secus admissum antea fuisset: atq; tantisper dum urgeret necessitas: idq; voluntario regū, patronorū, & aliorū Antistitum consensu ac liberalitate, nulloq; cæterarū Ecclesiarū detrimento, Ut breviter dicam, id caritatis & humanitatis beneficium fore, premente rerū angustia: hoc est, non esse hinc pontificibus putādum ullo sibi jure licere pecunias ex hoc regno jure exigere.

Hæc fuit Antistitū & Academiæ Parisiensis ad Carolum regem VI pro tribunali sedentem, postulatio. Academia autē doctis tunc viris instructa, & cum ea Antistites nunquam id aggressi fuissent, nisi rem & accuratè perpendifsent, in justissimam esse pernovissent: ut re vera & à rege & ab universo senatu, & magna bonorum, qui eò cōvenerant, multitudine talis dicta atq; habita fuit. Nec verò hæc actio contra ipsum duntaxat Benedictum instituta erat: Nā Romana Ecclesia nominatur:

postulabatur, ut constitutio in posteritatis gratiam ea de re fieret. Generalia sunt quæ ab iis ponuntur fundamenta: Atq; senatusconsultum, ordinem qui perpetuò à posteris observari debeat, continet. Et verò nihil novum tunc constituebatur, cùm id ipsum edictis nominatim ea de re factis tum ab aliis, tum ab ipso etiam D. Ludovico jampridem constitutū fuisset. Extat enim pragmatica illius sanctio, in qua hoc caput his omnino perscriptū
 » verbis legitur: Exactiones & onera gravia
 » via pecuniarum per curiam Romanā
 » Ecclesiis regni nostri imposita (quibus
 » regnum miserabiliter depauperatum
 » extitit) seu etiam imponenda levare &
 » colligi nullatenus volumus, nisi dumtaxat
 » pro rationabili, pia, & urgentissima,
 » vel inevitabili necessitate, ac de
 » expresso & consentaneo consensu nostro,
 » & ipsius Ecclesiæ regni nostri.
 Hæc ille. Quòd si ex voluntate regia illiusq; animi sententia, inde certè cōsequitur nihil rationis aut juris fuisse, quo & rex & Gallicana Ecclesia obstri-
 & ite-

ſi tenerentur id Papis largiri. Plures
 paginae adhibendae eſſent & complen-
 dae, ſi omnia edicta & decreta, quae in
 eam rem facta reperiuntur, hinc per-
 ſcribere vellemus, quibus omnibus
 eſt conſtitutum, Papas nullo jure ex
 hujus regni ſacerdotiis quidquam at-
 tingere, & ad ſe transferre poſſe. Ex iis
 tamen ſiquid utilitatis ad eos pervenit,
 id regum noſtrorum beneficio, libe-
 ralitatiq; ſoli, non alii cuiquam, aut rei,
 aut homini acceptum ferendum. Unde
 factum, ut quoties illis ad noſtra uſque
 tempora ita placuerit, edictis caverint,
 ne iſtius ſacerdotiorum nundinatio-
 nis ergo, Romam iretur, pecuniave ul-
 la eò exportaretur. Quantum verò ad
 conventus Eccleſiaſticos & concilia
 pertinet, quae gravioris quidem pon-
 deris ſunt, & in quibus clariuſ apparet,
 cui nam ſumma auctoritas praecipue
 debeatur: ex Merovingiorum, & Car-
 linorum maximè, & poſteriorum etiam
 aliquot regnis certò probari poteſt,
 non Papas ſed reges ſua ipſorum aucto-
 ritate ea convocaffe, & quae in iis con-

stituta fuissent, confirmasse. Extant adhuc cōcilia in quibus id cernitur. Multis post annis reges in suo jure retinendo negligentiores, plura Papis tribuerunt, parum animo cernentes quæ inde consequutura essent: usque adeò, ut quosdam Paparum nomine interdū acciperent, qui conciliis cum summa auctoritate præessent. At cū à Carolo Calvo fortè id factum fuisset, Papæ obsequēdi gratia, universus regni Clerus ei rei, ut testatur Aimonius, intercessit. Postea verò cū aliter regibus nostris visum est, aliter sanè & contra Papas etiam ipsos ad retinendam pristinam libertatem factitatum quoque fuit. Ex his igitur planè cōstat, in omnibus petitę Ecclesiasticę partibus, quod ad homines quidem attinet, auctoritatem summā penes reges nostros fuisse: eosque nihil hīc suscepisse aut gessisse, quàm quod sibi à Deo commissum, mandatumq; esset, Christianiq; Imperatores ante se fecissent, itemq; prisci illi piiq; sub lege reges, qui eā ipsam potestatem suā auctoritate & prudentia moder-

lib. 5. c. 35

derabantur: ut Academia, ppositis Joē
& aliorū exēplis Carolū VI admonebat.

Quæ igitur hæcenus à nobis cōme-
morata sunt, satis docēt Papas summa,
quam jam sibi tribuunt, auctoritate in
Galliis nostris præditos minimè fuisse:
duosque illos ita terribiles, quos nobis
proferunt gladios, non potuisse unquā
in hujusce regni fines, ut in eo auctori-
tatis aliquid obtinerent, penetrare,
quemadmodū Papæ superbissimè ho-
die jactant. Reges nostri de rebus & a-
ctis Ecclesiasticis cognoscebāt, in quib-
us majori quàm quotidiana eorum,
qui Ecclesiis præerāt, auctoritate opus
esset: ad eos cōfugiebatur, etiā adver-
sus Paparū abusus: Apud eos Papæ ac-
cusabantur: ab iis edicta manabant, per
quæ rectè omnia cōstituerētur. Si quā-
do in comitiis, quæ à regibus extra or-
dinem advocabantur: aut in suprema
curia Paparum procuratores & mini-
stri existerent (ut in eo cōventu quem
Carolus VI habuit) illic assisteabant, nō
decreta quidem ipsi in tribunali factu-
ri, sed ut rei in subelliis causam acturi,

& quæ haberent postulata in publico
proposituri: quæ eaten⁹ admittebātur,
quatenus regi curi⁹q; pbarētur. Si qua
rescripta, mandatave à Papis in hoc re-
gnum emissā sunt, ea certè hæctenus
recepta non fuerunt (quum præsertim
aliqua universalis nota in iis observa-
batur) nisi regis codicilli, illius volun-
tatis & assensionis testes, iis apponerē-
tur, eaq; in supremo senatu lecta exa-
minataque fuissent. Eadem quoq; ra-
tio est legatorum, qui à pontificibus in
Galliam mittuntur: quibus nullus est
ad eam neq; accessus, neq; aditus, ne-
que auctoritas nisi cum bona regis
venia, quam suo diplomate testatam
fecerit: nisi etiam hæc declaratione
scripto expressa, quæcunque facient,
ea omnia ex illius cōcessione & aucto-
ritate, & pro temporis, quod ipse præ-
stituerit ratione, se facturos: nisi de-
nique eorum potestate in ipso senatu
probata, qui eam pro suo jure mode-
ratur & coangustat, quatenus id opti-
mum factu judicat, ut videat nequid
regis, regniq; jura & prærogativas, atq;
Eccle-

Ecclesiæ Gallicanæ libertatem infringat. Hæc omnia quamplurimis actis confirmata in publicis curiæ monimentis videntur. Deniq; Franciæ regnum libertatis semper Imperium fuit, non obedientiæ ut nostri Jurisconsulti dicunt, hoc est nullo modo Paparum potestati & libidini obnoxium. Nec est quod Paparum patroni nobis persuadere conentur, hanc totam auctoritatem Paparum privilegio tantum & indulgentiâ, penes reges nostros fuisse. Ea enim jure, quod sibi à Deo datum esse sciebant, nititur, etiam in causâ adversus Papas contestatione, si fortè illam vel digito attingere tentarint: ut proximis etiam annis tentarunt: Unde factum est ut reges, ordines, & Parisiensis senatus concilii Tridentini (propter quod tantæ flagitationes adhibitæ, tot contentiones factæ sunt: propter quod etiam Papæ præ stomacho & iracundia hanc tam funestam nobis calamitatem cõflarunt) promulgationi tam strenuè & constanter intercesserint. Intercessionis autem illius hæc inter alias caus-

ſa præcipua fuit, quòd ſine maxima perpetuæ regum noſtrorum authoritatis, & veteris Gallicanarum Eccleſiarum libertatis pernicie, conciliũ illud promulgari non poſſet. At è contrario Papæ niſi admodum ingrati eſſent, deberent ingenuè agnoſcere & cõfiteri, reges noſtros de ſuæ libertatis & poteſtatis jure in eorum gratiam multum ſæperemiſſiſſe: idque eo duntaxat animo feciſſe, ut eorum operâ concordia & conſenſio cum cæteriſ Eccleſiis foveretur. His accedunt aſſiduæ noſtræ, quæ poſtremis temporibus nobis cum Angliſ interceſſerunt, dimicationes, nec non ea quæ in Italia & cum Hiſpaniæ gente geſſimus bella, quorum neceſſitate adducti multa Papis præter jus tradidimus, ne in eorũ odium incurremus. Neq; id Papis fugiebat, qui datâ operâ hiſ nos bellis implicatos & cõſtriçtos tenebant, ut id à nobis etiam invitiſ extorquerent. Verũ, non inde conſequitur, id regis auctoritati & regni libertati fraudi eſſe debere, unde Papa pro animi arbitrio de reb⁹ noſtriſ

con-

constituere, & sub Hispanicum jugum nos redigere aut possit, aut debeat.

Vt majorum nostrorū propositū rectè accipiamus, tot tāq; præclaræ, & cōstantes eorū actiones nobis aliunde testificantur, eos nunquā penitus credidisse summam esse Papis jure divino in reliquas omnes tum hujus regni, tum aliorū etiā Imperiorū Ecclesias auctoritatem, qualē sibi arrogant. Id enim si credidissent, ut pii & religiosi viri erāt, sic nunquā profectò ea de re cū Papis cōtendissent. Equidem cū populo & nomine & animo verè franco hoc est libero, tū tot tamq; magnanimis regibus indignissimū & gravissimū erat, bestię reviviscentis imaginem videre, & urbis Romæ jugo iterum subjici, postquam tamdiu tamque acriter pugnatum fuisset, tantumque sanguinis effusum, ut injustè erepta libertas postliminii quodam jure aliquando recuperaretur. Attamen pietas, religiosusque Dei metus, quo tāto opere apud omnes celebrati erant, eos procul dubio nec invitos impulisset, ut Papis

se subjicerent, rerum divinarum & humanarum sui regni dispensationē eorundem arbitrio potestatique permetterēt, si ea Dei voluntas fuisset. At cū id prættermiserint, ut satis cōstat, immo verò Papas longissimè à suis finibus repulerint: persuasissimum habeamus, longè aliter eos persuasum hoc habuisse: Etenim quod rei caput est, summos habebant sua ætate doctores, à quibus quid ea de re in sacris scripturis contineretur, didicerāt. Eorum testimonia nulla jam, brevitatis causā proferam: nec ad rem totam pernoscendā ultra eā, quæ antea proposui, exempla progrediar. In Parisiensis Academiæ admonitione, quam Caroli v i decretum sequutum est, hoc nominatim scriptū extat: Prærogativam summamque auctoritatem, quam Romana Ecclesia sibi vendicaret, à Constantino delatam ei fuisse: quam tamen Constantinopolitana, Alexandrina, & aliæ certatim sibi deberi contenderent. Atque hoc unum illud est, quod in Gallia de Romanæ Ecclesiæ jure tenebatur.

tur. Quinetiam poterant eam Constantini donationem in cōtroversiam vocare. Illis enim non difficile erat ex regum etiam nostrorum historiis probare, præcipuam Paparum potentiam & dignitatem multis post Constantinum annis extitisse, Papasq; totam ejus rei laudem Pepino præcipuè & nostris illius successoribus regibus debere. Sed nulla moti ratione id agnoscere & cōfiteri volunt. Summa tamen rei huc redit, Ecclesiæ Romanæ sedis prærogativæ causam ad Constantini donationem vulgò referri: hoc est, majoribus nostris cognitum & exploratum fuisse, jus illud omne, quo se venditabant, positivum esse, hominis donatione, non ulla Dei constitutione sacris literis comprehensa, constans: Eo autem nomine regnū hoc illi nullo modo obnoxium esse posse: immo cōstitutam illam donationem nullam omnino exigendæ pecuniæ potestatem Papæ permittere, tantāmq; illi duntaxat concedendam esse, quantam Ecclesiæ facultates ferrent, citra suum ullum

detrimentum. Hæc illorum verba sunt. Quòd si de Constantini donatione aliter sensissent, indéque consequutum fuisset illius vi & auctoritate Papam pecuniæ ex hoc regno exigendæ jus habere, Parisiensis Academiae & Galliæ Antistites secum ipsi pugnascent. Verùm id probè sciebant, Constantini donationem nō esse Dei mandatum, quo tenerentur, Constantinique munificentiam imperii Gallorum libertati ac dignitati fraudi ac damno esse non posse. Sciebāt hoc quoque, jus illud qualecunque tandem esset, ab iis, quas nominant, Ecclesiis in contentione poni. quod quidem de illius vi & veritate multum detrahit. Ita certè majores nostri de ea loquebātur, quia certò scirent totam orientalem & occidentalem plagam de primatu adversus Papas multis gravissimisque rationibus dimicasse, & Africanas Ecclesias D. Augustini tempore in magnam ea de re contentionem venisse. Romana Ecclesia asserebat transmarinas Ecclesias sibi subjectas esse: Con-

se: Contrà D. August. aliiq; Africae patres & Episcopi id negabant. Ea cōtro-versia utrinque sic agitata fuit, ut Papa Romanus falsi compertus sit, quod concilii Niceni in eam rem decretum supposuisset: nihilque aliud in Episcopi Romani gratiā reperiri potuit, quàm ut Romæ locorūque vicinorum rationem, curāque haberet: Et ex cōcilio auctoritate vetitum fuit, ne ad Romanum pontificem in posterum provocaretur. A Cypriani usque tem- *De simpli-*
poribus Romani Episcopi aliquid huic *itate præ-*
non dissimile in Africanos movere in *latorū &c.*
animo habuerant. At D. Cyprianus
adversus Romanum Episcopum hanc
constantissimè causam egit, firmissi-
misq; argumentis docuit, nullam esse
illius in alios prærogativam & auctori-
tatem. Unum Christum summum esse
omnium Episcopum, sub quo alii om-
nes Episcopi idem munus & onus
haberēt. Postea D. Hieronymus (quā- *In epist. ad*
quam Ecclesiæ Romanæ presbyter) *Evagriū.*
professus est, scriptoque confirmavit
tantum esse oppiduli (cui Eugubium

nomen erat non procul ab urbe) Episcopum, quantus ille Romanus esset. Id ipsum quoque D. Bernardus Papam Eugenium (ut suprà dictum est) edocuit, dum ait eum non esse Episcoporum dominum, sed ex iis unum. Parisiensis Ecclesiæ primarij & Antistites Caroli v i imperij tempore hæc omnia nō ignorabant, quæ hodie etiam in sanctorum Patrum libris & Ecclesiæ historiis extant. Sciebant quoque quantæ cōtentiones ob istam Episcopi universalis prærogativam & auctoritatem inter Constantinopolitanum & Romanum Episcopum exarsissent, & quo animo ac studio D. Gregorius Romanus Episcopus adversus alium, nempe Joannem Constantinopolitanum, qui summam hæc dignitatem sibi arroganter attribuebat, invec̃tus fuisset, in multis librorum suorum locis testificatus, eum qui Episcopi universalis nomen & auctoritatem sibi arrogaret, Antichristi præcursores esse. Hoc ergo majoribus nostris adversus usurpatam Romani Pōtificis auctoritatem probè cognitum

lib. 4 epist.
76, 78, 80,
lib. 5, & lib.
7. 194. &
lib. 6. epist.
188.

gnitum erat; illudque Parisiensis Academia & illi adjuncti Gallicanae Ecclesiae Antistites in sua adversus Papam expositione praecipue commemorabant. Quin & rex, & suprema illius curia id minimè repudiarunt, sed confirmarunt, & suo etiam decreto, solenni quodam ritu, inseruerunt: nimirum tanquam rem certissimam, & validum adversus Paparum usurpationes fundamentum, id esse rati. Deinde Ecclesiasticus ordo in concilio Turonensi non dixit Papam ullum in se jus potestatemque habere, sed regem tantum, nulli alii praeterquam illi subiectum se asserens. Quod si Papa ista primatus opinione elatus regi molestus esse pergeret, nihil obstare, quin rex illum iusto bello ad retinendam suam auctoritatem persequi posset. Atque haec de Papae auctoritate, quantum quidem in majorum nostrorum monumentis scriptum extat.

In illis autem discemus etiam, quomodo Paparum excommunicationes & interdictiones accipi debeant. No-

sunt, propriè & per se ligat. quòd si aliter quàm Deus instituit ac præcepit, ab hominibus usurpatur, nullum est jam Dei promissum, ac p̄inde excōmunicationes nihil amplius sunt, quàm mera hominũ verba, & minæ, quę momento evanescūt, nec ullis aliis, nisi autoribus ipsis nocere possunt. Neq; enim Deus peccatorũ, quæ in iis admittuntur, aut perversarum affectionum, quas ad eas adhibēt, actor & executor est. Tales nimirum erant summorum Hierosolymis pontificum eorumque consistorii contra Apostolos & Christianos excommunicationes. Id inquam patres nostri noverant, atque ex sacris scripturis priscorumq; doctorum D. Augustini maximè libris didicerant, qui præclaras ea de re sententias edidit, quarum nonnullas D E U S sua providentia Paparum decretis inferi voluit, quibus adversus illos ipsos uteremur. Itaque Paparum excommunicationes meritò pro nihilo ducebant, quòd nullo jure aut potius præter omne jus, ut multis & gravissimis

rationibus probari potest, fierent. Ac primùm, quòd Papæ eas emitterēt, ista utriusque gladii potestate, quam sibi in universum orbem datam esse volunt, freti; quod nostri patres minimè credebant. Ita enim falsò fundamentò jacto, quicquid in eo superstruebatur, omnino corruēbat. Deinde quòd id omni legitimæ actioni repugnaret. Priusquam enim aliquis excommunicetur, tum probatam culpam, tum justas causas, & eas, quæ excommunicationem commereantur, esse oportet. Ut autem de illis planè constet, in rem præsentem veniendum est, ubi delictum admissum fuit, auctoresq; adeò ipsi, si fieri potest, inspiciendi, ut nihil præcipiti judicio fiat: cavendumque diligenter, ne ad ultimam hanc (quæ tantam à reliquo grege separationem continet) resectionem antè veniatur, quàm salutaribus & apposis admonitionibus tentata fuerit ejus, qui peccavit, ad meliorem mentem reductio. Præter hæc etiam, de illius pertinacia & propositi obstinatione judicandum,

At

At nisi à pastoribus & senioribus, qui in locis ipsis degunt, fieri hoc non potest, nisi etiã res illic, ubi admissa fuit, disceptetur, ut vetus Ecclesiæ disciplina præscribit. hoc præterea requiritur, ut excommunicationis fines pii sint, & ad nocentis hominis salutem referantur: ut ad extremum hoc remedium non simultate & odio, sed pio sinceroque in fontem affectu veniatur, totiusque Ecclesiæ utilitati consulatur. Si hæc in excommunicatione desiderentur, Dei sanè cõstitutio pervertitur. Nec est quòd putemus Deũ id ratum unquam habiturum. Quinetiam si id per alios fiat quàm per eos, quos Deus ei muneri præfecerit, nullo auctore fit, nullo etiam fructu. Atque hic verus est summatim excommunicationis à Deo institutæ usus. Patres verò nostri omnia his omnino contraria in Papis animadvertēbant, sine munere, sine ulla causæ cognitione, nulla legitima actione observata, sine iusta causâ, stomachosos & animo affectos homines non ad servandam sed

perdendum potius, & diris suis fulminationibus, si modò id potuissent, opprimendum. Proinde sine ulla dubitatione infimos etiam quosque homines excommunicationis nexu solutos, ac nulli pœnæ obnoxios judicabant, eorumq; provocationes ex Paparū tyrannide profectas recipiebant: Sed imprimis, si fortè Papæ in reges sua fulmina contorquerēt, gravissimè hoc ferebant. Non quòd nescirent, reges etiam ipsos disciplinæ censurisq; Ecclesiasticis, itemq; pastorum suorum reprehensionibus, & correctionibus, atque hujus etiam excommunicationis pœnæ, siquid ea dignum admisissent, obnoxios esse debere, ut hac via se ad Deum, ad sanitatem, melioremque frugem cōverterent. Verùm in illis Paparum contra reges nostros excommunicationibus, gravissimæ aliæ præter eas, quæ supra jam commemoratæ sunt, causæ erant, ob quas non illi solum meritissimo damnarētur, sed universi etiam regum subditi justo dolore accensi uno animo conspirarent ad suscipiendam eorū, qui tam indignis

modis à superbis illis accipiebātur, defensionem. Cōsiderabant enim patres nostri, reges esse Unctos Domini, in quib⁹ illius Majestas nobis, quodāmodo ante oculos ponitur: quod nobis argumento esse debet ad eos summa observātia prosequendos, & nunquā, nisi eorū amplitudinis ratione diligenter habita, nominandos. Sciebant, ut sacrā *Exod. 22.* scripturā cōtinetur, à Deo nominatim fuisse hoc vetitū, ne quis sui populi principi malediceret: Et ab Apost. eos cō- *2 Pet. 2.* dēnari, qui de principibus aliter quā *Inda 1.* honorificè loquerētur: dum iis, qui in principes & reges cōtumeliosi essent, ipso-
 rum etiam Angelorū exemplum opponūt, his verbis: Non horrent cōvitiis dignitates incescere: cū ipsi Angeli qui sunt robore ac potestate majores, nō ferant adversus eas apud Dominū, maledicum judicium. Id autē ab Apostolis dicebatur de illius ætatis principibus, licet Ethnicis, iisque ut plurimum sceleratiss. Majores igitur nostri, literas cōtumeliis in principes suos refertas Romā ad se perferri, facinus planè indignum, & sibi etiam nullo modo

tolerandum putabant. adde quòd facile existis bullis animo cerneret, quòd Papæ sua consilia & cogitationes referrent, nempe ad Principum suorum perniciem, cum de eorum salute nullo modo laborarent: quippe illorum plerique omnes profligatissimi & perditissimi, omnisque pietatis expertes, ut Platina & alij historici eorum facta & mores suis scriptis nobis depingunt. Sed aut flagrantissimus principum nostrorum ulciscendorum & opprimendorum ardor erat, si quid pro regni dignitate & cõmodis, quod Papis minimè cordi esset, effecissent: aut artificia hæc erant, & insidiosa cõmentata, per quæ & reges & regum consiliarii metu perterriti ne hiscere quidem auderent, miserum popellum & Clerum præcipuè immensis Paparum exactionibus objicerent, & ipsos, ut a libi, sic in hoc regno tyrannidem suam stabilire sinerent: (Academia Parisiensis & Antistites de iis ita loquuntur) Aut deniq; , hoc inter eos & hujus regni hostes ex mutuo fœdere convenerat,

nerat, ut dum hi regnum infestis armis invaderent, illi vicissim hunc ludum luderēt, & (quomodo Jupiter quidam in tabula depictus) ab excelsa sua sede fulminā sua ejacularētur, quorū strepitu & reges ipsos & eorum populos percellerent, eorum uni pro jure summo imperantes, ut de ea possessione, quam in Anglum justè acquirerat, illi concederet: Alteri, ut Italicā, quam jure possidebat, ditione excederet: alii, ut regnum suum spoliari & diripi fieret, & alia ejusmodi. Ea neminē hominē fugiebant: omnibusq; hoc cōstabat, Papis nihil curę esse de sequendis rectis excommunicationum finibus, & hoc maxime uno, Ecclesiæ utilitate & ædificatione: quibus contrā scopus hic unus esset propositus, suas ad hunc præcipuē finem excommunicationes de arce sua emittere, ut & in Ecclesiis & imperiis ipsis miserrimè omnia permiscerēt & evertetent. quippe quæ his nominatim verbis conceptę essent, ut populos fidelitatis, quam principibus debebant, juramēto libe-

rarent, imperarentq; iis, ut arma in eos caperent, contrà quàm Dei mandatis præcipitur, totiesq; repetitur, obediendum regibus esse licet impiis, quales Christi & Apostolorum ævo tum Imperatores tum alii etiã magistratus erant. Hæc omnia majores nostri non sine horrore intelligebat: ideoq; justo dolore permoti, quòd Deum illiusq; constitutiones pedibus adeò proteri, regum suorum dignitatem ita exauctoriari & convelli, regnum ipsum vastitati hostiumq; libidini exponi viderent, Bullas arreptas dilacerabant, & eos qui eas in regnum auderent inferre, in crimen judiciumq; vocabant: certò scientes ejusmodi fulmina non è cælo, sed ex imis inferis emitti. Cuncti eò conveniebant, ut gladium è furiosorum illorum manibus eriperent. Reges ipsi palam testificabantur minimè se unquam passuros, ut sui hostium servituti objicerentur. Principes, nobilitas, universus populus ultrò ad id suas opes, & vitam adeò ipsam offerebant. Supremus senatus vim legum & judiciorum polli-

pollicebatur: Clerus tam superbū primatūs dominatum abnuebat, illiq; palam renuntiabat: universi deniq; regi obsequium & fidem perpetuā pia conspiratione promittebant. Qui nostras historias percurrūt, nec satis accuratè harū justarum offensionum dolorūq; causas ponderant, accusant nostrum illū Augustum, quòd nimia in sacram sedem irreverentiā fuerit: accusant Philippum alterum, quòd stilo paulò acerbiori ad Bonifacium scripserit: accusant nostros senatus, quòd sanctorum istorum patrum ministros & legatos carnificibus cum summo dedecore & probro tradiderint: accusant nostram Nobilitatem, quæ bullarum istarum invidiā Alpes superarit, Papamque adeò ipsum armis perquisitum, & in carcerem pertractum, ad furiosum mortis genus adegerit. Sunt ergo nonnulli, quos id offendit. atque Paparum assentatores, quum de his scribunt, has eorum actiones verbis lenire conantur. At contrā hæc summa est Gallici nominis gloria:

Ubi nimirum studium, virtus, libertatis amor, Gallorūq; fides multò quàm ullo alio in facinore clariùs extitit & emineuit: quod sit posteris (qui à majorum virtute degenerare minimè omnium volunt) exemplo, ut idem quoq; in eadem causa pari animo & fide suscipiāt, caveantq; furiosorum istorum bullas ita reformident, ut ab ea, quàm suis regibus, sibi ipsis, patriæque debent, fide & officio vel minimùm avocetur. Religionis nomen & prætextus ut nunc, sic & olim Papis nō deerat. Principum nostrorum accusationis caput hoc erat & fundamentum, quòd illi essent hæretici, schismatici, atq; Ecclesiæ hostes. Id nominatim ab historicis cōmemoratur. Nec illi alio stilo aliaq; scribendi forma, atq; ea, quam nunc videmus, utebantur. At patres nostri non ita rudes erant, rerūq; imperiti, ut levissima quaq; de causa se ad defectionem & perfidiam induci pateretur. Ad hæc adversus omnes Paparū accusationes provocatio ad concilium præstò erat, usitatum ac potentissimum ad eorum furo-

furores, dum cōcilium haberetur, coercendos remedium. Et hæc quidem de excommunicationibus.

Quod autem ad istas Interdictiones attinet, de iis nihilo certè magis laborabant. Paparum adversus Ecclesias & Imperia, interdictiones cò spectant, ut templorum fores occludantur, ideóq; nulli Christianorum conventus agantur, nullæ sacræ cōciones, nullæ etiam preces publicè habeantur, nulla sacramenta administrētur, ac ne Baptismus quidem infantibus. Quid plura? ut ne mortui in cœmeteriis sepeliantur. En præclaræ illæ interdictiones, quæ patrum nostrorum temporibus indicabantur, ut à nescio quo Martino v, Julio ii & aliis ejusdem notæ pontificibus. Atq; haud satis scio, an hoc unquā planè creditura fuisset posteritas, nisi noster hic Papa, ingenii, cōsuetudinisq; & instituti aliorum successor, idē prorsus nobis minitaretur. Patres verò nostri, qua erant prudentia, animiq; magnitudine, illa omnia pro nihilo habuerunt, nō quòd pietate religioneq;

deficerentur : sed illud probè tenebant, totam Paparum simul & inferorum omnium potestatem non posse sibi vero harum rerum omnium usu interdicare. hæc siquidem interdictiones omnes, excōmunicationum ab illis latarū, quæ divino & humano iure nullæ erant, naturā & vim sequebantur; idq; totū vnico summæ ubiq; terrarū in rebus divinis & humanis potestatis nomine, quasi fundamento nitebatur, quòd patres nostri planè falsum esse sciebāt: ac proinde, quicquid inde cōsequeretur & exædificaretur, falsum quoque & irritū credebant. Idem patres illud quoq; intelligebāt, quicquid fit in Ecclesia, ex uno Deo, qui id præscripsit, non autē ex ullius mortalis hominis, qui pro animi libidine dispēsare omnia vellet, auctoritate pendēre. Illud quidē constat, si quis excōmunicatus fuerit, illū ad sacramētorum communionē admittendum non esse. verū hoc planè cōstare debet, an eiusmodi excōmunicatio legitimè adhibita fuerit, necne. Deinde pastorū est, qui

qui ei muneri obeundo præsumunt, id agere. Interim illa sacramentorū interdictio, illis quoq; sacrarū concionum, quæ in tēplis celebrari debēt, auditione nō interdicat. Nā contrā, ut iis sæpe & studiosè intersint, omni ratione curandū est, ut divini verbi virtute moti resipiscant. Quin D. Paulus hoc nominatim præcipit, nō esse eos pro inimicis habendos & durius tractandos, sed tanquā fratres admonēdos, & ad officium lenitate & humanitate adducendos. Præterea sicui rebus sacris & piorū hominū cœtu ob aliquod à se admissum scelus interdictum sit, rationi profectò juriq; consentaneū est, ut in eo plectatur: sed rationi & æquitati repugnat, illius uxore & liberos, nisi in eadē culpa fuerint, in eadē excōmunicationis pœna esse. Immanior quidē certè hæc esset crudelitas, & in liberos p̄cipuè, qui in Ecclesia geniti & nati fuissēt. At totā civitatē, universum etiam Imperiū eadē pœna cū sceleris auctore p̄mistè implicari, immanitas p̄fectò & barbaries atrocissima fuerit, & cujus exemplum

nusquam, nisi Romæ, extare puto. Fin-
gamus enim animo & cogitatione to-
tum Ecclesiarū corpus peccasse, De-
umq; offendisse; quid tunc faciendū?
Intercludendus ne omnibus ad tem-
pla aditus esset? Immo verò aperienda
tunc maximè forent, cogendusq; etiā
ad sacras cōciones frequentandas po-
pulus, ut Dei verbo audito, officii sui
admoneretur, & vitam antè actam me-
liori vivendi ratione commutaret; cul-
tuiq; divino & precibus studiosiùs quā
antea interesset, ut iræ Dei occurrere-
Joel. 2. tur. Nempe Joel & alii Prophetæ, quū
populus Deū offenderat, ita se omni-
no gerebant, præcipientes ut tubæ al-
tius canerent, ad populum in templa
convocandum. Templorum autem
aditus Christianis nunquam, nisi à Ty-
rannis & acerrimis Ecclesiæ hostibus,
prohibitus fuit. Imperatores Romani
Pagani, exempli causa, id postremis
Ecclesiæ persecutionibus fecerunt,
ex quo primū Christiani publica lo-
ca habere cœperant, cōcionis habendæ
ergo. Julianus Apostata idem po-
stea

stea fecit, & ab eo, Arriani Imperatores aliquot. Sed hic infidelium furor erat. Christiani verò nihilo minùs cōfuetos cœtus celebrabant, Deo preces publicè fundebāt, sacramentorū communioni intererant (idq; in ipsis etiam sylvis & speluncis, si alibi non liceret) sine ullo minarum, quæ à furiosis illis jactabantur, metu. Postea verò Theodosius & pii alii Imperatores Ethnicorum templa claudi quidem jusserunt, sed ob idōla quæ in iis erant, & quia quicquid illic gerebatur, impietatis & superstitionis plenum esset. Nulla possunt alia templorum clausorum exempla proferri. Quare, quū Papa imperabit, ut ædes sacræ in hoc regno claudantur, aut eodem furore, quo primi illi Tyranni Ecclesiæ hostes, corripiantur, aut certè impietatis idololatriæ, quæ illic aguntur, damnet necesse est. Patres nostri ea omnia considerabant, & Christianorum priscorū more istas omnes Interdictiones ridebant. Hoc verò illorum animos justa indignatione vehementer exulcerabat (Id quod

etiam piorum virorum pectore acriori vulnere transfodiet) quòd Papæ pio populi affectu & religione sceleratè abuterentur, ut cum ad flagitia confidentius suscipienda impellerent. Videbant, quàm cara Gallico populo essent Religio, templorum ingressus, sacrarum rerum usus : Itaque sancti illi viri comminationes suas illi intentabant, & ea ipsi erepturum se minabantur, ut facilius ad principibus suis renuntiandum, & ab iis deficiendum inducerent. Hi profectò abusus sunt, & profanationes planè intolerabiles. Siquis vim in aliquem adhibet, & gladio districto jugulum illius petit, capitis periculum minitans, ut flagitii alicujus aut admittendi assensionem & societatem, aut jam admissi dissimulationem silentiumque extorqueat : id sexcentis tormentis & crucibus dignū iudicabitur. At pij isti totius scilicet Ecclesiæ præfecti & moderatores, ut sacrū & devotum Deo populū contra Regē suum arment, atq; ex illius animis & manibus iustissimam publici
status

status defensionem eripiant, duos illos fulgentes gladios, quibus se instructos dicunt, illius capiti inferunt: & nisi impia cōjuratione ac perfidia tum regem suū regno spoliaverint, tum seipsosexternorū servituti dediderint, tunc vitā se illi adempturos interminantur. At quam tandē vitam? Non corporis quidē, sed animorū vitam, spirituale pabulū, salutem æternā, dum & Christianis eōcionibus, & publicis precib⁹, & sacramentorū usu nefariè iis impiéq; interdiciunt. Id verò præcipuè pravas Paparū mentes manifestiùs aperiebat, patrumque nostrorum animis & pæne oculis ipsis subiciebat, quonam genio afflati, quo etiā ingenio præditi essent: ut ea re perspecta & planè comperta, patres citra ullā dubitationē & religionē, conscientiaē & dignitatis suæ labem, ad tollenda eorum decreta conspirarent: facileque judicabant quod olim à Christo scribis & Pharisæis ut probrum objectabatur, id ipsum meritissimò & convenientissimè Papis nostris exprobrari posse, eos scilicet

putare se regni cœlorû claves, omnēq;
earum pro animi arbitrio dispensan-
darum potestatem adeptos esse, cū
interim non solum nullam eò ingredi-
endi voluntatem haberent, sed etiam
illius ingressu populum excluderent.
O detestabilem impietatem! O faci-
nus execrandum! Populum, templo-
rum in quibus Dei præcepta discat, a-
ditu prohiberi, nisi prius Papæ, à quo
ad defectionem sollicitatur, mandatis
pareat! Populum nō decere Deo sup-
plicare, numenq; illius & fidem implo-
rare, nisi prius gratiam à Papa ineat, il-
liq; patriæ suæ libertatem perfidè ven-
dat! Populum sacramentorum usu pri-
vari, nisi prius Hispaniæ insignia & ar-
ma sumat! Populum nō posse amplius
Deum colere, nisi prius Papam, ipsius-
que bullas colat! Quantum autem ad
mortuorum sepulturam attinet, tam
immanis est ejus rei atrocitas, ut de ea
plurib⁹ agere nihil sit opus. Nostri igi-
tur pīq; illi patres, non sine acerbissi-
mo animi sensu & dolore hæc secum
reputabant. Ecclesiæ doctores, & ejus
sæculi

sæculi Jurisconsulti suis scriptis lacry-
 mas & suspiria in posteros derivabant,
 ut hodie apparet. omnisq; Gallica Ec-
 clesia hoc certò sibi pollicebatur, regni
 & libertatem & dignitatem, simulque
 rerum omnium sanctarum (quæ quidẽ
 omnia Papæ indignissimè distrahere
 conabantur) usum bonâ fidẽ à se reti-
 neri. Atq; adversus Paparum excõmu-
 nicationes & Interdictiones tam præ-
 clarum & constans majorum nostrorũ
 propositum fuit, ut Papæ aliquãdo ce-
 dere coacti sint, promiserintq; se non
 amplius nec contra regem, nec contra
 regnum iis usuros. Ea de re Martini 3.
 & 4: tum Gregorii 8, 9, 10, 11 & aliorum
 quàmplurimorũ conscriptæ Bullæ in
 Tabulario regio adhuc extant. Id quo-
 que jus ad Franciæ Patricios, atq; adeò
 ad minimos usq; regis ministros perti-
 nuit, cujusdam capitularis, ut vocatur,
 à Carolo magno, ejusq; filio sanciti vi &
 virtute, cujus hoc est initium, *Si quos*
culpatorum, &c. Quod si Papæ severita-
 tem censoriam in nobilem quendam
 virum, aut Galliæ civitatem adhibuif-

sent, cogeantur eiusmodi sententiam revocare, & eos quibus censoria illa nota inusta fuisset, in pristinum statum restituere. Quinetiam Maiores nostri impetrarunt, ut eiusdem libertatis beneficio fruerentur relique civitates & principatus, qui huius regni beneficiarij & clientes essent: quemadmodum anno 1448 Bullæ contra Gandavenses & Brugenſes decretæ oppositum fuit, quæ ob id abrogata & antiquata est. Idq; adeo ad nostram usq; ætatem valuit, quum Senatus certior factus anno 1580 Gregorij 13 Bullam clandestino introitu in hoc regnum irrepsisse, communi decreto 4 Octobr. in eam rem facto, cavit ne ea promulgaretur: hac etiam sanctione addita, ut eorum, qui eam recepissent, sacerdotiis manus regia injiceretur: decretumque est, ut illud Senatusconsultum typis mandaretur: Majores igitur nostri, ut ex his constat, quandiu sententiæ suæ perseverantiam retinuerunt, tandiu & regni dignitatem libertatemque retinuerunt.

Papæ in suis Bullis proponebant, si
Reges

Reges nostri sibi non obtēperarent, eorū imperia pro suo arbitrato, ad aliū translaturus, eorumq; populis minabātur se alios principes ipsis, præfecturos: summā illam ubiq; gētium imperandi in tēporalibus & spiritualibus rebus potestatē arrogātissimē, ut jam antea diximus, venditātes nobis, & ostētantes, ac diram funestamq; impreca-tionem in id imperium immissoiros se minitātes, nisi ad suum nutum & arbitriū regeretur. Sed his rebus omnibus Patres nostri ob ea quæ diximus nihil prorsum terrebantur. Sapientius nimirū instituti, & usu rerū peritiores facti erant, quā ut nugis istis vel tantillū moverentur, qui satis scirēt Deum auctoritātē illam sibi vni reservasse, illiusque unius esse imperiorū statum mutare, & reges in iis pro jure suo summo constituere; iisq; ut & reliquis ab eo constitutis magistratibus parendum esse: alioqui Dei mandato & auctori-tati repugnari, nec impunē id quidem aut inculpatē, quęcunq; tandē caussa cōtrā obtendi possit. Diabolus idem

Matth. 4. agebat in sua illa contra Christum testatione, mundi regna illi ostendens, atque se traditurum etiam pollicens, si honorem sibi cultumq; tribuere vellet. Perditus ille dicebat omnia se regna in manu sua habere, de quibus pro animi libidine constituere posset. Qui verò hanc tantam in mundi regna potestatem, quæ uni Deo debetur, sibi assumunt, ii certè Dei sunt hostes, fallacesq; spiritus. Majores nostros, prudentesq; probosq; viros minimè latebat, Christum, ut hereditatem inter fratres divideret, rogatum id recusasse, quànquàm ea hæreditas minimi fortasse pretii esset. Inde concludebant, Christum nunquam hujus facti rationem probaturum, si Papa, pro ea, quam sibi arrogat, potestate sceptræ & imperia parti-retur, venderet, transferret. Enim verò ex sacris libris cognitum hoc habebant reges, ut Davidem, Salomonē, & alios à Prophetis reprehensos fuisse, severiusq; & minaciter admonitos, nisi morem Dei mandatis gererēt, summum esse periculū, ne justa Dei offensione suum

suum sibi regnum eriperetur. At pii illi viri eam calamitatem Dei nomine minabantur, nec eorum quisquam eò audaciæ unquam venit, ut regna per se à propriis Dominis alienata interverterit & ad alios transtulerit. D. Ambrosius Theodosio sacris quidem interdixit, sed non Imperio, atq; ista cōminatione in eum nunquam usus est, nec aliter eum cōpellavit, nisi cum ea animi submissione & observantia, quæ civem clientemq; decet. Patres nostri in eo quidē probè se institutos ostendebant: & præter Dei mandatū, quò præcipitur colendos esse reges, iisque obtemperandum, ingenio etiam ad principes suos imprimis amandos propenso semper fuerunt. Unde præ cæteris omnibus nationibus, celebrati fuerunt. Itaque Papis, quos videbant tam infirmis fundamentis niti, fidem non habebant, sed eorum Bullas detestabantur, & justo dolore accensi universum suum studium operamq; regibus suis pollicebantur & deferebant, à quibus mandata ad retinendam Papa-

rum insolentiam reciperent : satis patrū & sua ipsorū memoria experti , neminem unquam illorū fulminibus fauci-
atum fuisse. Quinetiam quum reges
tot tantisq; indignitatibus à Papis se af-
fici, tot onerari cōtumeliis , regnumq;
per illorū artes hostibus prædæ objici
viderēt, tunc nec ullū religionis & Ec-
clesiæ falsò usurpatū nomē moram af-
ferebat, nec ulla Paparum sanctitas ob-
stabat, quo minus reges suorū tum sen-
tētiis freti, tū studiis moti, armis se tue-
ri, & superbos istos , hostilē in modum
tractare decernerent : quippe qui nul-
lam belli gerendi causam justiorē da-
ri posse arbitrarentur. Neq; id tamen
sine maximo dolore sic statuebant, ob
eam , qua sedem illam semper colue-
rant, observantiam, & eam etiam, quæ
inde consequi posset, offensionem &
invidiam, cū aliqua nec minima Ec-
clesiæ pars cum eo dimicaret, qui præ-
cipuam illius administrationē ac mo-
derationē sibi sumeret. Verū publica
salus, suprema lex esto. Aut sui de-
fensio justē strenuēq; suscipienda erat,
aut

aut rex perfidè deferendus & proden-
 dus, collūq; servitutis jugo turpiter of-
 ferendum Quòd si ut sui regis facta te-
 ctāq; cōservetur auctoritas, ut status &
 patria tota defendatur, ut libertas, qua
 nīhil est dulcius & carius, retineatur,
 bellū à nobis suscipitur: idq; adversus
 eos maximè, quorū amicitiam expeti-
 m⁹, ac nobis cōciliare imprimis stude-
 mus, & qui sub pietatis specie ambitio-
 nem, avaritiā, & arrogantiam (à quibus ad
 status eversionē machinandam impel-
 luntur) prę se apertè ferūt: cui jam du-
 biū esse potest, quin cum eorū, qui ne-
 cessariā sui defensionē suscipiunt, caus-
 sa, unā cum justitia, tū Dei assensio tū o-
 ptima cōscientia conjungantur? Nun-
 quid sanctitas, pastoris officium, Dei-
 que nomen, iis qui res pturbare & imperia
 bellis & cōfusione pmiscere vellēt, oc-
 casioni ad id & causā esse deberēt? A-
 biathar summus sacerdos muneris sui
 oblit⁹, ad Adoniæ factionē contra Salo-
 monē transiit: putās se, pro ea qua p̄dit⁹
 erat auctoritate, jus imperii ad quēcun-
 que vellet trāsferre posse, neglecto Dei,

1 Reg. 1. qui aliter ea de re constituisset, mandato. At in sacerdotii dignitate tātum momenti non fuit ac præsidiū, ut non is morte damnāretur, cēsereturq; dignus cum quo tanquam cum hoste ageretur. Omnis anima potestatibus supereminētib; subiecta esto, ait D. Paulus. Nec Apostolus nec Episcopus, nec ulla alia Ecclesiastica persona excipitur, ut D. Chrysostomus in eum locum scribit, ac proinde ne Papa quidē ipse. Qui est omnium supremus, gladium sibi à Deo cōmissum gestat, ut eos qui se præter modum contra suam auctoritatem efferre audeant, æquē omnes reprimat. Patres nostri id sciebant, credendumq; est eos, nisi perquā consideratē, ejusmodi bellum non suscepisse. Et certē in illo Turonensi concilio palam statutum fuit, bellum salva conscientia Papæ inferri posse. Ac illud ipsum decretū usurpatum jam aliquādo fuerat, ideōq; normæ instar esse debebat, ad quam hoc regnum sua consilia & actiones in eadem re dirigeret.

Non ignorabant autem reges, itemque

que alii, qui in celeberrimos illos cœtus accersebantur, quæ sit Episcoporum habenda ratio, & quo sint honore & observantia digni. Nam si Romani Episcopi in officio suo permâsissent, nunquam nisi perhonorificè appellati fuissent. Quinam verò majores honores in Rom. Episcopos effuderunt, aut eorum auctoritatē magis amplificarunt, quàm nostri Caroli, Ludovici, & nostri alii principes? Sed quum muneris sui limites prætergressi, pro pastoribus lupi fiunt, & in media regna irrunt, ut ea funditus evertant, nullam officii partē attingentes, sed cōtrà præter officium & decorum facientes omnia: tum verò demum nullus est honori & observantiæ relictus locus: non enim laus personam sequitur, sed munus, si quis in eo fungendo præclarè se gesserit. Si munus desinit, honor & meritò desinit. Nostri igitur patres, qui Papas erga se non pastores, sed perditores, non mandatorū Dei præcones: sed è contrario bellorum civilium tubas, & rebellionis adversus principem concitatores: nec

jam patres & servatores, sed hostes vexatoresque infestissimos, perniciem sibi & exitium machinantes experirentur, rectissimè profectò & rationi convenientissimè facturos se putarūt, si erga eos ita se omnino gererēt. Parisiensis Academia sentiebat, quod D. Paulus monet, discessionem ob omni fratre qui se inordinatè gerit, faciendam, de Papis intelligendum esse, quum rerum superbo dominatu potiri ubique volunt, omnes miserè divexant, & furiosè permiscent omnia.

Cæterum hæc patrum nostrorū adversus Papas contentio fieri non poterat, quin fieret quoq; discidium. Itaq; Paparum adultores iræ pleni, cupidissimè inculcabant nihil hoc aliud esse, quàm se à Catholica Ecclesia segregare. Uti etiam Papæ videri volebant eos suis excommunicationibus ab Ecclesia Catholica abstraxisse. Verùm patres nostri de iis admodum securi erant: immò verò instabant atque urgebant summo cum studio, ut sibi à Paparum qui se in suo munere obeundo ita tyrannicè

rannicè gererent, consortio quam primum recedere liceret. Censebatque Turonense concilium, bellum etiam illis inferendum. Non quòd pii illi patres hoc unquam in animo habuerint, cum Ecclesia Catholica divortium facere. Illud enim probè sciebant, quicunq; in Catholica Ecclesia sit, eum esse in domicilio Dei, in filiorum ipsius cœtu, & in recta, quæ ad vitam æternam ducit, via: Contrà verò quisquis in ea non fuerit, extra Christum esse: non domesticum, sed externum esse, nec hæreditatis promissiones habere: quisquis, ut breviter dicā, extra Ecclesiam sit, huic nullam salutis spem relictam esse. Quid ergo? A Papa cōmunionē separatū esse, annon ab Ecclesiæ cōmunionē separari erat? Hoc sanè quidē pro ea, quæ majorū nostrorum pietati & integritati debetur, observantia, nobis pernegandum, cū ipsi se à Papis ultrò segregarint. Alioqui eò nūquam venissent. Verū hoc inde factū ab ipsis fuit, quòd aliter ab Ecclesia instituti essent, quàm pōtificiæ dignitatis

studiosi ac fautores nobis inculcant. Etenim, si eos audiamus, non est hoc in Ecclesia esse, nisi Papam errare non posse credamus. Patres autem nostri, ut ex superioribus cōstitit, eorum sententiæ minimè assentiebātur. Non est hoc in Ecclesia esse (si modò fides illis habeatur) si quis pro certo non habeat Papam summum ubiq; moderatōrē & præfectum esse, atq; utrumq; gladium habere: At patres nostri hoc illi nunquam cōcesserunt. Non est hoc in Ecclesia esse, ut id etiam nobis objiciunt, si quis ingenio sit ita comparatus, ut omnibus Papæ mandatis, qualiacunq; tandē illa sint, parēre nolit. Patres verò nostri ad hunc sibi modum imperari passi non sunt, sed judicio prudentiaq; adhibita, quicquid sacris scripturis minimè consentaneum videbatur, etsi à Papa manaret, id planè rejiciebant. Iidem appellant eos hæreticos & excōmunicatos, qui ea nolunt in suos etiam reges admittere, quæ suis Bullis imperant. Patres autē nostri id prorsum negabant, atq; Paparum excōmunicationes

nes cūm deridebant, tū minutatim difsecabant: quinetiā Papas, qui potestātē in hoc regnum sibi vendicarēt, fatuos, insanos, atq; adeò hæreticos appellare nō dubitabant. Atq; hæc ita omnino, ut dictum est, se habere, senatuscōsultis, decretis, variis quoque scriptis & actionib⁹ suis nobis cōfirmarunt. Quòd si aliter, quàm faciebant, credidissent, in eo conscientia repugnassent: quod de tot claris piisque viris, qui nos ætate antecesserūt, vel cogitare est nefas: sanè, si in Ecclesia esse is non est habendus, qui in Paparum obsequio nō manet, neque illi totus adhærescit. Si verò nulla conscientia labe aliter faciebant quàm crederent, tunc aut errore, aut ignoratione peccaretur necesse erat. At extra omnē controversiam est, nostros illos patres iis, qui Paparū decretis omnino addicti & cōsecrati sunt, prudētia, eruditione & fide longè prestitisse. Quomodo igitur, dicet aliquis, se in Catholica Ecclesia esse credebāt, interim dum à Papis dissiderēt, eosq; adeò armis peterent? Nempe ex

sacris scripturis & piorum Doctorum libris persuasum benè penitus atq; cōfirmatū habebant, Dei Ecclesiam nec ex Papa, nec ex ullo alio mortali pēdēre. Nam si in Papa esset illius caput & fundamētum, malè equidē ipsi cōsultum fuisset, & adhuc esset, si quis miserum hominum etiā perfectissimorum statū consideraverit. Præsertim quum tot Papæ à multis extiterint seculis, variis infandisq; sceleribus (ut ab ipsorū historicis describūtur) cooperti & corrupti, nullis etiam bonorum pastorum notis insignes; quippe maxima ex parte Simoniaci, & viis atq; artib⁹, quæ cū legitimæ vocationis regulis (quales in propriis ipsorum canonibus scriptæ reperiuntur) è diametro pugnant, ad Papatū ingressi: alii manifestò hæretici, & à fide aberrātes, atq; alieni, quos ideo Academiæ nostrę causā diligenter disceptata gravi infamia multatos dānarunt. In iis verò, quas ppè continuas adversus Germanos Imperatores habuerunt, cōtentionibus, nec non in suis ipsorū, quas inter se quum de sedis

prima-

primatu dimicarēt, exercuerunt con-
 troverſiis & diſſenſionibus, quānā re-
 cta illorū conſcientia, quis pacis & cō-
 cordiæ amor, quæ etiā integritas & ſin-
 ceritas exſtitit? Patres noſtri qui horū
 omnium teſtes erāt, omnemq; Papa-
 rum vitā penitus cognitam habebant,
 non potuiſſent unquam in animū hoc
 ſuum inducere ac planè credere, Ec-
 cleſiam ex eorum auctoritate pēdēre:
 ac, ſi in Eccleſia eſſe velimus, Papis ne-
 ceſſariò adhæreſcendū eſſe. Quid er-
 go? Chriſtiani illi erant, profitentes ſe
 Prophetarū & Apoſtolorū doctrinā
 credere, Chriſtū ut ſervatorē ſuum a-
 gnoſcere, Deū colere, & in ea, quæ fuiſ-
 ſet in ſāctis Patriarchis, Prophetis & A-
 poſtolis, & in omnibus Dei electis, qui
 in univerſo mūdo vocati fuiſſent & eſ-
 ſent, fide manere. Ex his certò ſibi per-
 ſuadebant, etiā ſi Papa deſtituti eſſent,
 ſe tamē in Catholica eccleſia eſſe: ac dū
 Chriſtū haberēt (in cujus tutela & du-
 ctu longē tutiori, q̄ in illo Paparū con-
 quieſcerēt) Eccleſiæ ſpōſum verūq; p̄-
 fectū & cāput, ac paſtorem pontificēq;

summum, se habere. Nec firmiora & arctiora concordia, qua Ecclesiae Catholicae coniuncti essent, vincula requirebant, quàm eiusdem corporis in Christo membra esse, eodem cum fidelibus omnibus spiritu regi, eadem fidem, eundem etiam Baptismum habere. Patres nostri à Papis distracti, atque adeò ad bellum iis inferendum coacti, hisce cōsolationibus & persuasionibus aduersus eos, qui divortium à se cum Ecclesia factum sibi exprobrarent, animos suos confirmabant: atq; totius veteris Ecclesiae, quae Papis subiecta nunquam fuerat, statum, uti eas etiam Ecclesias quae de Primatu cum Papis contenderāt, sibi proponebant, quas tamen Catholicę Ecclesię membra esse negare non poterant, etiamsi in eo graves Papis adversariae essent, ut & Africanę Ecclesiae D. Augustini tempore fuerunt. Paparum fautoribus, à quibus probrosè excommunicati appellabantur, objiciebant summos in Israelitica Ecclesia pontifices nec semel nec iam primum à recta via defle-

deflexisse, & tyrannicum dominatum occupasse, dum excōmunicabant, atque anathemata, execrabilesque eos pronuntiabant, qui secum non facerent. Atenim illi, quos diris ita devovebant, Apostoli erant, veriq; fideles & Christiani, qui vera Ecclesia Catholica erant, non autem ambitiosi isti Christi hostes, qui primum sibi in Ecclesia locum tribuebant, in qua tamen nihil loci omnino haberent. Confidebant, quandiu ex vero Ecclesiæ capite, & nostræ omnium salutis auctore pendērent, non posse unquam à Deo & Ecclesia, quantumvis & Papæ & inferi omni ope retinerentur, divelli: omnesque Paparū omnium Imprecationes gloriæ sibi & saluti fore. Ex his igitur apparet patres bona fide à Papis se abstraxisse, regiis edictis, supremæ curiæ decretis & conciliis, & eò quidem usque, ut bellis etiam eos invadere nihil dubitarent.

Ego verò imprimis optavi ut in majorum nostrorum historiis hæc & alia hujusmodi attentè considerarentur,

ut ea in his, quæ Papæ per suas Bullas nobis faceffunt, negotiis, in usum nostrū referremus. Papa Sfondrat⁹ quod his cōtrà objiciat, nō habet. Ille enim ipse in sua ad Nobilitatem & populum universum monitoria Bulla eximiam regum maiorumq; nostrorū pietatem ac religionē laudat, quod piis in Deū Deiq; Ecclesiam officiis Christianissimorum nomen adepti fuerint: additque eos, quo propiūs avorum suorum exempla sequentur, eò propiūs ad veram quoque nobilitatem accessuros. Quid autem illi præstiterint, suo nos exemplo docēt. Primi ex Merovingiorum prosapia reges ad Pepinum usq; (quantum ex historiis colligere licet) non magnam admodum Paparum notitiam unquā habuerunt. Per ea enim tempora non magni adhuc nominis erant. Carlinis Papæ subiecti erant, eorum gratiam & subsidium emendicantes, in suisque electionibus & gravioribus etiam aliis rebus ab illorum nutu & auctoritate pēdentes: ut ex Chronicis & aliis eorum

tēporum monumētis facilè p̄bari po-
 test. Non quòd maxima jam tunc am-
 bitione & summo crescendi deside-
 rio non flagrarent. Sed non audebant
 ita apertè, ut postea, regibus nostris
 molestiam exhibere. Unas tantum-
 modo occasiones cupidè captabant:
 ut ii facere solent, qui clàm, & occul-
 tè aliquid moliantur. Si qua in regum
 familiis discordia esset ob uxorẽ quan-
 dam repudiatam, quæ magnæ aucto-
 ritatis principes cognatione contin-
 geret, eò, tanquam ad rem patrocini-
 dignam, & ex qua præmii aliquid se
 relatu-ros sperarent, avidè se confere-
 bant, sua & obsequia & excommuni-
 cationum fulmina oblaturi. Si ad has
 controversias disceptandas ac com-
 ponendas adhiberentur arbitri, ea re
 ad potestatem suam constituendam
 abutebantur, hinc scilicet jus in diri-
 mendis principum omnium litibus
 captantes: Ut Nicolaus primus in Lo-
 tharii regis causa. Sed iræ imprimis
 & contentiones, quæ inter principes
 erant, luculentæ illis & valde speciosæ

causſę videbantur, quas etiam cupidiffimè arripiebant, ut inde compendij aliquid facerent, & in aqua, ut dicitur, turbida piſcarentur: ad eos ſe adiungentes, per quos potentiam ſuam amplificarent. Omnibus tamen ſuis artibus & machinis efficere non poterunt, ut juris aliquid in hoc regno conſequerentur. Magna extitit filiorum Ludovici pij adverſus ſuum ipſorum patrem coniuratio. Ecce Papę in mediam hanc tēpeſtatem illico ſe conciiunt, nec ad patris, cuius cauſſa iuſtior erat, ſed ad filiorum partem, eamque deteriorē ſe applicāt, ex qua nimirum maiorem quæſtum ſe conſequuturos putabant. Nam Ludovico patri ſemper ſubjecti fuerant, nec quidquā uberius & quæſtuofius ex eo obtineri poſſe ſperabant. Sed ſuum ſtudium & operam ad liberos deferendo, ſibi certò pollicebantur, ſi ſuperiores eſſent, amplam ſe remunerationem adepturos. Gregorius igitur 4. in Galliam venit, Ludovicum ab Eccleſia abdicaturus, ut quidē plerorumque omniū
opinio

opinio hæc erat: sed continuò comperit Regem eare nihil moveri, ac regni Episcopis certum deliberatumque esse, sibi resistere: Itaque à consilio suo destitit, simulavitque se eo animo venisse ut pacem inter patrem & liberos conciliaret. Qui res eo tempore gestas memoriæ prodiderunt, ajunt Episcopos summa voluntatum & sententiarum consensione decrevisse, se Papæ quanquam excommunicationes suas minanti non obtemperaturos, voluntatique illius nulla in re cessuros: eumque ad eò, si excommunicaturus veniret, excommunicatum redditurum. Ea ipsa sunt eorum verba: propterea quòd perspectum penitus ac persuasum haberēt, Papæ non majorem quàm sibi ipsis potestatem esse. Hoc verò & in ejus temporis annalibus, & in eo qui Aimonii Monachi historiam persequitur, & in pervetusto quodam, quod D. Dionysii dicitur, Chronico scriptum extat. Atque illud primum habetur Paparum adversus Reges nostros tentatum præludium.

Deinde ex cōtentionibus inter Ludovici pii successores exortis, commodis suis consulere conati sunt, sed nihilo plus quàm antea promoverunt. Post primos autem Carlinorū familiæ principes, ut major Papis ab aliis nationibus honos tribuebatur, sic Reges nostri plusculum aliquid, aliorum potius exemplo, quàm ullius juris ratione, iis tribuerunt. At ut sibi dominarentur, ut regno imperarent, ut de se, suoque statu pro animi libidine statuerent, pati certè nunquam potuerunt: immo verò protinus omni ratione, & Marte etiam aperto, infestisque armis sese illis interdum objecerunt.

TER-

TERTIA PARS,

Quæ est rerum à majoribus nostris adversus Papas gestarum, ad eas, quæ hoc tempore occurrunt, accommodatio, ut quid nobis hîc agendum sit, intelligatur.

PRÆCLARE admodum ab oratore olim dictum est, cùm historia sit fidelis temporum testis, lux veritatis, vita memoriæ, nuntia vetustatis, eam quoque nobis eadem opera magistram vitæ esse. Cùm enim quædam incidunt, quæ aliquando antè acciderunt, tunc veterum monumenta exquirimus, ex quibus quid viri doctrina virtuteque præditi in iis egerint, & quid iis inde evenerit, planè cognoscamus: illudque nobis magistri fidelisque consiliarii vice est, à quo docemur, qua fide animique præsentia, sublata omni dubitatione, nos in iis gerere debeamus. Ad ea igitur, historias, quæ supra commemoratæ sunt, & quid in illis observatum sit,

referemus & accōmodabimus. Francorū hystoriæ, in iis quæ ad prima hujus Monarchiæ tempora pertinent, mancæ quodammodo & imperfectæ sunt: quòd prisci illi Galli benè rem gerere mallent, quàm multa scribere. At de postremis temporibus, in quæ Papatū cōtentiones inciderunt, pleniores eæ sunt, certiores, & pluribus testibus instructæ. Nec dubitandum est, quin hoc Dei providentia ita cōtigerit, qui multò antè provideret, quàm difficile nobis fuisset in tā gravi & ancipiti contentione certi quidquam statuere, nisi narratum nobis probatumq; scriptorum diligentia fuisset, quid Patres nostri à Papis indignè provocati, & sacris interdicti præstiterint: propterea quòd de religione hîc etiã agatur, quæ scrupulum & dubitationem animis nostris injicit, unde optima sæpe consilia impediri solent. Verùm Majores nostri ejus rei viam, quam ducebant esse rectissimam, tam multis ac præclaris exemplis tritam passim reliquerunt, ut si modò velimus, errare minimè possimus.

simus. Ea verò non semel, sed sæpe-
 numero acciderunt. Consilia non u-
 nius, aut paucorum hominum sunt.
 Solennia sunt senatusconsulta, & gra-
 vissima ordinum conciliorumque de-
 creta. Quod ad eorum exitus effecta-
 que attinet, si paulò attentius confide-
 remus, quales fuerint Paparum & fa-
 ctiosorum, quos suis artibus & opibus
 ad suam causam suscipiendam allexe-
 rant, conatus & machinæ: quàm lu-
 ctuosæ tragœdiæ in Germanorum Im-
 perio ab iis excitatæ, quæ item alio-
 rum ruinæ & mutationes: fatendum
 certè ac prædicandum nobis est, salu-
 berrima fuisse ejusmodi majorum no-
 strorum consilia, sine quibus nullum
 jam regnum teneremus, nulla liberta-
 te frueremur. Ea igitur exempla ma-
 gni apud nos esse debent, quippe quæ
 sint ejusmodi, ut nos fallere non pos-
 sint. Ita ut, si quærat quid nobis ho-
 die faciendum videatur, quum Papa
 excommunicationis fulmen nobis in-
 tentat, si regi parere sit animus, non
 magna hîc deliberatione & consulta-

tione sit opus, in eo etiã quod de conscientia agitur. exstat jam hæc, constatque planè sententia. Regni propria super hac re sunt nobis axiomata: Rex inde intelligit, quam virtutem, quàmque animi firmitatem & constantiam adhibere debeat: Senatus præscriptam in iis legem habet, quam sequatur: Clerus illic cernit, quid veteres regni hujus Episcopi & concilia de eo statuerint ac responderint: Denique nobilitas, militares viri, ac reliqui omnes docentur, qua fide & alacritate suo hîc Principi obsequi debeant.

Quoniam verò nullus est exemplorum usus, nisi res, ad quas probandas & illustrandas adhibentur, persimiles fuerint: ut nullus sit objectionibus relictus locus, docere mihi propositum est, nos in eadem omnino caussa versari in qua olim patres nostri versabantur. Si quid in ea re discriminis inesse videtur, id sanè quidem aut in Papæ proposito & consilio, aut in ipsius, & eorum, qui hunc tãtum motum mutationemque moliantur, aut in regis ipsius persona insit

insit necesse est. In Papæ autem scopo nullum omnino discrimen existit. Papa quidem Sfondratus in suis Monitoriis Bullis, speciosis prætextibus nempe verbis sanctimonix plenis, Dei nomine, Ecclesiæ cura, non caret: sed ea verba præpostero inverſoque sensu accipiendæ sunt, & eadem omnino ſignificatione, qua cætera quæ usurpare, nobisque identidem obtrudere solet, quū se servorū servum nominat, dum in thronū longè omniū excelſissimum ascendit, se omnium summum profitetur & gerit, ac regibus, principibus, Imperatoribus, imperiisq; omnib⁹ præfici dominariq; conatur, quum de sua submissione, & sua in nos benevolētia loquitur, dum tota mente in hanc curā incumbit, ut nos in miseram servitutem redigat, pedibusq; suis cōculcet & proterat: quū & is ipse & reliqui se Bonifacios, Clementes, Innocētios, Gregorios appellitant: præclara quidē ea nomina, quorū splendore, simplicium & rudium hominū oculos præſtinguāt, dum pessimè de nobis merentur, dum

luporum noctu grassantium more respublicas diripiunt, mortiferisque vulneribus cruentant: dum nos in imum, inferorum barathrum conjiciunt, & tanquam furia quædam dies noctesq; pervigilant, quieti nec tantillum indulgentes quò nova malorum genera excogitent, civiles motus concitent, universum (ut verbo rem complectar) orbem incensione, internecione, vastitate & interitu perdant. Sed veniendum ad rem est, videndumq; quò potissimum isthæc lenitatis species & verborum blanditiæ spectent. Sfondratus ægritudinem animi summam præ se fert, quòd in hoc regno tantopere ac tantum afflictemur, aitque se acerbissimo cordis cruciatu rumpi, quòd ita perturbemur, & à nobis ipsis discerpamur. At si tot tantæque nostræ calamitates, quibus ita divexamur, ejus mentem vel modicè tangerent, pacis ineundæ viam nobis aperiret, & ad eam ingrediendam hortaretur: aut, si ad rem tam salutarem necessariamque mentem atq; animum adhibere negligeret, saltem

tem pateretur, ut de his controversiis componendis, & nobis in pristinam concordiam reducendis cogitaremus. Illum fugere non potest, non nunc demum Ecclesiam dissensionibus religionis ergo concitatis exagitari. Ab ipsis Apostolorum temporibus, sæpeque postea id mali Ecclesiam invasit. Nec ignorat harum controversiarum dirimendarum rationem, arma apud veteres non fuisse, quæ jam tanto furore & pertinacia intentantur, sed concilia & placida colloquia. Si tranquillitati, utilitque nostræ consultum vellet, ille quidem se in nostri pacificationem interponeret, à diuturniore gravioreque contentione nos revocaret, has ad regni incendium accensas faces restingueret, & ad arma deponenda hortaretur; Regem etiã Hispaniæ & alios principes finitimos deprecaretur, ut per eos nobis aliquando quiescere liceret. Deinde regi nostro & aliis Christianis eodem animo & studio principibus præsto esset, suam opem & ope-

ram pollicens ad salutare piumq; concilium convocandum, in quo omnes de religione controversiæ quietè dirimerentur, & Christiana Ecclesia à tot perturbationibus cladibusque liberaretur. Si id efficeret, nosq; ad omnem animorum acerbitatem exuendam, ad omnes injurias ex animo delendas, ad nos mutuò reconciliandos exhortaretur: equidem illum nostris malis misericordia commoveri, nosque amore prosequi crederemus: ac tunc verum illum & Apostolicum spiritum, qui in D. Petro, in D. Paulo piisque aliis Dei servis, Ecclesiæque patribus elucebat, in eo agnoscere-mus, & laudaremus. At nihil aliud quam bellorum cōtinuationem proponit: etiamsi potuerit, quot quantisque miseriis ab annis triginta oppressi fuerimus, intelligere, & longa experientia cognoscere, bella inter nos civilia non esse accommodata ad nos in eādē religionem concordiāq; revocandos, rémedia: sed & potius addere oleum, quod aiunt, incendio, ac
totius

totius regni perniciem & exiliū accelerare. Idem conjurationem rebellionemq; auctoritate sua cōprobat. Bullæ illius huc tantū spectāt, ut à rege nostro deficiamus, si nōdum defecimus; hoc, inquam, suadent, ut bellum adversus principem, cui non defunt idonea ad sui defensionem subsidia, perpetuemus, & ad mutuam internecionem ac laniationem immortali exitiali-que bello ruamus. Illius igitur omnia de sua misericordia, tristitiaque verba, Crocodyli sunt lacrymæ, mera simulatio est. Qualis cæterorum Paparum scopus fuit, dum summi iuris in temporalibus & spiritualibus nomine, hoc sibi olim sumebant, ut hoc regnum, cui pro arbitrato suo imperare liceret, sibi subiicerent. Talis omnino Sixti postremi scopus fuit: talis etiam hujusce Sfondrati nostri mens & cogitatio, qui suas ad nos bullas hoc consilio mittit, ut obsequiū à nobis extorqueat: sperans tantillā mēbranā plūbeis orbiculis armata, totū terrarum orbē permiscere posse. In verbis quidem totaq;

oratione plusculū artificij, pluscylum etiā moderationis inest, quā in Bonifacii & aliorū ejusmodi literis, quòd sciant in ea se devenisse tēpora, quum Papa non eo loco & numero habetur, quo antea. At imperandi vbique cum summo jure eadem certè omnino voluntas. Nomina hæc Bullis illius præfixa, *Servus servorum*, *sancta sedes*, & ejusmodi alia, tituli sunt perhonorifici, qui ad alios summam auctoritatem deferebant. Et quidem Sfondratus nō ita potest ingeniū suum dissimulare, quin velit hoc de se nobis penitus persuasum esse has suas omnes cogitationes noctes diesq; (sic enim loquitur) eò duntaxat pertinere, ut alium nobis regem substituat. Ea est sollicitudo, quæ cor illius exedit & urit: ille animi labor est & vexatio, quæ illum respirare non finit. nempe obtinere à nobis vult quod decessores à majoribus nostris nunquam obtinere potuerant, summam in hoc regno potestatem, per quam totius regni status ab eo uno pendeat. Nam si hanc, quam molitur, rerum

rerum mutationem invehere potest, & regem ex animi sui sententia constitutare, quid jam majus ad summam in totum hoc regnum potestatem desiderare poterit? Atque hæc ambitio non minus in hoc, quàm in majoribus ipsius instructa est affectibus, iracundia & odio in hoc regnum concepto. Non minus etiam quàm cæteri in animo habet, regiam familiam funditus extinguere, & ad mutuam carnificinam nos concitare: Ut impedimentis omnibus, quæ illi obstant, quo minus regnum ad alium transferat, sese hac ratione explicare, atq; viam Hispanis (quo spectat illius animus) aperire, nosq; omnes durissimo miserrimę servitutis iugo subicere possit. Hæc cuivis obvia cognituq; facillima sunt. Vis semel dicam? In Papæ Sfondrati & decessorum ipsius, infestorum regni Gallici hostium proposito nullum certè discriminem apparet, nisi hoc verè unū, quòd furor major jam exardescere videatur, quàm antea. Conjunctio enim aduersus regni statum eadem semper

conflata est, cum qua finitimi hostes
sua arma, populus religionis specie de-
lusus & excæcatus, rebellionem; Papa
verò suas de more fulminationes con-
jungunt. Pactio de hac regni aliena-
tione jam dudum inter Papas & Hispa-
nos facta est. Papa præmium hoc ab Hi-
spano pactus est, ut Ecclesiæ universæ
primatum in hoc etiam regno pecu-
niis & armis Hispaniæ tranquillè obti-
neat: Rex verò Catholicus hoc vicif-
sim à Papa est stipulatus; ut Papæ ex-
communicationibus instructus, & in
Gallia & in reliquis Christianæ p̄fessio-
nis finibus summū Monarchæ impe-
rium & auctoritatem consequatur. Ita-
lia, ut eò facilius perveniretur, no-
bis adempta est. Illius principatus, Ro-
manæ Ecclesiæ beneficiarii, ad Hi-
spani ditionem & Imperium translati
sunt: suffragia in purpuratorum Car-
dinalium cōclavi imminuta nobis, Hi-
spanis verò aucta sunt: Concilii Tri-
dentini actu, præcipua sedes nobis e-
repta fuit, & Hispanis attributa: Ideoq;
seditionum faces in nobis, sub zeli &
religio-

religionis nomine accendunt, ut nos viris, viribus, opib⁹, & mutua benevolentia exuti, illis ipsis, qui infestis animis, funestisque armis nos invadunt, dedamur.

Quod ad Papæ Sfondrati (ut & Sixti decessoris, qui defunctum regem suo quoque fulmine aggressus est) personam attinet, non plus equidem pietatis, non plus veri zeli & integritatis in eo, quàm in aliis reperiemus. Romanum se Papam vocat: nomen illud est, quo veteres Episcopi cognominabantur. Hoc nimirum innuit, si sciret & optimi Episcopi Romani (quales primi illius Ecclesiæ Episcopi fuerunt) munere fungeretur, nihil curare & agere aliud debere, quàm gregem suum Evangelii prædicatione pascere. Constat, qualis fuerit à multis sæculis Urbis Romæ status: Quàm amplam piis & eruditis viris ut Petrarchæ & aliis, ipsi etiam divo Bernardo de illa scribendi materiam suggesserit, tanquam de fecunda omnium flagitiorum, turpitudi-

num, & abominationum matre, de Babilone quadam, atq; adeò de Sodoma & Gomorrha ipsa, & si quidquam aliud in universo Mundo unquam fuit sceleratius & detestabilius. Sed ea hodie longè depravator & corruptior evasit. Si Sfondratus bonus esset pastor, qualis haberi vult & dici, atq; aliquo duceretur muneris sui obeundi studio, satis domi haberet quod ageret, in expurgandis & emendandis Cleri sui sordibus, & omnibus urbis suæ partibus. Sed his minimè movetur: longè altiora & magnificentiora meditatur & suscipit. Quis tamen credit illum zelo satis ardenti flagrare, satisq; magna sapiëntia præditum esse, ut universum terrarum orbem satis dignè moderari possit, & bonum etiam pastorem, ut sese nobis venditat, inter nos agere, cum nullam suæ familię curam habeat, & vicinorum saluti nullo modo prospiciat & consulat? At Evangelii prædicatione gregem pascere, humilior quiddam est & vilior, quàm ut Papā eò se demittere deceat. Hoc etiam

etiam restrictius est ac servilius, si aliis ad placidiorem & modestiorem vivendi rationem exemplo esse cogeretur. Arrögantia, quæ ab istis terrarû & imperiorum omnium dominis ad alios perpetua serie trāsīt, longè sublimiora petit. Episcöpatus jamdudum iis sordet. Successionis, paupertatis & ignobilitatis Apostolicæ eos jampridē tædet ac pudet. Principatû spirant, Dominatum noctes diesq; cogitāt. Quod si Apenninus, superumq; & inferum mare, istam superbiam capere & coercere possent, ferenda ea utcunque videretur. At ea est isthæc ambitio & avaritia, quæ totum terrarum orbem pervadere, quæ omnia effodere, congerere & vertere, sibi que vendicare possit. Tota illa dignitas, mera est magnificentia; merus luxus, meræ voluptates & deliciæ. Quin eò furoris & fastus vêtum est, ut si vilissimus quidam Caprarius (cujusmodi olim Sixtus fuit) hoc summum totius orbis imperium assequutus fuerit, amplitudò & sanctitas illius postulet, nō esse prius

ex hac sibi vita emigrandum, quàm filios ac propinquos suos Duces, Comitesque, de illo D. Petri scilicet patrimonio effecerit: & si fieri potest, bellum aliquod conflauerit, cui gerendo eos præficiat. Quod nunc Sfondratus agit, dum copias sub consanguinei sui ductu & auspiciis in nos immittit. Ut autem sumptus ad eam rem necessarii suppetant, illi sunt subvertenda, euel-
lenda, dissipanda omnia (His enim verbis Sixtus in sua adversus defunctum regem Bulla utebatur, Jeremiæ loco abutens), hoc est, mundi regna & imperia evertenda illi sunt, ut nova alia excitentur. Sed diutius hanc Camarinam movere non est animus. In sermone de illorum in principes nostros studiis & actionibus instituto maneamus, & ex insignioribus quibusdam illorum actis videamus, an hi postremi Papæ saniores sint (quod ad ipsorum personas attinet) & sanctiori spiritu regantur, quàm alii quibus successere. Sixtus ille (cujus modò memini) ex recentioribus illis primus fulminibus &
excom-

excommunicationibus principes nostros est aggressus. Audiamus verò quā moderatione & modestia. Audita statim Guisii Ducis & ejus fratris morte, Papa iste videns cruentæ hujus contra Henricum tertium conflatæ conjurationis (cujus caput & auctor erat) spem infractam & desperatam esse, pro ardenti suo in Catholicam Ecclesiam zelo, incredibili quadam iracundia vel potius furore correptus, nulla hîc legitima actione, ut nec in superioribus regis nostri, qui hodie rerum potitur, ac defuncti cognati illius Condæi principis excommunicationibus maturè observata, fulmina sua statim arripit: præ desperatione perstrepat, fremit, spumat ex ore scelus, crudelitatem anhelat, diras concrepat, infano murmure complet omnia, horribilibus minis ex arce sua tonat: & vindictæ æstu quodam absorptus, furias ex ipsis inferis excitare statuit, per quas populum Gallicum adversus regem & moderatorem suum concitet, eum & hæreticum & hæreticorum fautorem, &

Ecclesiæ hostem pronuntians : Eum ipsum, inquã, quem paulò antè ob singularem suam pietatẽ, laudibus in cœlum ferebat, quem filii nomine ornabat, quem etiã Christianissimum regem appellabat. Præclarum verò Papæ illius iudicium, recta conscientia, & paternus, quo se Galliam nostram prosequi dictitabat, animus : denique candor & integritas, quam tum ipse, tum alii in suis emittendis excommunicationibus adhibuerunt. quid enim causæ apparebat, quamobrem defunctum regem ut hæreticum, & hæreticorum patronũ criminaretur? quænam occasio subesse videbatur, cur principem ab Ecclesiæ communione abstraheret, qui à subditis suis debitas ac meritas pœnas gladio sibi à Deo tradito persequutus erat, & se quidem ab imminente ac dudum meditata cæde, populum verè à misera servitute vindicaverat? Deinde cùm nostri conjurati per emissarios suos Romam effusis habenis contendentes, pontifici & expetitam & machinatam tamque

que diu tantoque opere regis à Monacho quodam perfidè interfecti cēdem renuntiassent: quo ore, quāve fronte, effrēnatam illam ex facinore ita inaudito & horrendo, & ob quod stupore omnia perculsa, lacrymis omnes perfusi erant, cōtractam lētitiā dissimulavit? Totā Romā omni voluptatum & triumphorum genere exultante vel bacchante potius, Sixtus Cardinales & alios clientes suos in consistorium cōvocat, concionem Papalem apud eos habiturus. Id actum 11 Septemb. 1589. Ejus argumentum fuit, proditorem illum & perfidum Monachum sui regis parricidam, in Divorum numerum referendum, illiusq; zelū magnificis laudibus ad astra usque extollendum esse. Quoniam verò non ignorabat in comparationibus plurimū inesse momenti ad præclarum aliquod facinus exaggerandum, si cum laudabilissimo alio quodam conferatur: cū nullum satis gloriosum facinus in iis omnibus quæ de heroicis illustrium virorum actis referūtur, illi occurreret, quod cum illo

conferri meritò posset : ex Deo ipsa
comparationem illam repetit (tantam
scilicet Dei operam, & eorum maxi-
mè quæ in nostra redēptione cernun-
tur, rationem illius sanctitas habuit) ac
principis Christiani parricidiū, mona-
chi ipsius subditi perfidia patratū cum
mundi creationis opere (horresco re-
ferens) atq; adeò Incarnationis Chri-
sti, & aliis salutis nostræ mysteriis com-
parare nō veretur. In secunda pontifi-
ciæ illius cōcionis parte, demortui re-
gis, quē nefariis suis cōsiliis crudeliter
trucidandum curaverat, infandis mo-
dis lacerat. Tandē omni contumeliarū
genere bacchatus (pro ea quam Papæ
quod malū est, bonum judicādi, & ita
quidem, ut nulli refellere id impunè li-
ceat: itémq; ad inferos etiā ipsos quos-
cunq; & quomodocunq; libuerit, de-
trudendi sibi sumunt, potestate ac li-
centia) è suo suggesto declarat, regem
apud inferos damnatum esse, pecca-
tum adversus spiritum S. admisisse, nec
preces pro illo esse fundendas. Quin
& sancit, ut omnibus justorum func-
brium

brium honoribus, quibus principes ornari solent, privetur. Quæ quidem egit omnia, tanta & animi acerbitate, & orationis acrimonia, ut, si mortui cadaver Romæ fuisset, proculdubio de illo aut in foetidam cloacam, aut in sterquilinum quoddam projiciendo sententiam fuerit laturus. Illius deinde sanctitas de Dei providentia & justitia sermocinatur, tanquam si divino spiritu Monachus ille afflatus impias manus Domini uncto injecisset, divina etiam virtute ideo confirmatus, tam immane parricidium confidentiùs patrare ausus fuisset. Ut paucis dicam, illius concionis hic unus scopus fuit, ut perfidum illum sicarium & sui etiam regis (à quo fuerat summa humanitate receptus & intromissus) homicidam magnificè prædicaret, & cum divis adeo ipsis æquaret. En Evangelium, quod Sixtus Papa Romæ annuntiabat. Quis nostrum arbitratur id posteritati credibile fore? At Papa eam orationem intra cōclavis septum contineri non passus, in vulgus edendam.

curavit: usq; adeò eam probabat, & ad prodenda nationibus omnibus, & toti etiam posteritati manifesta suæ eloquentiæ, doctrinæ & summi in Catholicam Ecclesiam zeli testimonia satis virium habere judicabat. In hac verò tanta, qua tunc fruebatur, alacritate & lætitia, ecce alius de Henrico 4 felicissimè recepto, deque admirabili principum, primariorum coronæ ministrorum, Nobilitatis, fideliumque Gallorum consensu ad restituendam illi regiam auctoritatem, & regis mortui cædem vindicandam, nuntius intervenit. Audito verò Henrici 4 nomine totus cohorrui Sixtus, simul & magis ac magis furere bacchariq; cœpit, quum videret, eum, quem suarum excommunicationum vi omnino exaugurasse putabat, in thronum regium evectum esse. Comminiscitur, secum animo volutat, consilium cum suis captat, decernitque tandem universum potius Acheronta movere, quàm patiatur regni Gallici administrationem in ejus manu esse, cujus nomen egregiæque

giâque facinora & virtutes terrorem sibi horroremque singulis horarum momentis incuterent. Dum ea dubitatione æstualet animus, seque in omnem partem subinde versaret, Jesuitarum & Ecclesiasticarum Parisiensium decreta ad eum afferuntur furoris & sanguinis plena. Sixtus occasionem arripit, speratque satis inde & argumenti & præsidii nactum se esse, ad regem vel chartulæ frusto opprimendum, dummodo chirographum suum illi apponeret. Sed in ea jam tempora ventum est, quum Papæ non tam facile quàm olim tenebras nobis offundunt, nec in suam qualemcunque sententiam trahunt. Earû propositionum hæc erat sententia, jure divino (hoc est eorum, qui se Deos in terris profitentur, jure) Gallos non posse Henricum 4 pro rege suo agnoscere, sed debere infestis armis usque persequi eum, qui de pace cum illo facienda vel cum animo suo cogitabit, pro hæretico habendum: cōtrà, qui in sacro hoc bello pro Romana Ecclesia, pro regni libertate,

pro harum propositionum auctoritate tuenda suum sanguinem, vitamque effunderent, beatissimos Martyres, uno quidē martyrii genere, perpetuū fore. Id factum est 14 Martii mensis die Anno 1590, eo ipso die, quo Deus in Santandræa planitie ad fluvium, qui hodie Eurus dicitur, longè alia manu consignabat futuri coniuratorum excidii decretum, per victoriam quam Regi nō Bullis .i. verbis & nugis, sed re vera dedit. Atq; hæc consiliorum & actionum Sixti contra Reges nostros & hoc regnū specimina q̄dam feruntur.

Sfondratus illi in Papatum successit (Deus enim per feralem & atratum lictorem, provinciæ administratæ rationem ab illo mox repetiit). Hic summus pontifex inauguratus decessoris sui Spiritu imbutus illico, indutusque fuit. Atq; ut pacem cum Hispano rege (cujus cōsiliis & corruptelis pontificatum erat adeptus) factam præstaret, & Galliæ occupationē faciliorem illi efficeret, majora etiam & graviora quàm Sixt^o in animo suo molitur. Six-

tus enim bullis nos terrere & decretis contentus, de ærario augēdo magis laborabat: Hic verò ut olim Julius 2, clavibus S. Petri & spiritualibus armis, quæ in Sixti manibus parùm omnino poterant, nō admodum confidens, utendum sibi gladio putavit. valde stomachatus, quòd per ingravescentis senectutis incōmoda thorace quoq; armari, & in equum insilire, Julii in modum, non posset. Sixtus brevi tempore ingētibus gazis arcas suas collocupletaverat; hic sacrilegas manus illis afferre audet, tantum nummorū erepturus, quantum ad cōparandum exercitum satis esset. Deus tunc ex alto intonuit, & fulmine Capitoliū percussit: Unde populus Romanus id, ut infaustum & ominosum incepti pōtificii auguriū, accepit, obmurmurans illiusq; consilia detestatus, quòd pecunia, quæ adversus infideles Turcas destinata erat, contra Christianos impenderetur, & cōtra illud regnū præcipuè, quod præcipuum semper fuisset, Christiani imperii propugnaculum & salus. His igitur auspiciis Sfondratus pontificatum

init. Ego autem istorum pontificum, qui & harum perturbationum autores fuerunt, & perneciale hoc bellum nobis conflagrant, facta aliquot de industria proponere volui, ut docerem inter eorum, qui olim & regum & regni hostes fuerunt, & horum, qui hodie dominantur, furores nihil omnino interesse: Ac proinde, ut in bello, quo nos vexant, causa nihil dissimile est, ita quoque, quod ad eorum personas attinet, nihil omnino nisi fortè à majori ad minus fiat collatio, dissimile esse. Nam verè fatendum nobis est superiores illos Papas, quàmvis effrenata adversus Patres nostros audacia & vassania insignes, ab horum tamen odiis, furoribus & violentia longissimè abfuisse.

Iam hoc restat, ut expendamus, An in Regis persona dissimile aliquid videatur. Nihil autem omnino dissimile esse, ex his quæ dicam, probaturum me spero. Et quidem quin Rex verus sit & legitimus regni successor, coniuratorum adhuc nemo in disceptationem

hem quæstionemq; vocare ausus est, nec Hispanus, nec Sabaudus, nec Guy-
sius, nec Lotharingus, nec Papa: etsi
horum singuli, pro sua quisque parte
in regni societatem venire conten-
dant. Quin ille etiam regno sit dignif-
simus, & præclaris omnibus virtutibus
ad amplissimum regnum gubernan-
dum necessariis instructissimus, con-
juratorum certè illiq; infestissimorum
hostium (etsi ambitiones & impu-
dentia eos omnes qui antea fuerunt
superatium) nullus id negare unquam
ausit. Etenim pacis belliq; artes, qui-
bus inter cæteros maximè princeps il-
le floret, tam magnæ tamque illustres
sunt, ut nullus existat, qui de eo aliter
aut sentire aut loqui possit. Quamob-
rem, eū tot animi corporisq; dotibus
clarum omnes (eos dūtaxat unos, qui
cum insignibus barbarū pectus, arma-
que Hispaniæ hostilia induentes, Gal-
licum simul animum exuerunt, sem-
per excipio) veri, inquā, Galli omnes
eum, Dei beneficio amplectuntur, a-
mant, prædicant & colunt, ut nullum

ex ipsius maioribus unquam magis: Quin & ingenuè agnoscunt ac profitentur, tali nobis Dei ipsius benignitate peropus fuisse, qui sua prudentia animique magnitudine Gallicum regnum ex hoc, quo demersum est, naufragio, eripiat, & in optatum portum, in pristinam videlicet dignitatem ac splendorem restituat. In quo igitur à priscis regibus differt? Coniurati cum esse hæreticum, relapsum, excommunicatum criminantur. Mihi autem non est iam propositum longam & accuratam defensionem instituere, ut doceam id quod obiicitur falsissimum: & quanquam verum esset, cum tamen quando talem nobis Deus dederit, pro Rege habendum, illiq; obtemperandum esse. Hæc pluribus & accuratius in multis libellis in eãrẽ præcipuè editis disputata extant, quos lectoribus perlegere & diligenter examinare operæ esse pretium puto, ut huius quæstionis cognitionem explicatã illustremq; habeant. Paucis tantummodo dicam quantũ satis esse

vide:

videbitur ad intelligendum statuen-
dumq; nihil prorsus in hac tota cōtro-
versia scrupuli esse, quod obstare de-
beat, quominus majorū adversus Pa-
pas exempla in hac & animorum cō-
tentione & armorū dimicatione con-
sulamus, atq; ad imitandū etiam nobis
proponamus.

Papę Regem hæreseos crimine da-
mnarunt & à sacris abdicarunt. Ea ve-
rò damnatio nullius momenti esse de-
bet. hic enim mos pro Paparum tyran-
nide & furore invaluerat, ut Reges no-
stri quodocunq; iis ita liberet, hære-
tici, schismatici, & Ecclesiæ hostes, ut
antea patuit, pronunciarentur, etsi lō-
gè aliter se res haberet. Ita Sixtus Hen-
ricum 3 in crimē hæreseos recens vo-
cavit, etsi falsum id esse omnibus con-
staret. Papę ergo, qui mentiri consue-
verunt, & qui furore atque amentia
cæci in summos quosque & optimos
principes iniurias temerè & incōside-
ratè, ut bruta quædam fulmina, ja-
ciunt, non sunt audiendi. Papæ etiam
ipsi Regis nostri infensi adversarii in-
festiq; hostes, ea de re sentētiam, quæ

fit alicuius quidem ponderis, ferre iure non possunt, nisi omnem & legum & iudiciorum ordinē pervertere velimus. His accedit regis ad concilium provocatio, quæ iudicio cuilibet moram afferre debet: & nulli, quanquam loco, genere ac dignitate longè inferiori, in re præcipuè tâta, denegari potest. Ac nostri maiores qui toties ea usi sunt, quoties à Papis hæretici & excōmunicati declarabantur, id tanquam verum atq; efficax adversus omnem Paparum auctoritatem remedium senserunt ac statuerunt. Addamus & hos Reges principesque nostros Paparum censuris ex ipsorum etiam (quum ad saniorē mentem redierunt) consensu & cānonibus minimè obnoxios esse. Verūm, ut liberius dicā quod sentio, illud procul dubio constabit, etiamsi Rex, qualem obiiciunt, talis revera esset (quod Dei beneficio falsum est, idque postea probaturum me spero) iustam tamen Papæ causam nō fuisse, cur nequid obsequii illi præstaremus ediceret, atque eorum, qui con-

con-

conjuracione facta eum bello persequuntur, rebellionem comprobaret. Neque enim Papæ est ea de re quidquam statuere: Dei unius est, qui ei rei jam providit, eamq; tam claris certisq; in Ecclesia testimoniis comprobavit, ut qui cōtrā differere volet, mala mente cum veritate ipsa pugnare sit iudicandus. Dei est, inquam, reges & principes in toto mundo constituere, & quidē tales, quales ipse voluerit. Quū verò eos constituit, Deiq; vocatio certa est, non jam contrā disputare, illique repugnare licet. Id enim si liceret, nulla unquam inter homines certa, firmaque vocatio constaret. huic nimirum contra regem de hac re certamen esset, illi de alia: & qui omni virtutum genere cumulat^s multis placeret, pluribus idem displiceret. Unde in regnis & imperiis nihil unquā stabile, fixum, ratumque permaneret; sed alia atque alia subinde nasceretur mutatio & cōfusio. Regū autem vocatio certa est, nec dubitare possumus quin Deus eos nobis dederit, quum ordine & via uni-

cuiq; imperio majorum exemplis usitata ac trita illos habemus: ibi electione, alibi forte, hîc successionem pro varia variorum imperiorum constitutione. De vocationibus ordinariis loquimur. In Galliis nostris Dei vocatio in successionem cernitur: quem ordinem patres nostri probarunt, suisque & regni totius rationibus opportunissimū esse senserunt: atque reges suos à Deo ipso hac sibi ratione & via dari ita agnoverunt, ut potius, quàm ei repugarent, pueros pro regibus suis acciperent: aliquando etiam eos, quod mirè re magis, qui nōdum nati erant, expectantes dum matres puerum enixæ fuissent: Si qui verò ex iis mente non admodum valerent, id æquo animo tulerunt, ita ut nihil illis de cōsueta dignitate & auctoritate detraherent. Cū igitur notum manifestumq; omnibus sit, Henrico 4 regnum successionis ordine obtigisse (nemo enim in dubium id revocat) haud dubitandū nobis est, quin Deus illū nobis præfecerit; præceperitq; ut omnes illi obsequiū præstemus,

stemus, alioqui illi⁹ voluntati repugnaturi. Omnis anima potestatibus supereminentibus (Apostolus ait) subiecta *Rom. 13.* esto. Non est enim potestas nisi à Deo, & quę sunt potestates, sunt à Deo ordinate. Itaq; quisquis se opponit potestati, Dei ordinationi resistit: qui autē resistunt, ipsi sibi condemnationē auferēt. En Dei decretū, contra quod contēdere est nefas. Optandū quidem, ut principes omnes pii pbiq; essent, sed *August. de civit. Dei lib. 5. c. 21.* optio in uno Deo est, qui non semper bene moratos reges nobis constituit, seu populi plectēdi cōsilio, seu quacūque alia causā ductus, pro variis iudiciorum suorum causis, quę plerunq; nobis obscurę & ignotę esse solent. *33.*

Infideles verò, atq; in vera religione peregrinos & hospites, atq; adeò illius hostes, paganos aut alios ejusmodi, dubiū non est quin Deus etiam ipse constituat, velitq; ut omnes iis subjiciantur. Ad Dei enim mandata exempla *Rom. 13. Tit. 3. 1 Pet. 2. 2 Pet. 2. Jude 1. 1 Tim. 2.* etiam, quibus id probatur, multa accedunt. Nō citabō hīc omnia Apostolorū testimonia, quę in novo testamento

cuique obvia sunt. Summa illuc pertinet, ut sciamus in iis à Deo præcipi, regem & eos, qui publico alicui muneri ab eo præficiuntur, principes & gubernatores honorandos esse: Ut breviter dicam, omni humanæ politiæ parendum, principum nostrorum prosperitatem optandam, votaque pro iis facienda. Illud autē de Imperatoribus & Magistratibus, qui tunc inter homines agebant, dictum erat. Nam Christus etiam ipse, ut omnē dubitationem tolleret, Cæsarem nominat, qui tum

Matt. 22. Imperator erat, dū ait, Reddite Deo, quod Dei est, & Cæsari, quod Cæsaris. Atq; corā Pilato, qui Imperatoris nomine Judææ procurator erat, id de illo agnoscit. Illi autē omnes Pagani erant Ecclesiæ hostes, & fortasse omniū, qui unquam fuerunt, sceleratissimi principes. Sub lege, Assyrii totius orbis Monarchiam adepti, armis Judæos subegerunt. Deus populū suum per Prophetas docuit id ita ex decreto suo fieri, seque velle ut Nabuchodonosoris & filiorum ipsius imperio subjiceretur,

tur, ac pro eorum, quanquam flagitiosorum, & Ecclesiæ persequutorum salute deprecaretur. Non quòd obtèmpèrandum iis esset, siquid contra honorem & cultū, quem Deo imprimis debemus, imperarent. In eo enim genere, honor qui Deo debetur, primum locum tenere debet, ut movent Apostoli his verbis: Præstat obedire Deo quàm hominibus. Sãcti Prophetæ, Apostoli & martyres illud etiã *Act. 4 & 5.* ad hunc modum observarunt. Ut verò cives contra Principes se cõmoveant, seditiones concitent, imperia perturbent, obedientiæ & officii erga eos sui munera abjiciant, & relinquunt, Deo certè nunquam placuit. Quod ad exempla attinet, id semper ita usurpatū fuit. Populus Israeliticus in Ægypti regum ditione potestatéque fuit (quanquam illic tantū commoraretur ut hospes & peregrinus, non ut civis & incola habitaret) & servitutis, quãvis durissima, jugum cervicibus suis impositum patiēter tulit, nec de eo excutiendo cogitavit, donec Deus liberatorẽ si-

bi extra ordinem suscitasset: neque id tamē aggredi voluit, nisi cum bona regis ipsius venia. Postea captivi ad Assyrios abducti sunt, eisq; paruerūt. Christi verò tempore, & trecentis circiter ab eo annis, fuere imperatores perpetua serie pagani, & in provinciis Magistratus, crudelissimi Christianę religionis hostes, qui multos vel potius innumerabiles Christianos omni suppliciorū genere excarnificatos trucidarunt. Mos tamen illis perpetuò gestus fuit, nec ulli unquā Christiani obsequium illis recusarūt, etiā si potuerint: sed potius eos coluerūt, de illis honorificè loquuti sunt, tributa contulerunt, sub illis stipendia in bello meruerunt, in iudicio se stiterunt, pro illorum salute & prosperitate preces fuderunt, aliāq; omnia (ut in Ecclesię historiis, eorundē-
Enseb. lib. 4. c. 15 & 7. c. 11.
Justin. Apolog. 2.
Tertull. in Apologet. que Apologiis & testificationibus perspicipote) obediētię munera iis præstiterunt.

Quod verò de obediētia & submissione paganis debita dictū est, ad principes etiam hæreticos referri debet, si

Deus

Deustales dederit. Non minùs enim paganus à salute alienus est, quàm hæretic⁹, cùm sit idololatra, atq; in omnibus fidei partibus & capitibus corruptus : hæreticus verò in paucis aliquando. Utut se res habeat, divini mandati ratio utrobiq; eadem est : Uterq; enim à Deo est constitutus, quum ordine & vocatione in imperiis usitata & solenni, in rerum administrationem venit. Atque exempla ab omni antiquitate, eam semper fuisse hac de re Ecclesiæ mentem, satis ostendunt. Sub lege sæpenumero principes quidam à fide veraq; doctrina deflexerunt, in ejusque locum, idololatriam falsumque & impium cultum substituerunt : neque solùm, sed crudelissimi etiam Ecclesiæ vexatores fuerunt, ut Saulus, Achab⁹, Manasses & alii, quibus tamen propria & stabilis fuit regia sua auctoritas. In Ecclesia similiter Christiana fuere imperatores hæretici, Ariani, qui hæreticis pro virili faverent, crudelissimè verò Domini Ecclesias, & pios atque orthodoxos Episcopos

vexarent; nemo tamē Christianorum se contra eos commovit. Quinetiam eorum quidam Paganus fuit simul & hæreticus, & siquid deterius dici aut etiam fingi potest, cognominatus Apostata: quo Ecclesia nullum infestiorē hostem unquam habuit. Julianus ille fuit. Imperator tamen habitus est, illiusque mandatis obtemperatum. Harum rerum exempla, eaque permulta, sibi omnia cōstant, nec quisquam in doctrina fidei probè institutus contrā unquam sensit, faciendumve censuit. Prophetarum quidem temporibus Iudæi seditiones concitarunt, & ab Assyriis Chaldæisque defecerunt: sed ob id & à prophetis reprehēsi, & à Deo ipso gravissimè multati sunt. Per Apostolorum tempora perversi quidam turbulentiq; homines extitere, qui malè de Magistratibus loquerentur. At D. Petrus & D. Judas in eos scripserunt: ex eorumque verbis satis colligi potest, seditiosos illos fuisse nequissimos quosdam nebulones, qui libertate Christiana abute-

rentur.

rentur. Post Christi mortem Judæi idem quoque adversus Romanos tentarunt, dictitantes se esse Dei populum, ideóq; infidelibus Imperatoribus obnoxios esse nō debere: Sed iustas gravesque Deo suę rebellionis pœnas dediderunt. Anabaptistæ idem omnino ætate nostra fecere, sed satis superque perspicuum est, eos fanaticos homines & à mente alienatos fuisse. Denique quotquot senserūt, principes pietatis religionisque veræ expertes non esse colendos, illi omnes furiosi fuere, mentis impotes, iustóque Dei iudicio furoris sui pœnas luerunt. Papa tamen illud dogma suis illis bullis sacrisque admonitionibus, nostris animis inferere omnino tentat, Regem infidelem esse, & regno suo per nos demovendū. Nempe hoc illud est Evangelium, quod ubiq; terrarū per ministros suos Jesuitas, barbararum civilium faces, prædicandum curat: Illa etiam sunt Theologorū Parisiensium, qui cum nostris conjuratis faciunt, decreta.

Rationes & fundamenta, quibus ad

has faciendas turbas utuntur, ea ipsa sunt, quæ seditiosi quidam Iudei, Anabaptistæ alique principatum & Imperiorum hostes, imperiti vulgi aurbus inculcabant. Proponunt rem esse indignâ, Ecclesiam, quam Deus tanti facit, & populum, quem Christus suo ipsius sanguine redemptum in libertatem vindicavit, sceleratis principibus ita subiici atque auctoritatem & potetiam in eorum manibus esse, qui ad divexandam Ecclesiam ea impiè & crudeliter abutantur. At respondemus, satis quidem hinc causse esse, cur tanto pressi onere, vehementer ingemiscamus. Verùm respiciendus nobis Deus est, qui de eo ita statuit, quique satis magnas id faciendi causas semper habet, sive pœnas sceleribus nostris debitas à nobis repetere, sive fidem patientiamq; nostram, salutis nostræ, gloriæque suæ gratia probare velit. Id quod nec gratiæ, ad quam nos vocat, nec Ecclesiæ dignitati, nec ei, quam Christus nobis comparavit, libertati quidquam obstat: quoniam

ea omnia spiritualia sunt. Addunt quoniam inde sequuturi sint casus & pericula, ac proponunt Ecclesiam gravissimis ob id incommodis & calamitatibus multatum iri, præcipuè si Principes heretici fuerint. At respondetur à Deo hæc non fieri, quin casibus & incommodis illis, quæ metuuntur, providere, eaque ab Ecclesia sua propellere facile possit. Summum quidem in eo periculum est, ne hæresis sub heretico, ut Paganismus sub Pagano, ad plures serpat, & in dies latius manet.

At D. Paulus nos docet hæc non ita I. Cor. II venire sine Dei consilio, oportereque internos hæreses etiam esse (hæc sunt illius verba) ut, qui probati sunt, manifesti fiant. Deus varia in Ecclesiam probationum genera immittit, non ad perdendos suos electos, sed ad eorum potius salutem promovendam, suamque ipsius gloriam propagandam. Inter eas autem probationes, hæc præcipua est, ut Evægelii veritas aliquando ab hæresi & mædacio invadatur: sed ex evetū qui consequitur, Deus eos qui ve-

rè sui sint, dijudicat & patefacit, ipsius-
 que veritas quotidie magis elucet, eni-
 tescitq; magis, ut experientia probat.
 Papa Sfondratus Theologiæ valde pe-
 ritus vult videri, ejusque rei probandæ
 gratia quendā secundæ ad Corinthios
 epistolæ locū p̄fert, nullū consortium
 justitiæ cum injustitia, nullam cōmu-
 nionem luci cum tenebris, nullā con-
 cordiam Christo cum Belial, nullamq;
 partem fidei cum infidei esse: unde
 concludit ejiciendos esse principes,
 deque rerum administratione detur-
 bandos, qui non eandem cum Papis
 religionem profiteantur. Si Papa ma-
 jorem sacræ scripturæ cognitionē, in-
 telligentiamq; in cæteris locis non est
 assequutus, meram sanè ignorantiam,
 vel insignē potius malitiā apertissimè
 indicat. Nam ut Apostoli mens & sco-
 pus attentè consideretur, locus ille ni-
 hil prorsus ipsius sententiā juvat. Apo-
 stolus enim sæpius alibi verba fecerat
 de obedientia & obsequio, quod prin-
 cipi debetur, docueratque impieta-
 tem quæ in iis apparet (qualis in ejus
 sæculi

2 Cor. 6.

sæculi principibus re vera inerat) nulli
 impedimento esse debere, quo mi-
 nùs illis pareatur. In hoc tamèn loco
 vetat, ne impari iugo cum infidelibus
 copulemur. Nec verò à se ipso dissen-
 tit Apostolus. Nam quum præcipit ut
 principum nostrorum partes sequa-
 mur, iisq; cedamus, id ad res huma-
 nas, quæ in illius imperio sunt, referen-
 dum est: Hîc verò quum prohibet, ne-
 quid commerciis cum impiis habea-
 mus, id de rebus divinis, & quæ ad fi-
 dei Christianæ professionem spectant,
 est intelligendum. Corinthii, qui non
 satis animo percipiebant, quantû ma-
 li adferret sacrificiorum, quæ idolis à
 paganis fierent, & aliarum rerum quæ
 ea comitarentur, participem & con-
 scium esse: ad idololatrias, in eorum
 viuendi ratione, inconsideratiùs sese
 adjugebant, ut D. Paulus pluribus
 prima sua ad eosdem scripta Episto-
 la, ea de re differit. Illud verò erat
 iustitiam cum iustitia, lucem cum te-
 nebris, Christum cum Belial misce-
 re velle: quod fieri minimè debuit.

Deus enim maiori puritate & sinceritate colendus est, atque ab iis omnibus quæ Evangelicæ fidei, & illi, quem verbo suo præscribit, cultui adversantur, nobis discedendum. Hæc est Apostoli in eo loco sententia: ut clarius de ea nobis cōstabit, si quæ in utraq; Epistola scribit, diligenter cōferamus. At in iis quæ ad res humanas seu tēporales attinēt, non idem est nec sentiendum nec agendum. Nam si in illis nulla omnino esset nobis cum impiis & sceleratis, quibus mundus est refertus, habenda ratio & cōsuetudo, è mundo ipso nobis esset exeūdum, ut idem Apostolus ad Corinthios scribēs docet: *1. Cori. 5.* Scripsi, inquit, vobis in Epistola, ne cōmisceamini cum scortatoribus. At nō omnino cum scortatoribus Mūdi huius, aut cum avaris aut cum rapacibus, aut idololatrīs: alioquin debetis scilicet è Mundo exire. Hīc idololatræ & infideles ipsi apertè nominantur. Innuit autem Apostolus ex hoc cū rebus ad hanc vitam pertinentibus cōmercio, (veluti quum principes pagani & infideles

deles nobis regendis præficiuntur) cōscientiam nostram pollui non posse, dummodo in nullam cum falsis illorum religionibus societate veniamus. Christi & Apostolorum ea fuit mens. Christus enim ipse Cæsari obediebat, tributumq; pendebat: sed in iis quæ ad Dei cultum resq; divinas attinebāt, cum non audiebat. Unde hanc præscribit regulam, Reddenda esse Cæsari, quæ sunt Cæsaris, & Deo, quæ Dei: docēs, hæc duo minimè secū pugnare, nempe Christianum esse Deumque colere: atque, si Dei voluntate Principem vel Paganum nacti fuerimus, illius potestati & obsequio nos totos submittere, ut hac ratione Dei etiam mandatis pareamus. Apostoli in iis, quæ ad res spirituales, Evangelique professionem spectant, asserunt, Deo quidem potius quàm hominibus obtemperandum esse: sed in aliis, quæ ad vitam humanam referuntur, iis non inviti obsequiebantur. Atque ab omnibus veteris Ecclesiæ Christianis id semper ita intellectum observa-

túmque fuit. Papa igitur ineptissimus est Theologus, apertéque ostendit se, dum suis monitoriis bullis ad eum, quem à Deo constitutum habemus, Regem repudiádum incitat, omni fundamento destitutum esse, cùm unicùm duntaxat sacræ scripturæ locum ad suam confirmádam sententiam citet, & falsò etiam citet. Debuit paulò attentius securum reputare calamitates & discrimina, in quæ, dum hanc nobis doctrinam subiicit, imperia mundi coniicit. Experientia satis quotidiana comprobatum est, quàm facilè populi ad rebellionum concitentur, & quicquid de Principibus in vulgus spargitur, nullo iudicio moráque adhibita, libentissimè credant. Ubi semel quis dixerit principem suum sceleratum esse, Paganum, hæreticum, qui tamen fortasse & Catholicus erit & probus, satis magna & luculenta ea esse occasio putatur. An non enim de Davide in

2 Reg. 16. Absalonis conjuratione dictum fuit cum improbū esse, execrandū Deo, & detestabilem, & qui dominatum in
Dei

Dei populum obtineret, planè indignum? Mahometem & Mahometis sectæ vindices cōstat, illud sacrū quoddā fidei axioma habuisse, ut eos principes, qui non essent ejusdē secum religionis, de sua ditione dejiciēdos esse crederent, nullo ferè alio ad bellū gerendum fundamento & argumento freti. Nisi Papis cordi voluptatique esset, rerum omnium perturbationem & confusionem in rebus humanis videre, non ita hæc populo prædicatum irent. Verū, ut summatim dicā, nulla hīc objectio quantumvis specie probabilis, satis magna est ad affirmandū & persuadendum; principibus infidelibus obtemperandum non esse. Neq; uspiam probari etiā potest, Christianos ullam eorum, quæ de recusando illis obsequio dici contrā poterant, rationem unquam habuisse: id quod de veteribus Gallis majoribus nostris, qui & Pharamūdum, & alios reges primos paganos habuerūt, dici eodem modo potest. Christianis, qui Principes infideles adepti erant, hoc unum proposi-

tum erat, ut se in Dei veritatis confessione confirmarent, atq; ad cruciatus constanter perferendos, ad magistratum suorum severitatē summa animi æquitate superandam, ad preces pro his fundendas, & ad eorum animos omni obsequii & obedientiæ genere sibi conciliandos, inter se hortarētur. Illis verò nunquam hoc in mentem venit, ut vel minimam rebellionis suspicionem darent, vel iis, qui adversus suos principes, quippe paganos vel hereticos rebellionē molirentur, exemplo essent: nec id ab iis factum aut verè obiici aut certò probari potest.

Cæterum reges ac principes excōmunicatos nihilo est æquius de sua sede & statu demovere. Si enim sunt principes legitimè à Deo vocati, illud pro firmissimo, nec vlla ratione labefactando fundamento nobis esse debet, eos imperandi ius & auctoritatem habere: cum potestates sint à Deo cōstitutæ, quibus, ut dictum est, resisti nō debet, quæcunq; tandē caussa adferri in excusationem possit. Equidem, ea quæ

quæ nobis cum Christo eiusq; Ecclesia est communio, liberorum jus nobis dat, verosq; & legitimos in bonorū vite præsentis (quatenus ad Deum pertinet) possessione, & usu etiā ipso hæredes facit. Verū nulli est hoc impedimento, quin aliud præterea generalius hominum & Imperiorum constitutionis respectu jus sit, quod eorū etiam, qui hujus communionis non sunt, interest: in eo quod Deus ipse hujus Mundi bona partitur, tantū omnibus seu liberis seu alienis tribuēs, quantum pro suo arbitratu statuit, & cuique proprium esse decernit. Principatus & ditiones eodem modo so habent. Nec eo nomine, quòd in ea communione simus, Deus iis nos ornat. Nam Deus ea sæpe illis donat qui in ea communione nec sunt, nec erūt unquam. Quòd si jus illud in hoc genere, ab Ecclesiæ cōmunionē ut à sua causa non proficiscitur, sequitur profectò hoc jus illi minimè peritūrum, qui ab hac cōmunionē fuerit segregatus. Excommunicatio Ecclesiasticæ disci-

plinæ pars quædã est. Ecclesiastica autem disciplina regiminis spiritualis est, quod res humanas & ad hanc vitã pertinentes nullo modo attingit: ut hujus etiã disciplinæ animadversiones & censure à civilium judiciorum pœnis multum differunt. Nusquam scriptum probatumq; extat privatũ quenquã, quod ab Ecclesiæ communione abdicatus esset, bonis suis exutũ fuissẽ, si res probẽ in ea cõstitutæ fuerint. Sotis animã & conscientiã ea pœnã tantum afficit, quãdo tum civitatis, tũ privilegiorum & prærogativarum, quæ Dei filiorum propriæ sunt, tum tesserarum fœderis, optimarumq; salutis promissionũ jure abalienatum, quando etiam per excommunicationem ex Christi domicilio & corpore abstractũ se videt. Idq; ut hujus miserix (in quam se sua culpa incidisse reputat) cogitatio & horror eum urgeat, & ad resipiscendũ impellat. Ex his igitur videre est, eã pœnã bonorũ hujus vitæ privationẽ nullo modo contineri. Quod si privati homines nec bonorum suorum possessionẽ & usum,

usum, nec alia sua jura excommunicationis vi amittunt: quæ tandem causa est & ratio, quam ob rem major in principes severitas adhiberi debeat? Ad hæc excommunicatio ad tempus dumtaxat vim suam retinet. Quamprimum enim reus peccatum suum confitetur, ejusq; se poenitere profitetur, Ecclesia ex Dei mandato eum noxa liberat, communionemq; illi restituit. Si bona per eam separationem auferrentur, per communionis restitutionem, bona illa in quorum possessionem alter fortasse jam venisset, restitui quoque necesse esset. Neq; enim Ecclesia omnia excommunicatorum bona tandiu sibi vendicaret, quoad resipuisset: quod fortasse in nonnullis nunquam fieret. Regi excommunicato jus regni abrogaretur: Itaq; è vestigio illud ad alium quempiam transferri necesse esset. Monarchia enim in hoc præcipuè regno interregnum pati non potest. Rex igitur resipiscens, in integrum esset restituendus: quod quidem non ita facile fieret, si potestas summa penes alterum jam esset. Ad-

quam fuit, vi excōmunicationis imperii administrationē cuiquam eripi. Postremi Episcopi Romani hoc primi cogitarūt & ausi sunt, ut inde se principibus formidabiles redderent, eosq; sibi hoc terrore subjicerēt, suæ summæ auctoritatis ubiq; stabiliendæ gratia. At Deus id nec voluit, nec verbo suo unq̃ statuit. Itaq; patres nostri Dei voluntatis non ignari, toto studio & conatu isti Paparū tyrannidi reluctati sunt, eamq; opinionem in Bonifacio 8 hæresin vocarunt. Cumq; ita ratio cōparata sit vitæ naturæq; nostræ, ut omnes ad peccandū propensi simus, & ita graviter aliquando peccandum, ut nisi Dei virtus præstò sit, cēsoria excōmunicationis nota reprimēdi simus: ecquis princeps, aut etiam vir privatus, qui modò aliquid possideret, in tanto amittendorum bonorū metu, discipline Ecclesiasticæ submittere se vellet? Quanta hæc remora, quātum etiam impedimentū esset, principibus maxime, ne se ad Ecclesiam Christianā adjungerent, si ab ea semel ob delictū aliquod abdicati,

à suo etiam imperio abdicarētur? Statuamus igitur hoc tandem & concludamus, principes per excommunicationem suo principatu & ea, quam antea in suos habebant, potestate & auctoritate nec jure privatos fuisse, nec esse privandos.

Idem quoq; de relapsis quos vocant est statuēdum. Nam etsi poenæ graviores in eos constituentur, ea tamen non debent regiminis spiritualis fines excedere. Atque Ecclesia debet ad eos, si ad se redeant, absolvendos prompta semper & parata esse: ac proinde ad ipsorum vitam ac salutem poenas referre, ob idq; lenitate, quæ in correctionibus omnibus necessaria est, severitatē temperare, ut qui in eandē culpam relabuntur, ad vitæ emendationem faciliùs attrahantur; qui misericordia eò digniores sunt, quò major infirmitas in iterato eorum lapsu videtur. Dicere autem relapsos deploratæ esse salutis, relabi hoc esset in Novati hæresim, quæ tanto omnium consensu à tota veteri Ecclesia damnata fuit. Privati homi-

homines si fortè in idem hæreseos crimen reciderint, aut alio quodam modo bis offenderint, nihilò magis sua bona amittunt, quàm si semel tantùm offendissent. Probandum esset aut locis ex sacra scriptura depromptis, aut idoneis aliquot exemplis, aliam quandam ob principes legem constitutam esse; quod nusquam, nisi in Paparum consistoriis, reperietur, ubi hæce perturbationes & confusiones ad principes opprimendos nullo nec auctore nec exemplo conflant. Subditorum in suos principes officia ejusmodi omnino sunt, cujusmodi liberorum erga parentes, servorum erga Dominos, & uxorū erga maritos officia esse solent. Deus enim hæc omnia uno legis mandato summatim complexus est, quo præcipit parentes honorandos esse. Nunquam verò visumve auditumve fuit, ut ob unicam religionis causam & eas quæ inde accidunt mutationes, uno ad fidem vocato, altero in infidelitate permanente, illo in Ecclesiæ cōmunionē hærente, hoc ab illa separa-

to, ulla fiat conditionis mutatio, ita ut filius è patris potestate emancipetur, servus ex Domini Imperio manumittatur, uxormariti auctoritate solvatur. Nam contrà liberis citra ullam omnino exceptionem præcipitur, ut parentibus obediant. Apostoli etiam censent, ut fideles servi in fide & officio erga Dominos suos maneant: fidæ verò conjuges maritis suis subditæ perpetuò sint. In principum autem imperio & potestate, qua cæteræ omnes comprehenduntur, mutatio minùs etiam probanda est, quippe multò magis periculosa & lubrica. Porro ego, priusquam huic sermoni finem faciam, præclarum hoc majorum nostrorum facinus hîc addendum putavi, ut quid illi de hac Paparum doctrina senserint, planè intelligamus. Papa Urbanus I I Philippum I excommunicare in animo habuit, & postea Paschalis Ludovicum Crassum. Papæ his fundamentis nitebantur, quòd illi reges flagitiosi essent, ideòque digni,

gni, quibus regnandi jus ac potestas adimeretur: Tota Gallia, cui hoc erat invisum & inauditum, adversus sedem Romanam vehementer irritata fuit, illique omnes, qui Papæ causam tuebantur, durius accepti sunt. Id perspicui potest ex Ivonis Carnutensis Episcopi ad Papas literis, quibus eos monebat ut consilium suum mutarent, ne gravius aliquid in se statui sentirent.

Quum verò ejus temporis Scriptores *Abbas Sigebertus.* de Galliæ adversus Papas accensæ causis loquuntur, hæc commemorant: ea Paparum verba, novitatem esse aut hæresim, quæ antea nunquam in mundo extitisset, per quam scilicet populus doceretur, principibus sceleratis nihil prorsus obedientiæ & obsequii præstari debere: & quanquam fidelitatis sacramento illis obstrictus esset, omni tamen erga eos fidelitate solum ac liberum esse: nec perjuros eos esse habendos, qui à suo rege ad alium quemlibet desciscerent. Immò verò,

quicumque Regi pareret, pro excommunicatione existimandum: contrà, qui facinus aliquod adversus regem pararet, omni injustitiæ & perfidiæ crimine absolvendum. Historia nominatim hæc refert, ut doceat, quanto pere doctrinam ejusmodi, quam Papæ in totum orbem spargerent, & disseminarent, exhorruerint, & quódnam esset istarum excommunicationum, per quas principes omni dignitate & auctoritate spoliarentur, & cives ad seditionem concitarentur, fundamentum. Verùm tam multis gravibusque Ivonis admonitionib⁹ Papæ nihilo sapientiores & meliores effecti sunt. Eãdem enim omnino doctrinam Sfondratus Papa per suas Bullas nobis obtrudit, ad institutam hæc rebellionem confirmandam. Ea doctrina jam inde à Philippi primi ætate, nova, atq; adeò à nostris majoribus hæresis esse dicebatur. Res verò gravior est, quàm ut temerè Bullis fides habeatur, in quibus nihil quidquã adfertur, quod aut vero ullo sacræ scripturæ testimonio

nita-

nitatur, aut certo aliquo veteris totius in suis omnibus ætatibus & partibus Ecclesiæ usu confirmetur. Sfondratus equidem nescio quas Paparum cōstitutiones nobis inculcat: at nos solidas & expressas Dei ipsius constitutiones & placita postulamus. De Sanctæ etiam Sedis reverentia verba facit: At est alia sedes, cui summam observantiam debemus, longè sanctior, apud quam omnes sistendi sumus, nempe Christi tribunal: ex quo consilia & decreta nobis sumēda sunt, ut ne à recta vivendi ratione aberremus. Idem agit de præstanda Ecclesiæ obedientia: rectè: id etiam ipsi desideramus. Sed vera Ecclesia docet, vni Deo, cui ipsa in rebus omnibus cedit, seq; totam submittit, parendū esse. Edicit suis omnino mandatis parendum esse, cæteris omnibus, quibus studium, amorem, honorémq; & observantiā debeamus, postpositis. Et quis tandem Sfondratus iste est, cujus imperiis cæterorum omnium Imperia postponi, cujus Bullis Dei etiam ipsius, qui aliter omnino

precipit, mandata subiici debeant? Atque hæc, quòd pluribus alibi explicata & illustrata fuerint, paucis tantùm hîc attingere volui: quæ tamen, licet paucula, ad eas dubitationes quas Papæ Paparumq; clientes Jesuitæ, harum quibus jactamur tempestatum concitandarum ergò simplicium animis injecerunt, penitus tollendas, satis magna, mihi quidem videntur: quamquam Rex noster divina gratia talis, qualis ab iis fingitur, non sit nec Paganus, nec Hæreticus, nec excommunicatus, nec Relapsus, si diligenter omnia, ut in re tanta decet, ponderentur.

Rex equidem Paparum doctrinæ fidem non habet, seque prorsus ab eorum consortio & communione segregavit: Sed patres nostri docuerunt eos omnes qui Papis nō credunt, seq; dum inordinatè se gerūt, ab iis separāt, non esse propterea hæreticos. Papam autē indecorè se gerere nemo nescit. At tam multis jam sæculis pii clariq; viri id conqueruntur ac deplorant; tota
Chri-

Christianorum gens cum accusat, & aliquando, si Deus dederit, re tota sapienter & accuratè disceptata, illum ipsum damnabit: quantumvis id refugiat, & suis omnibus quas ubique terrarum commovet, procellis, furiosisque consiliis impedire conetur. Sunt quædam religionis capita, in quibus Rex ab Ecclesia Romana dissentit: non propterea tamen cõperietur hæreticus, si dispiciatur, in quibus & quomodo in iis se gerat, & quid profiteatur ac testificetur. Hæreses, (ut ex hæresibus quæ veterem Ecclesiam excuerunt, videri potest) versantur aut in Trinitatis materia, aut in Christi mediatoris nostri persona, aut in illius officiis, salutisque rationibus, aut in Ecclesiæ definitione & natura, aut denique in iis, quæ ad scripturæ sanctæ veritatem & auctoritatem labefactandam spectant. Regis fides super his capitibus omnibus examinetur, nihil causæ reperietur, quamobrem hæreticus sit habendus. Nec Paganus est, nec Judæus, nec Mahometista:

quin falsas illas impiasque Religiones
 omnes ex animo detestatur: illum dū-
 taxat pro vero & unico Deo habet quē
 Patriarchæ, Sancti Prophetæ, totaque
 Israelitica Ecclesia ob omni ævo co-
 gnovit, venerata est & coluit: Illum,
 qui Mosi legem dedit, & per Prophe-
 tas cum patribus loquutus est: quique
 postremis temporibus sese in Christo
 Domino nostro manifestiùs nobis pa-
 tefecit. De sancta Trinitate credit, quic-
 quid ab universis conciliis de ea defi-
 nitum decisumq; atque summam A-
 thanasii symbolo comprehensum fuit;
 Ut id etiam, quod de Christo Media-
 tore est traditum, quem esse credit &
 agnoscit verum & in æternum prædi-
 candum Deum, simul & verum ho-
 minem è Virgine Maria natum. Per-
 suasumq; habet, eum, quē admodum
 à Deo constitutum ab omni ævo fue-
 rat, ita etiam redemptionem nostram
 omni ex parte explevisse, solumq; no-
 bis & salutis & æternę vitę causam au-
 ctoremq; esse: ac nos ipsius, ut in Evan-
 gelio docetur, per fidem participes
 fieri.

fieri. Ecclesiam Catholicam, & extra
 eam nullam esse salutem, credit, pre-
 cibus votisq; omnibus in ea ad extre-
 mum usq; vitæ spiritum manere exo-
 ptans. Sancta etiam sacramenta, pro-
 ut à Christo fuere instituta, credit. Po-
 stremò sanctam scripturam, certam
 Dei veritatem esse, eaq; omnem do-
 ctrinam nobis necessariam contineri
 credit: atq; quod tum ad salutem cō-
 sequendam credendum, tum ad ob-
 servantiam quæ Deo placeat exhibē-
 dam præstandum sit, non aliunde pe-
 tendum esse. Atq; eorum, quæ & Rex,
 & ejusdem cum eo religionis homi-
 nes tenent, ut ex eorum scriptis abun-
 dè constat, hæc summa est. Rex itaq;
 his fretus & confusus, impias omnes
 Arrianorum & Manichæorum, item-
 que aliorum omnium hæreses, quæ
 cū à sacris Ecclesiæ doctōribus re-
 futatæ, tum sanctorum Conciliorum
 decretis una voce & consensu damna-
 tæ fuerunt, ex animo etiam damnat.
 Controversiæ, quas cum Romana Ec-
 clesia habet, ejusmodi sunt, ut siquid

errat, in hoc maximè erret, quòd cõcedere patriq; nõ possit, ut, vel hominibus vel rebus ullis creatis, præterquã Deo, cultus religiosus tribuatur: ut Christus non solus ad Deum nobis sit via & adiutus, sed quispiam alius illi adjūgatur, & in nostræ salutis causis quidquã aliud habendū sit, quàm unicū Christi mortis & passionis, atq; ejus quam Deo patri præstitit, obedientiæ meritū: utq; alius quisquã gratus Deo cultus censeatur, quàm qui ab eo in sacris scripturis fuit præscriptus & cõstitutus. In his omnibus si quis sit error, in eo duntaxat est, quòd omnia Deo uni, nihil autem hominibus tribuat. Ejusmodi autē error, si tamen error habendus est, non potest esse hæresis. Atq; hæc de controversiarum materia dicta sint.

Quomodo autē in his rebus se gerat, omnibus compertū est. Neq; enim aut pertinax est, aut aliqua vel arrogãtia, vel malitia, vel pravo perturban-
dæ Ecclesiæ affectu ducitur: Papa in suis Bullis ait eum per matrem jam inde ab infantia hæresi imbutum fuisse:
at, vel

at, vel hinc eum talem non esse male
mente, & insolenti ac voluntaria ever-
tendæ Ecclesiæ alacritate, manifestò
colligitur. Ac Divus ipse Augustinus
eos, qui sic à parentibus educati & in-
stituti fuerint, magis excusandos esse
tradit. Papa eorum meminit, quæ ne-
fastis illis D. Bartholomæi diebus illi
acciderunt, illiusque abjurationem o-
mni colorum & exornationum gene-
re exaggerat, multa simulans, & veris
falsa consultò admiscens. At dies illi ita
nobiles sunt & insignes, ut unica vio-
lentiæ recordatio pro justa defensione
illi esse possit. Nihil ea de re amplius
dicā. Dira illa fuit & inaudita Tragœ-
dia, quam Deus pro sua bonitate huic
regno diutius nō imputabit. Equidem
rex multa tunc admisit: religione sua
ejurata, Romanā se amplecti professus
est, Missæ interfuit, Romā misit, vera
hec omnia sunt. Sed vi adact^o hec facie-
bat omnia, cū pbi ac fideles servi in
ejus sinu atq; amplexu trucidati fuif-
sent, ipse quoq; in summo capitis discri-
mine quotidie versaretur, & in arctis

fimam jam captivitatem detrufum fe
 & compactum videret. Illius adole-
 fcentia, perpetuæ adverfus eā quæ per
 vim ageret testificationes, mandata,
 quæ ad populum fuum Bearnensem
 clandestina denunciatione pferenda
 curabat, viæ & rationes ex illis fe la-
 queis extricandi toties captatæ ac ten-
 tatae, & quæ primum evadendi oblata
 fuit, arrepta confestim occasio, vim illi
 factam fuiſſe, & quæcunq; tunc tem-
 poris faceret, ea vi coactum & præter
 voluntatem feciſſe ſatis cõprobarunt.
 Metus ille fuit in prima & teneriori æ-
 tate incuſſus, & eo imminente pericu-
 lo, quò nullum aliud majus excogita-
 ri poſſit. D. Petri abjuratio non eſt illi
 jam ulli probro & dedecori. Nam for-
 mido, qua fuit correptus, eam extor-
 ſit, & illum ad peccatum etiam longè
 gravius, audita unius ancillulæ voce,
 adegit. Verùm id factum illico acerbè
 deploravit & lamētatus eſt. Ergo pec-
 catum per metum admiſſum, culpæ
 excuſationem in alio meretur, nō pro-
 brum & damnationem, ut Papa de
 prin-

principe nostro pronūtiat. Infirmetas hæc est, animiq; imbecillitas, quã Deus pro sua immensa misericordia tolerat. Quin apud homines, siquid gravioris pœnæ aut infamię metu factum fuerit, id ex legibus nominatim ad eam rem latis, pro infecto habetur, nulliq; pœnę obnoxium esse censetur.

Papa regē præceptis ad religionem necessariis abundè instructū fuisse proponit. At ut probè aliquē instruas, gladius illi non intentatur: sed ter quaterque cum lenitate summa de officio admonetur, ut Apostoli nos docent, nulla vi illius conscientia facta. Rex igitur de Papa, à quo hæreticus, & relapsus declaratus fuit, identidē quæret, quid officii tum ipse, tum ipsius decessores hîc præstiterint: quando testimoniis è sacra scriptura petitis hæreseos cōvictus damnatusq; fuerit: quando tutus suis ministris accessus patuerit, ad familiariter coram se cum Sorbonicis doctoribus disputandum, unde sibi de suo errore apertè constaret. Quod enim Papa objicit, regis mini-

stros illic adfuisse, ita quidē se res habet. Misellus quidam & verē miserā-
 dus minister, nomine Hugo Suræus,
 aliās Roserius Parisinam carnificinam
 fugiens, ab hostibus captus, Lutetiam-
 que retractus præ metu religionē ab-
 juravit, & sese ad eorum nutum arbi-
 triumque & dicturum & facturum o-
 mnia promisit. Is ad Regem perdu-
 ctus, Doctoribus Sorbonicis assensus
 est. At postea culpam suam, libris in
 eam rem æditis palam agnovit, atque
 à Rege, ad quem pervertendum & in
 errorem inducendum adhibitus fuif-
 set, veniam petiit. Fuit hæc igitur par-
 tis vtriusq; collusio, non verum ac pi-
 um colloquium ad docendū accom-
 modatum. Rex igitur nihilo sapien-
 tior ab illis factus, in iis quæ à pueritia
 didicerat & crediderat, cōstanter per-
 mansit, quippe præclarè se ac piè pa-
 rentum cura institutum fuisse, ac pu-
 rioris religionis fundamenta optimè
 jecisse persuasus. Neq; ulla mala men-
 te pravæque conscientia in eo perse-
 verat, quasi aut novitatis studio, aut
 qua;

quadam contradicendi libidine ductus. Molestiæ & æumnæ, quas tandiu pertulit : negotia & impedimenta, quæ illi adhuc à cōjuratis tanta pertinacia inferuntur : hostium prava consilia & assiduæ interpellationes, amicorumq; importunitates, id satis confirmant : à quibus omnibus posset semel omnino se vindicare, religioni suæ renuntiando, nisi Dei offendendi, amittendæque salutis metus eum perpetuò moneret, ne invita & repugnante conscientia quidquam faciat : sed potius meliorem, si qua usquam extat, & quam à nemine hætenus accepit, institutionem exspectet. Præterea in hisce de religione controversiis non solus requirit ut errorum, qui eam occuparunt, ac deformarunt, reformationi provideatur : Bona pars Christiani orbis idem ipsum cum illo postulat, & adversus Papam, qui rei tam necessariæ obstat, uno ore proclamat. Nemo ferè jam existit, qui non multa in Ecclesia peccari fateatur, idq; vehementer conqueratur &

deploret: qui non horribilem & prodigiosam in Clero confusionem corruptioneq; videat; & qui institutionem ac disciplinã illã quæ ad sacerdotum quæstum & avaritiam omnino accommodata fuit, frequentiore & fideliorẽ, perquã necessariam esse non censeat. A multis jam sæculis, permulti præstantissimi doctrina & pietate viri in hoc etiam regno, ut D. Bernardus & alii complures, libros in lucem editos querelis & expostulationibus obistas labes & confusiones refertos nobis reliquerant. Hęc omnia regis causæ inserviunt, qui nihil aliud vehementius desiderat, quã illud venire adesseque tempus, quum tot tantaque vulnera per legitimum piumque concilium sanentur, ac sancta totius Ecclesiæ recõciliatio summãq; omnium concordia fiat: testificans ex animo ac profitens primũ se iis, quæ illic summo omnium cõsensu & sacrarum scripturarum auctoritate decreta constitutaq; fuerint, libenter obtemperaturũ. Nullãq; re omnino in his tam diu-

turnis

turnis & infestis, quibus vexatur, bellis æquè offendi & angī, atq; lōgâ illâ, quæ tum percipiendæ ex sacro illo concilio utilitati, tum perficiendæ illi, quæ se regni sui statim initio ea de re obstrinxit, promissioni affertur, tarditate & morâ. Quum hæc omnia in rege considerabuntur, atque ex adverso dispicietur, quis sit habendus hæreticus, uti quidem in sacris scripturis describitur, & à piis Ecclesiæ doctoribus definitur: Ex iis profectò nec constabit nec probabitur, regem hæreticum esse. Siquis error inesset, humanus ille error esset, quo qui tenentur, nec deplorati nec ab Ecclesia abdicati censendi sunt: Ideoque apud eos ex D. Pauli doctrina adhibendæ sunt cum omni animi lenitate admonitiones, non autem ea, quæ hodie intentatur, violentia.

Nec verò rex noster ex iis, quæ Sixtus Papa illius adversarius edidit, vllō modo habendus est excommunicatus, ut jam antea docui. Et quidem Patres nostri ex historiis, quæ com-

memorata sunt, satis ostenderunt quid de Paparum Excommunicationibus sentire debeamus. Responsiones à doctissimis viris ad Sixti contra Regem excommunicationes, unà cum multarum Nullitatum declaratione hodie extant, eaq; ita eruditè compositæ & ad rem præsentem appositæ, ut ad Regem non apud Deum tantum, sed apud omnes homines, qui modo sincere iudicare volent, absolvendum, omnique culpa liberandum momenti satis habere videantur. Magnâ Deo immortalis habenda est gratia, quòd in Papæ potestate non sit, eos qui in libro vitæ inscripti sunt, ex eo expungere. Quòd si Papa idoneus Regis nostri Judex esset, suamq; jurisdictionem ad eum usque ac minimum etiam hujus regni incolam proferre posset, quod profectò non potest: si judicium in Seniorum, ut Deus præstituit, cœtu factum fuisset: si justa eum damnandi causa extitisset: si actionum ex verbi divini regulis, & canonibus etiam antiquis via & ratio in judicando obser-

vata

vata fuisset: si legitime excommunicationis fines propositi, rectaque & ejus qui peccavit salutis, & utilitatis Ecclesiae studia adhibita fuissent: si Ecclesia rectè congregata rem assensu suo comprobasset: Postremò, si Dei verbum in tota illa actione præcipuum locum obtinuisset, fuissetque pro regula: ex his quidem certè omnibus excommunicationem rectè factam fuisse constaret. Sed horum omnium nihil quidquam usurpatum observatumque fuit. Consilia adversus Galliam nostram quotidie inita: inveteratum adversus reges ac principes nostros odium: indignatio, in quam erumpunt, quòd amplitudinem suam in hoc regno cum summa potestate nondum stabilitam esse videant: coitiones & pactiones, quas cum externis hostibus habent ad prodendum ipsis tradendumque hoc regnum: ut uno verbo dicam, furor & nocendi, perdendique omnia libido, solæ fuerunt veræque aliis Papis causæ cur hæreseos sententiam & excommu-

nicationem in superiores reges, & in ipsum etiam Henricum Regem, defunctum, pronunciaverint, & eâ quidem impudētiâ, ne impietate dicam, ut nihil suprâ. Hodieq; adeò illis ipsis caussis adducti, suas ad nos bullas emittunt. Hoc verò planè nihil aliud est quàm stomachosum ac perversum & regiam gentem opprimendi, & regnum simul totum evertendi propositum. Religio autem quam illi admiscunt, prætextus tantummodo est, ac mera simulatio.

Sfondratus contumeliosè nobis de rege loquitur, quasi eum nos in hoc regno melius cognitum non habeamus, quàm ille in suo Capitolio. Ait eû, quia datam fidem fregerit, perfidum esse, nec fidem illi unquam habēdam. Væ tibi impure Sfondrate, qui tibi jâ-jam impendente, qua totus exenteris, ruina crepans, tam dirum tuæ acerbitatis virus in tantum principem eructes, & evomas: qui contra Dei

Exod. 22. mandatum populi Principi, atque adeò Galliæ regi maledicere audeas. Dicis eum fidem violasse. Idem & grassa-

tor aliquis diceret, si arrepto, exertoque pugione promissum aliquod à quovis alio extorsisset, quod ille postea, quippe aut contra Deum, aut contra Rempublicam, aut contra bonos mores factum, perficere nolle. Non repetam quod jam dixi, de vi, quæ Regi incussa fuit. Promissis ita extortis nemo ullo aut pacto aut jure obligari potest: ubi autem nulla est obligatio, fidei quoque violatio nulla est. Si Rex putavit se contra Deum facturum, id præstans quod metu coactus promiserat, nunquid promisso suo stetit, Deum cōvictus conscientia offensurus? Cuinam potius fide & promissi religione obligatus tenebatur, quàm Deo? Longiori & accuratiori patrocínio non est hîc opus. Regis fides & integritas satis spectata est & cognita: nec perfidus ullo modo dici potest, ut eum Papa nominat. Ex multis magnisque illius virtutibus, quarum omnes testes sumus (& quas infestissimi etiam illius hostes fateri & prædicare coguntur) hæc maximè una elucet; quòd in suis dictis

promissisque omnibus servandis, in iis sit numerandus, qui candore, firmitate, constantia, & integritate maximè excelluerunt.

Sfondratus cōtumeliis & calumniis quàm Apostolicis virtutibus fœcundior, addit regem Ecclesiæ hostem esse: Rex autem nullam unquā id suspicandi causam dedit. Armis aliquando sese propugnavit: sed legitima quidem propugnatione id fecit adversus eos, qui jam tum regiam stirpē adoriebantur, attractis ad suam causam sub religionis nomine regibus etiam ipsis, qui insidiosas eorum artes, occultaq; & impia consilia nō satis tunc animadvertēbāt, ut ea postea, sed serò & magno suo damno animadverterunt, compertaq; penitus & perspecta habuerunt. Verum Deus sua providentia hostium regis animos aperuit, & quoniam zelus ille speciosiq; religionis prætextus spectarent, omnibus patefecit & illustravit. Quare hoc bonorum omnium virorum judicio certum & manifestum semper erit, regem suosque injustè lacerasse.

cessitos iuste quidem se interdū propugnasse, Ecclesiam verò oppugnasse nunquam: hósque pro sui principis salute, & pro sola Gallia, proindeq; Ecclesiae cōservatione arma cepisse. Nec in tanta animorum contentione, irarūmq; æstu testatum probatumq; usquam reperietur, Regem ullius hominis conscientiae vim attulisse. Ut hodie etiam, ex quo regni clavum tenere & gubernaculum Rei publicæ tractare cœpit, tanta humanitate & lenitate cum clero ubiq; locorum egit, ut satis hinc probet se de molestia ulli omnino homini ob religionē exhibenda nullo modo cogitare. Accusatur, quòd sacerdotiorum fructus iis qui pro ipsius dignitate & salute arma ceperunt, largiri soleat. At hæc temporum culpa est, non illius: qui non voluntate sua, sed belli necessitate coactus hoc agat: atque magis in eos, qui arma contra se gerunt, quàm in reliquos, idque maxima prudentia & æquitate. Prisci Reges, ut accepimus, certum hoc & exploratū habuerūt, licere

sibi horum fructuum partem in sustentandis belli sumptibus impendere, si ea esset regni, rationumque illius necessitas, ut fieri aliter non posset. Publicæ verò rei necessitas tanta est hodie, ut major certè antea nunquã fuerit, aut in posterum esse unquam possit. Si eam ob rem Ecclesiæ hostis declarandus videtur: idem quoque de superioribus Regibus habendum ac docendum erit. Si qua tamen culpa hîc est, ea profectò ipsius hostibus, qui illum eò necessitatis compulerint, assignanda est. Quid sit Ecclesia, novit, & quantopere Deus eam principibus commendaverit, nō ignorat. Ex multis illius optatis hoc non est postremū, ut his bellis cōpositis summa temporum exoriatur tranquillitas, & animorum consensio, per quam conciliū congregare tutò liceat, ubi apertè vereq; patefacere omnibus possit, quo amore Christianam Ecclesiã prosequatur, & quo studio atque animo illius dignitatem & commoda curare, atq; ad eò pro sua quidem facultate, augere velit.

Papa alio argumento in suis Bullis utitur, quo probet regem nostrum non esse legitimū regni successorem: Itaque à regni administratione repellendum. Argumentum è cladibus & calamitatibus, quibus in hoc regno tandiu afflictamur, sumptum est. Argumenti fundamentum hac præcipuè, quæ his verbis ab eo cōsignata est, propositione nititur. *Ubi Deus colitur, adversitas nō habebit effectum*, & contrà: *Ubi adversitas locum & effectum habet, ibi Deus non colitur*. Dei autem cultui nullum inter nos locum esse ita vult inde intelligi, quòd regem legitimū & Deo earum, probatūmq; non habeamus. Usu venit sanè Sfondrato nostro, ut hac in re in eandem temeritatē inciderit, in quam alii complures, qui de calamitatibus & vexationibus quas Deus immittit, longè aliter senserunt quàm deceret. At primū quum ait, *Ubi res adversæ vigent & urgent, ibi Deum non coli*: Ea propositio, quæ ex publicæ calamitatis causarū ignorance proficiscitur, falsa est: ut & altera huic cōtraria æquè

falsa est: Ubique Deus colitur, res
adversas nullum locum, nullam etiam
vim habere. Id enim falsissimū esse per
vetus ætatum omniū experientia con-
vincit, & Dei quoq; ipsius ea de re de-
cretum. Deus alibi non colitur, quā
in Ecclesia: ipsa tamen Ecclesia durio-
res rerum adversarum effectus ac fre-
quētiore hīc sensit: Ei forti conditio-
nique quamvis acerbæ Deus eam ob-
jecit ac subjecit. Quemadmodum et-
iam optimi quique, & qui Deū purio-
ri mente coluerūt, ut Prophetæ, Apo-
stoli, & clarissimi alii Dei servi, gravio-
ribus usq; casibus expositi fuerūt. Con-
trā patet, adversitates minora effecta
habuisse (ut ita cum Sfondrato loqua-
mur) in improbis, in quib. minor Dei
metus, illiusq; colendi studium minus
appareret. I nunc, & ex Sfondrati pro-
positione, quid hīc sentiendum statu-
endumque sit, conclude: Inde profe-
ctò & Ecclesia & optimi omnes impie-
tatis damnabuntur: improbi verò om-
ni culpa soluti, absolventur. Ita nimi-
rum olim de Davide, de Jobo & piis
aliis

aliis viris, atq; adeò de Christo ipso judicari solebat. Interim tamen non inficiabor, peccata nostra & non valde religiosum, quem Deo in hoc regno tribuimus, cultum calamitatum, quibus adeò vexamur, causam esse. Nobis enim omnibus in Dei conspectum est prodendum, ut judiciũ illius subeamus, damnationiq; nos ultro ipsos subjiciamus. Impietates & blasphemia, iniqua hominũ judicia, homicidia, & civium trucidationes, libidines, & in omnibus regni partibus cõfusiones hanc regni labẽ atq; eluviem, hanc etiã miserrimarum & malorũ Iliadem in nos justo Dei judicio invexerunt. Verũ cùm tam multis magnisq; flagitiis Deũ offenderimus, cùm etiam & superstitioso & impio cultu eũ irritaverimus, nulla certè ratione pro calamitatũ nostrarum causã id habendum est, quod nõ modò non peccatũ est, sed etiã unum ex præcipuis illius, quã Deus de nobis exigit, obedientia caput, nempe regi à Deo nobis constituto parendum esse. Quanquam verò hoc etiam iis assen-

tiremur, Deū aliquando in populos animadvertere ob malos principes, qui in iis dōminatum tenent; non inde tamen consequeretur, quod Sfondratus contendit, regem, qui jam nobis præest, illegitimum esse. Regū enim peccata (ut iniustitia, crudelitas, & gravissima alia facinora, quæ Deus aliquando in populos derivare solet), efficere nō possunt, ut reges sint illegitimi, ac digni, cōtra quos populi conjurent, eosque de sede sua deturbent, ut antea docuimus. Judicia hæc sunt ejusmodi, ut Deo ipsi disceptanda omnino ac decidenda permittere debeamus. Reges qui olim Dei populo regendo præfecti erant, plerunque fuerunt Idololatæ, vitæque vitiosæ & flagitiosæ præditi. Ideoque Deus nō in illos tantum sed in subiectos etiam eorum imperio populos iræ suæ tela cōjecit. Nunquid tamen in ullius unquā mentem venit dicere, eos reges qui casus & clades suis sceleribus in populū attraherent, nullum jus potestatemque dominandi habere, populóq; imperatum hinc fuisse,

fuisse, ut obsequium erga eos exueret? Interim hoc necessario non consequitur, si populus plectatur, id ad regem tanquam auctorem referendum esse, cum ejus rei causæ in populo ipso verè inesse possint. Qualia rogo Ezechie tempora fuerunt, quum tota regio ab Assyriis funditus direpta, vastataque fuit? Quale etiam Josiæ regnum, si calamitates illius expendantur? Veruntamen maxima piis illis regibus facta fuisset injuria, si quis ita, ut Sfondratus, argumentatus fuisset. Nempe, ubi res adversæ vigerent, ibi Dei cultum & frigere & penitus jacere: & quia populus Ezechiam Josiamque principes ac moderatores suos haberet, ideo Deum non coli. Sfondratus igitur calamitates nostras procul hinc videt, de iis fert sententiam, easque nobis exprobrat: sed inconsultò & temerè. Si ad Deum respiciamus, satis magnas nos affligendi causas habet: sin, ad homines quod attinet, proximæ causæ inquirantur, nulla sanè major est, & quæ tot malis nos oppresserit, quàm Papa-

rum superiorū & Sfondrati ipsius furores, qui nobis universam hanc conjuratorum factionem confluxerunt, illisque Galliam nostram bellis exitialibus vastandi facultates antea suppeditarūt & etiamnum suppeditant. Papæ tantummodo longissimè à nobis, rebusque nostris absint, nos omittant, nos vexare, res nostras quæ ad se nihil attinent, curare desinant: dicto citiùs miseræ nostræ desinent.

Ne multa, Papa quicquid volet de rege nostro effutiat (pro eo more quo Papæ principum nomen contumeliis lacerare solent) Nos regem nostrum satis notum exploratumque habemus, & locupletes eximiarū, quibus Deus eum cumulatissimè ornavit, virtutum testes sumus. Prisci reges illius decessores à suis semper celebrati, & summis laudibus honorati fuerunt, quantumvis Papæ illorū famam suis fulminibus obscurare & inquinare conati sint. Hic verò, qui ab eadem stirpe nobis à Deo est datus, illorū dissimilis minimè nobis videbitur: etsi Papa aliam
de il-

de illo animis nostris opinionem injicere nitatur. Si quis contra contendat atque asserat, hujus & superiorum regum facta inter se differre, quòd tunc temporis de religione non ageretur: Dicam in patrum nostrorum contra Papas cōtentionibus aliquam religionis mentionem factam semper fuisse. De aliquo privatim capite non dimicabatur: sed de eo quæstio erat, quod Papæ tanquam religionis totius fundamentum statuunt, nempe de summa illa, quam in universum orbem sibi arrogant, auctoritate, per quam cunctis ab omnibus, moremque sibi geri velint. Nam si hoc non maneat, fixumque sit, Papa in suis canonibus sæpe declarat nullam usquam gentium religionem superesse. At patres nostri ei sententiæ toto conatu obnitebantur. Quæ quidem re Papæ adducti, tanquam de religionis summa omnino ageretur, in sua quam adversus eos ferebant sententia, hæreticos, schismaticos, Ecclesiæque hostes nuncupabant. Ut verò apertiùs docerent,

ob istam obedientiæ & obsequii recu-
sationem, omnem è Gallia religionem
planè sublatam esse, suis interdictioni-
bus vetabant, ne templorum januæ
aperirentur, ne ullus Dei cultus ob-
servaretur, ne ulla sacramenta usurpa-
rentur. Contentio igitur in hoc capite
versabatur, quod Papæ fidei articulum
vocant, & religionis universæ funda-
mentū. Et quidem tota illa inter Papas
& protestantes, dum ad concilium ap-
pellant, orta jamdudum controversia
in hoc maximè uno cōsistit. Nam hac
parte controversiæ dirempta, Papæ vi-
delicet auctoritatem minimè esse tan-
tam, quantam sibi sumit: Deo uni, ut
Domino summo in sua Ecclesia auscul-
tandum & obtemperandum: Papam,
omniaq; illius mandata & decreta san-
ctarum scripturarum normæ submit-
tenda esse, eadē operâ reliquæ omnes
controversiæ discussæ sublatæq; pror-
sus erunt. Verùm, cur ex religionis
controversiis hîc verba facimus, cūm,
ut jam omnibus perspicuum est, de re-
gno quod hostes invadūt atq; usurpāt,

agatur: religio autem merus tantummodo sit prætextus? Cōcludamus igitur, inter hæc nostras de quib⁹ hodie ita digladiamur, & inter eas, quæ patribus nostris cum Papis intercesserunt, cōtroversias, seu in Paparū, qui bello nos persequuntur, consilio & proposito, seu in eorum personis, seu in regis quem Deus ex sacrosancta regni lege nobis præficit, caussa, nullum omnino discrimen, nullam planè dissimilitudinem interesse. Ac proinde nullum opportunius & melius consilium in rebus prorsum similibus, à nobis capi posse, quàm si ad patrum nostrorum exempla confugiamus, nosque totos ad eorum prudentiam, animique magnitudinem & constantiam conformemus.

CONCLUSIO.

A MPLISSIMAM hic locus & valde luculentam admonitionis ad omnes hujus regni ordines mihi daret materiam, per quam, priusquam dicēdi finem facerem, eos ad causam hanc

pro communi dignitate & salute contra Papam & conjuratos suscipiendam exhortarer : nisi animi ampla quædam & splendida propositio passim in multis ita eluceret, ut acrioribus ad eos animandos incitandosq; stimulis nihil amplius opus esse videatur. Si ulla unquam causa certas divinæ vocationis notas habuit, quibus freti ad eam recta cōscientia propugnandā aggredieremur, hæc quidem certè est. Ubi primum privatorum aliquot hominum quies in aliquo principatu ab externo quopiā hoste interrupta, aut populi alicujus libertas tantulū attentata fuerit, aut Deus aliquam aliam ob causam ad arma vocaverit, continuo ab universis accurritur, idq; persuasissimū & exploratissimū omnibus est bellū tunc legitime geri. Quæ verò ad bellū justè & legitime suscipiendū, atq; tum ad vitam, tū ad facultates omnes in illud pfundendas nos movere possunt, ea omnia ad hanc profectò causam concurrunt. Hispanus aliiq; finitimi hostes nos aggrediuntur, invadūt, hostiliter petunt, oppres-

oppressuri nos, & si possint, everfuri funditus, quanquā nullam in nos juris speciē, nullam etiā id tentādi causam habeant. Infert vim Papa, quē nihil offendimus, qui cōtrā maximā sui splendoris & amplitudinis partē, acceptam nobis meritissimò referri debet: qui etiam pacis inter nos cōciliandæ auctor esse deberet, si qualis haberi vult, talis & re vera esset: atq; interim ut hostiū, quibuscum facit, libidini serviat, sua in nos fulmina armataq; acies immittit, quarum vi adacti servitutis jugum subeamus. Cives adeò ipsi patriæ suæ proditores nefariè rebellant, & ij etiam ipsi, qui superiori rege à se impiè trucidato, alterius jam, atq; totius etiā gentis regiae vitam petunt, qui nostras ferè omnes facultates diripuerunt, qui domos & urbes nostras ad interitū & cineres redegerūt, & à seipsis ita degenerarūt, ut hostis in media regni ipsius viscera perfidè admissi insignia, cōculcatis Gallicis, ostentent. Hīc Dei mandatum nominatim sancitū. & perscriptum est, quo præcipitur, ut regem ab

eo nobis constitutum honoremus, illiusq; vitam atq; auctoritatem adversus omnes conservemus. Hîc bonorum omnium Patrû exemplum propositum est, qui in re simili ad communem & regni & regis sui causam, egregiam fidem alacri promptoq; animo adhibuerunt, nulla hominis cuiusquam ac ne Papæ quidem ipsius ratione habita. Aguntur hîc nostræ opes, vita nostra, familiarum nostrarum honor, liberorum nostrorum conservatio, & qua nihil in rebus humanis omnibus prius & carius esse debet, nostra libertas. Venditioni & direptioni à Papa, & quod longè est gravius atq; indignius, à nostris ipsis expositi sumus. Status publici mutationem molliuntur, ex qua quidem, ut facilè colligere est, universa partium omnium mutatio & conversio necessariò consequatur, per quam omnia horribili confusione permisceantur, funditusque intereant. Quos dominos in regis nostri locum substituere conantur, non sunt aut Scythæ aut Turcæ, sed

sed qui omnē totius orbis Barbariam immanitate & tyrannide longè superant: ut in omnibus regnis, ditionibus & imperiis, quibus dominantur, observare licet. Atq; hic est belli hujusce status, causæ, consilium & scopus. Quid verò in eo desiderari potest, quominus legitimum habeatur, atq; frigidissimorum & ignavissimorū quorumque animi ad belli hujus societatem nobiscum ineundam excitentur, ut Dei qui nobis id præcipit, nomine ac numine freti, hæc omnes, quæ nobis imminent calamitates à nobis propulsemus? Religionis nomen obtenditur. Papa honorificos illos, quibus insigniter est ornatus, titulos proponit. Atq; hinc eò gravior & indignior, quæ nobis infertur, iniuria videri debet, quòd & sacrosanctorum Dei nomen ita profanetur, & sacra omnia iura pervertantur, ut adversus præscriptum Dei mādātum ad nos ipsos prodēdos, ad patriam ipsam perdendam, & durissimæ omnium crudelissimæq; servituti exponendam concitemur.

Patres nostri, seu quòd reges à Papis durius appellati fuissent, seu quòd Papæ contempta regum auctoritate pecuniam exigere ausi essent, seu quòd summam aliquam potestatem in hoc regno usurpassent, causâ diligenter ex legibus divinis & humanis, itemque ex regni institutis & moribus disceptata ac dijudicata, Papas sine ulla dubitatione damnarunt, ac relegarunt, eorum ministros ignominiosè acceptos è nostris finibus expulerunt, eosdem suis edictis & senatuscòsultis hostes declararunt, atq; justissimè bellum iis inferri posse censuerunt. Sed nò de bullis jam agitur: alia longè graviora urgent. Pontificiæ adversus demortuum regem excommunicationis virtute, finitimi ditionem hanc invaserunt, extrema regni propugnacula occuparunt, atq; in media etiam illius oppida suis & callidis consiliis & aureis Philippis se insinuarunt. Quin Sfondratus Sixti decessoris sui furores imitatus, initam dudum rebellionem cōfirmat, omnem pacis inter nos conciliandæ

liandæ viam intercludit: vicinos, ut ad navis quasi laceratæ direptionem certatim accurrât, enixè sollicitat: thesauros è nostris oculis eo animo (hic enim putabatur) & consilio, ut ad bellū contra Turcas gerendum cōverterentur, corrosos, expromit & totos exhaurit, per quos armata manu nos invadat, & si modò potest, penitus etiam perdat. Huccine rerū venimus, hæc ne est horum temporū ratio, hic ne regni status, ut deceat Gallos aut medios esse, aut quibusdam rationibus repressos frigēre, aut publicæ defensionī aliqua in re deesse, & turpiter à Majorum suorum pietate, fortitudine, & fide degenerare? Non mediocris equidē bonorum virorū, patriæq; studiosorum civium animis incutitur dolor, quum ad arma venit: quæ si ob religionē capiantur, cōduplicatur mœror, suspiriāq; magis ac magis invalescūt. Non sine maximo igitur animi angore bellū hoc suscipitur, in quo Dei nomē in prætextū usurpatur. At Deus ipse sanctè præcipit, ut regi pareamus: rei necessitas & perpetua

majorum nostrorum exempla ad id nos invitant & compellunt. Papa nullam conquerendi occasionem habet. Non nos Ecclesiam perturbamus aut vexamus: ille ipse mali hujus est auctor. Quam responsionem Elias Prophetæ Achabo faciebat, eandem ipsi nos facere meritò possumus. Ille ipse tragœdiâ hanc excitavit, ille ipse hanc nobis perniciem machinatur, ille ipse pro pace, quam suadere nobis debuit, claviculâ canit, ad bellum etiam civile & intestinum nos concitat. Ille ipse pro pacifico Evangelio, & cōsolationibus, quæ in rebus adversis nobis peropus sunt, copias infestas, & excommunicationum tonitrua in nos emittit. Bonos Ecclesiæ Pastores maximi semper faciemus, & illum ipsum imprimis, si talis esset. Ille quidem se talem, ac Patrem sanctum in suis Bullis nuncupat, sed facta & mores repugnant. Patres in Benedicti 13 causâ nos docuerunt, quomodo de bonis pastoribus iudicare debeamus. Ille enim tunc eosdem quoq; usurpabat titulos, quos & Sfondratus

dratus sibi jam arrogat: sed illi verba sibi dari non sinebant. Iudicii, quod faciebant, regula, statûs Prophetarum & Apostolorum, atque Benedicti conditionis cōparatione nitebatur. Quum enim Samuelis, D. Pauli & aliorû Dei servorum integritatem sibi proponebant, & cum ea Benedicti mores actaque componebant, liberè judicabant, Benedictum nō eum esse, quem se diceret, pastorem scilicet & patrem sanctum: sed avarû, Ecclesiæ vexatorem, ac tyrannum: hoc etiam verbum usurpantes. Id in Caroli VI edicto ita scriptum extat. Si hac majorum regula utimur, de Sfondrati pietate & zelo judicaturi, quid sentiemus, quid statuemus? Ecquid unquam aut in Apostolis, aut in ullis aliis Dei servis Sfondrati cōsiliis & actis simile reperietur: ut nimirum cives in principes suos concitarint, ut etiam Ecclesiæ ærarium (quod satius & sanctius ad pauperû inopiam sublevandam, & alias res ejusmodi necessarias conferretur) emunxerint ad colligendos exercitus, & eò consilio

immittēdos, quorū opera, cū alii suis opibus & honoribus, tum reges maximè ipsi dignitate & potestate sua exspolientur? Hoccine Evangelium Apostoli prædicarunt? Itane omnē dominationem fugerūt? Siccine ab omnibus humanis negotiis abstinuerunt? ad cōne salutem omnium procurarunt? Tantōne studio & cura hominū offensionē vitarūt, ut potius quàm minimā etiam infimis cōquerendi occasionē darent, de suo aliis jure cōcederent? Nunquid senserunt, dixeruntve unquā, sua quibus maximè uterentur & niterētur, arma, aut in militū collectione, aut in opibus viribusq; humanis consistere? Si igitur Sfondratus se nec lupū, nec conjunctionis ad nos funditus perdendos conflatae caput esse, sed potius verū pastore & pium patrē re ipsa comprobaret, nos omnium primi honorem illi & observantiā libentissimè deferremus. Sed patres suo nos exemplo docuerūt, ubi Dei mandatū proponitur, ubi publica salus agitur, nulli cuiquā quamvis præstantissimo & potentissimo cedendum.

dum. Subjiciat quantum volet se in D. Petri cathedra sedere: successionē suam objiciat: se Apostolū etiam vēditet: veritas ipsa id omnino falsum esse clamat. Tota illa, quā Episcopi vendicare sibi possunt, auctoritas, una est cult⁹ divini, cui regēdo & administrādo à Deo constituti sunt, nō dominationis, nedū tyrānidis, auctoritas. Omnia vestra sunt (ait Apostol⁹) sive Paulus, sive Apollos, sive Cephas &c. omnia inq̃ vestra sunt: vos autem Christi: Christus verò Dei. Maximi quiq; in hoc Ecclesiæ servorū numero sunt, & in iis D. etiā Petrus, qui illic nominat^r Cephas. Atq; Academia Parisiensis in sua illa præclara ad Carolū VI admonitione, hujus loci meminit, eumq; ad eā, de qua tunc agebatur, controversiā scitè & appositè accōmodavit. Si qua igitur Papa est auctoritate præditus, eam ad opprimēdam Ecclesiam, vexādōsq; Christianos adhibere nō debet. Alioqui, si Apostolorum statum exuit, ut Monarchę exercitū conscribentis statum induat: totus adeò ad regnū, quod in suis Monitoriis Bullis

1. Cor. 1.

præcipuū Ecclesiæ adminiculū nominare cogitur, penitus evertendū comparatus: si, inq̃, talē se gerit, nō item servum, pastorem & patrē: nulla est jã illius auctoritas, merus est verusq; lupus, quem oves averſari & fugere debent. Quū patres nostri flagitiosos ejusmodi Papas habebāt (qui tamē pravis affectibus, odiis, & sceleratis cōtra hoc regnū conſpirationibus, ab iſtorū furoribus longiſſimo intervallo aberant) ſolenni judiciorū ritu proclamabant ac decernebant, ſibi ab iis diſcedendum eſſe, Apoſtoli cōſilio freti, dum ait, Segregate vos ab omni fratre, qui ſe inordinatē gerit. Quinetiam eos ipſos, ſi provinciæ ſuæ finibus egreſſi, in regnū hoc infeſtis armis irruere tentarent, hoſtes edixerunt, ſtatuerūtq; bellum cum iis juſtē geri poſſe. Hæc nobis eſſe debent ſacroſancta, inviolatēq; ſervanda judicia, ſi hoc regnum eſſe ſalvum velimus. Publicæ ſaluti omnis dignitas & auctoritas, etiā pontificia, quanquam dirumpatur & crepet ſfondratus, cedit neceſſe eſt. Cū tot bonæ fidei re-

ctæque

etæque conscientiaë testimonia nobis non desint, errare jam & labi non possumus.

Nec verò mali quidquã nobis hinc metuendũ est, modò armis, quæ Deus ipse nobis tradit, rectè utamur. Sfrondratus mira pollicetur, si quod imperat præstemus : contrà dira minatur, si imperiũ detrectemus. Lenis quidem & benignus pater est, sed continuò fulmen arripit, arma & copias, quæ confanguinei sui ductu & auspiciis regãtur, insolèter jactat. Nunc sacri ad precandum vel imprecandũ pontificis: Nunc armati ad bellum gerendũ imperatoris, ut quondam Bonifacius, habitum & personam suscipit. Senectutẽ suam stomachatur & cõqueritur, per quam ipse rei gerendæ adesse non possit. Vitam etiam suam se profusurũ promittit, sed procul admodum, & periculi securus. Alter est Julius 2, furoris & cædis plenus, qui libenter D. Petri claves in Tyberim projiceret, ensẽ & loricaẽ arrepturus. Nempe ille Christi vicarius, ille Petri successor Sfrondra-

rus in suis Bullis talem se ostendit. Sed ea omnia meræ sunt minæ, & vana puerorum terricula. Patres nostri aliorum Paparum nec rabie, nec illis, per quas finitimi adversus regnum conjurabant, comminationibus ullo modo terrebantur. Nec Sfondrati copiis magis terrebitur Gallica nobilitas, alique optimi viri patriæque studiosi cives, qui se animorum æquè ac nominis & facultatum avitarum successores verè præstabunt. Papæ fulmina, fumi umbra tantum sunt: Illius monitoriæ literæ nihil sunt aliud quàm inanes, contractæ & ut ita dicam, exenteratæ bullæ, quæ levem duntaxat & evanidum strepitum edant.

Quòd si aut temeritate quadã, aut nonnulla imperii alieni invadendi cupiditate, aut aliquo alio pravo cõsilio, ingerendo hoc bello duceremur, næ metuendæ valde nobis essent non hominis cujusdam, sed Dei ipsius comminationes, qui nec vult nec patitur, ut bella ita injustè gerantur. At nos
hujus

hujus belli Deum ipsum comprobato-
 rem habemus, cùm illius mandati
 auctoritas jubeat, cùm Majorum ex-
 emplum moneat, cùm (acerrimum
 ad res gerendas telum) maxima, &
 quàm antea unquam longè major ne-
 cessitas moveat, ut ad justam ac legi-
 timam regis nostri regnique totius de-
 fensionem aggrediamur: cùm deni-
 que regem, quem Deus tam multis
 sui in nòs amoris & benevolentiae ar-
 gumentis nobis præfecit, ducem au-
 spicemque habeamus. Ea est Dei vo-
 catio, cui illius ipsius beneficio co-
 mes erit successus & felicitas. Qui bel-
 lum suo regi indicunt & inferunt, qui
 patriam hosti produnt, qui universum
 regnum incendio, sanguine, & con-
 fusione complent, his justum Dei ju-
 dicium, & quò tardius, eò gravius
 certò impendet. Certa enim hæc est
 stabilisque & immutabilis Dei senten-
 tia; Quicumque potestati resistit (Apo-
 stolus ad Roman. 13. de principe à Deo
 cōstituto ita loquitur) Dei ordinationi

resistit: qui verò illi resistunt, ipsi sibi condemnationem auferent. Hæ sunt autem Monitoriæ Dei vivi literæ, non hominis mēdacis Bullæ. Rebelliones atque nefariæ civium in principes suos conjurationes, impunitæ nunquam & inultæ relinquentur. Illæ demum minæ metuendæ sunt. Conjurati de suo Papa insolenter gloriantur, eum nobis superbè ostentant, subindèque obtrudunt: Putant illum Dei cujusdam instar sibi esse, qui dextram ad nos pefundandos fulmine armatam habeat. Ex vexillis Papæ ipsius ore manúque consecratis miranda sibi promittunt. At eæ bullæ sunt & nugæ. Promissiones & cōminationes, itemque elogia & imprecationes, in Dei unius nec aliūs cujusquam manu & dispensatione sitæ sunt. Adversus Dei minas, istius furiosi benedictiones nulli planè auxilio & præsidio erunt: adversus verò vesani istius execrationes, quas in nos usque jaculari se putat, Dei studium & patrocinium, tutissimū nobis semper erit certissimumque propugnaculum.

Con-

Convertetur perversitas ejus in caput ejus (ut in Psalmo dicitur); & super verticem ejus, iniquitas ejus descendet: *Psal. 7.*
 Caroli VI tempore in Parisiensi conventu, concionis cujusdam à Doctore Theologo, dicto Cruricurto in Benedictum Papā institutæ atq; habitæ argumentum fuit: Illud etiam hodie nobis adversus Sfondrati, ejusque similia conspirationes & fulmina, sacrosanctum divinæ justitiæ decretū esto.

T. Berchetus Lectori S.

QUUM post conscriptum & pœne jam aditum hunc libellum gravissimum supremi senatus adversus Papam ipsiusque Bullas decretum, quo libri argumentum ita confirmatur, ut alterum ex altero confectum descriptumque esse videatur, ad nos perlatum fuisset: illud quoque Lector, Latine mihi vertendum, & in tuam gratiam huic libro apponendum putavi, ut de Bullarum Papalium inanitate & errore, de causse regie justitiæ & veritate, atque de admirabili senatus integritate & fide tibi magis constaret. Nempe par erat ut Patricii à patrum suorum ac veterum illorum senatorum, qui tam magno fortique animo decreta ejusmodi non semel adversus Paparum tyrannidem fecerant, constantia &

animi magnitudine non degenerarent: sed potius in eadem causa eodem quoque animo essent, & virtutem illorum ac fidelitatem fortiter imitarentur. Verè hoc profectò patrissare est. Sed jam senatusconsultum lege, examina, & perpende: nullum quidē certè aut iustius aut sanctius aut magnificentius ea de re factum unquam fuisse dixeris. Vale.

Supremi senatus Decretum.

DECREVIT senatus ut in posticâ complicatarum literarum parte hæc inscribātur, lecta, publicata, in tabulas relata.

AUDITO, & hoc postulante generali regis procuratore, atq; habita reliquarum petitionū ab eo propositarum ratione, Monitorias Bullas primo die Martii Anno 1591 Romæ datas, irritas, fallaces, seditiosas, damnandas, impietatum & imposturarum plenas ac refertas, sacris Ecclesiæ Gallicanę decretis, juri, immunitatibus & libertatibus contrarias esse declaravit ac declarat. Constituit ut literarum Marcilii Landriani sigillo consignatarum ac Sextilii Lampini nomine subsignatarū exempla

empla per † publicum supremæ Juris-
 dictionis executorem dilacerentur,
 atque in ignem, qui hanc ob causam
 ante præcipuam curiæ portam incen-
 detur, cremanda conjiciantur. Om-
 nibus Antistitibus, Curionibus, Vica-
 riis & aliis Ecclesiasticis viris ne ulla
 Bullarum istarum exempla promul-
 gent: itemque cæteris omnibus cujus-
 cunque status, conditionis & sortis ho-
 minibus, ne illis pareant, ne ulla et-
 iam omnino habeant & conservent,
 sub læsæ Majestatis criminis pœna in-
 terdixit. Gregorium Papam se vendi-
 tantem, hujus nominis XIII publicæ
 pacis, Ecclesiæ Catholicæ Apostolicæ
 & Romanæ concordiæ, regis Gallici-
 que regni hostem, Hispanæ conjura-
 tionis socium, rebellium & in regem
 contumacium fautorem: crudelissimi,
 immanissimi, & detestabilissimi par-
 ricidii in Henricum III fidelissimæ
 memoriæ ac Christianissimum & sum-
 mē Catholicum regem per proditionem
 patrati conscium pronunciavit
 ac pronunciat. Omnibus mensariis

† forenses
 viri nostri
 tes carnifi-
 cē hoc ver-
 borū cir-
 cuitu si-
 gnificant.

† *vulgo*
Dispensas
vocant.

ne ad Bullas & Canonum † gratiam, atque ad aliam quamcunq; aliarū rerum facultatem impetrandā vel spondeant, fidemq; suam interponat, vel mensarię negotiationis opera, aurum argētumve Romam perferendum curent sub eadem pœna interminatus est atq; interminatur. Siquid verò ejusmodi jam transactum confectumq; fuerit, Magistratibus ac Judicibus, ut in id diligenter animadvertāt mandat. Idem senatus sancit, ut Marcillus Landrianus dicti Gregorii Nuntius, qualem quidem se profitetur, itemq; Bulligerulus, injecta manu comprehendatur, & in curiæ carcerē captivus pertrahatur, causa dicta disceptatāq; ex legibus pro merito condemnandus. Quod si capi cōprehendiq; nullo modo possit, ut tribus perendinis, è quā proximo sueffionibus, accessūq; facili loco, ad causam dicendā vadimoniū illi denuncietur. Omnibus urbiū gubernatoribus, atque artium & propugnaculorum in regis ditione & imperio cōstitutorum præfectis, ut supradicto decreto exequen-

quendo opera atque auxilium ferant, jubet. Atque, ut justa sanctaque regis voluntas ipsius subditis testata & manifesta fiat, edicit ut exscripta tum regis codicillorum, tum hujus senatus-consulti cum exemplari collata & recognita exempla, in hujusce urbis cōpitis ac præcipuis templorū portis apponantur & affigantur: atque ad hujus Jurisdictionis præfecturas ac municipia mittantur: quò illic publicentur, in tabulas referantur, & ut jam dictum est, affigantur: nec non ad Archiepiscopos & Episcopos qui ea deinde Ecclesiasticis suarum Dioceseon hominibus patefaciant. Munus hoc † Juridici- † *Balivos*
 cis provinciarū præfectis, eorum tum *Esenescha*
 generalibus tum specialibus subpræ- *los hodie*
 lectis injungit, ut illorum promulga- *vocamus.*
 tionem curent. Adhæc procuratoris generalis substitutis, ut omni studio & opera ad decretum hoc exequendum incumbant, in contumaces anquirant & animadvertant, senatumque de adhibita à se in eam rem totam diligentia intra mensem certiore fa-

ciant, alioqui Magistratibus suis abdicandi. Turonibus in supremo senatu Anno millesimo quingentesimo nonagesimo primo, quinto Augusti die, quo ad hujus Decreti executionem pomeridianis horis ventum fuit.

Idem Berchetus Lectori S.

EN alterum adhuc, Lector, senatuscōsultum altero post prius illud die allatum & cōversum: idque superiori ad cō germanum & simile, ut, si per pauca mutaveris, geminum quodammodo, & una poene, aut potius plane anima in duobus corporibus inesse videatur. Facit verò id summa in tuenda regis maiestate ac propugnanda patriæ libertate cōsensio, & conspirans membrorum cum suo capite sympathia, ut, quot antea unicum supremae curiae corpus fuerat, nunc temporum iniquitate, longo licet a se lectorum intervallo distractum, idem tamen prorsus & sentiat & sanciat, certatimque de fide & officio contendat ac laboret. Verum, cum res ab his & illis gravissimis senatoribus iudicata ita bellè libelli huius sententia congruat, ut altera ab altera omnino probetur & confirmetur: operæ aliquod pretium facturum me sum arbitratus, si darem pro mea parte operam, ut quæ tam appositè & convenienter quadrant, ederentur simul, & eodem quoque

quoque libello concluderentur: unde haberes, in quo verè utilitèrque conquiesceres. Vos verò ò gravissimi patres, quotquot jam & Turonibus & Catalauni superestis non minima, immo potius potissima & splendidissima Danaùm atque immitis Achillei reliquia, cùm pristina avorum, tum vestra ipsorum pietatis ac virtutis memores, vos fortiter ut facitis colligite, & ad Gallici regni conjuratorum scelere perfidiaque labantis statum erigendum, & in antiquum splendorem restituumdum summo consensu conspirate: atque, ut verbo dicam, ad divina & humana jura à Catilinariis istis ferè convulsa & eversa instauranda stabiliendaque omni ope atque opera incumbite: ut publica rei conservata ac restituta partem non mediocrem vobis ipsi nulla invidia vindicare: Nos autem & tota adeò posteritas, tantam istam, quam in difficillimis Reipub. temporibus opportunissimè præstiteritis, virtutem ac fidem gratâ memoriâ, honorificisque laudibus meritissimò prosequi ac celebrare possimus. Vale iterum Lector, & tantillo hoc nostro labore libenter frui. 5 die Septemb. 1591.

SUPREMÆ CURIÆ CATALA-
launi confidentis Decretum in provocatio-
nem per generalem regis procuratorem de
iniqua & fallaci quarundam Bullarum, quæ
Româ emanarunt, concessione & execu-
tione interjectam, factum.

OB Monitorium Bullarū, excom-
 municationū, & fulminationum
 Romæ aduersus Henricum huius no-
 minis III, & hunc qui iam regnat, de-
 cretarum concessionem & executionem:
 tum ob Bullarum de Cardinalis
 Caietani legatione, ac de iis omnibus,
 quæ inde sequuta sunt: atque aliarum
 quoque Romæ primo Martii die 1591
 datarum, actuumque & promulgatio-
 num per Marcilium Landrianum
 Papæ se nuntium profitentem facta-
 rum, quia irritarum, frustratarum,
 bonis omnibus inuisarū & odiosarum,
 seditiosarum, atque aduersus sacrosan-
 ctæ Gallicanæ Ecclesiæ decreta, jura &
 libertates confectarum editionē: Le-
 gitimâ inter generalem regis procura-
 torem jure, quippe de re fallaci & ini-
 qua

qua provocantem, criminisq; ac maleficii nomine agentem: atq; inter ipsum Marcilium Landrianum Referendarium Papę se nuntium vulgò venditantem, in hoc regnum regis injussu clām ingressum, citatū reum, & ad nomen non respondentem actione instituta:

Curia ad provocationē à dicto generali procuratore factum judicium reddens, & de absente secundū præsente judicans, statuit ac pronūciat, quicquid cōtra defunctum Hentricum III felicissimę memorię regem, & hunc qui regni gubernacula nūc tenet, ejusque clientes, & ditioni atque imperio subjectos cives constitutum, tentatum, actumque fuerit, id perperam, vanē & falsò constitutum, tentatum & actum: ideoq; ab actore publico & regio rectē appellatum fuisse. Supra dictas omnes Bullas, acta, excommunicationes, & fulminationes ut brutas & irritas, odiosas & invisas, seditionis faces, imposturarū plenas, atq; adversus sacra decreta, canonicas cōstitutiones, approbatāq; concilia, nec non Gallicanę Ec-

pis etiã, Episcopis & Ecclesiasticis aliis viris graviter interminatur, ne ulla judicia aut acta à Nuntio illo emanantia promulgent, promulgarive patiantur, ne in perduellionis pœnam incurrant.

Declaravit ac declarat Cardinales qui Romæ agunt, itemq; Archiepiscopos, Episcopos aliosque Ecclesiasticos, qui Bullas istas & excõmunicationes suaferunt & cõsignarunt, quiq; immanissimũ, perquàm abominandum, & detestabilissimũ in Christianissimũ & Catholicum imprimis vita defunctum regẽ perfidiosissimè admissum parricidium cõprobarunt, sacerdotiorũ, quibus in hoc regno potiũtur, possessione exturbatos esse. Atque generali regis procuratori munus hoc imponit, ut regiam manum ejusmodi sacerdotiis injiciat, iis regis nomine vendicandis & dispensandis idoneos fidelissimosq; sequestros præficiat, deniq; curiam de collata à se ad eã rem diligentia cõmonefaciat. Hoc interim decreto edicit, ne quis aurũ vel argentum Romam aut ferat aut ferendum curet: néve il-

lic de sacerdotiorū possessione sibi cavenda & cōfirmanda ullo modo agat, rationemq; ineat, donec ea de re constitutum quid à rege decretūq; fuerit. Postremò cavet & sancit ut regius procurator à se interpositæ ad proximè futurum legitimè quidem ritēq; congregatum conciliū, provocationis auctoritatem de Cardinali Sfondrato Gregorium XIII se mentiente, qui in sanctam sedem Apostolicā grassatoris instar invasit, cōsignatā penes se habeat.

Hoc verò Decretum in hujus Jurisdictionis præfecturas & municipia perferendum curabitur, ut in iis ad tubæ sonū promulgetur, & in urbium compitis ac præcipuorum templorum foribus affigatur. Procuratoris itē generalis substitutis mandatur, ut eam rem totam diligenter curent: Judicibus verò, ut ad rei conficiendæ rationem aggrediantur, & curiam ea de re certiolem faciant.

Datum in curia Catalauni, 29 die Augusti, 1591, & pomeridianis ejusdem diei horis effectum.







